

SAN MATEO OKIJKUILOJ YIN KUALE TLAJTOLE DE JESUCRISTO

Iweyitajwan Jesucristo katlej oyekaj ya wejkawitl
(Lc. 3:23-38)

1 Yinmej yejwan katlej oyajkej ya wejkawitl iweyitajwan in Jesucristo, katlej walajtok nelwatl de David, iwan noijki walajtok nelwatl de Abraham.

²Abraham oyáj tepapan de Isaac. Isaac oyáj tepapan de Jacob. Jacob oyáj tepapan de Judá iwan oksekimej ikniwan. ³Judá iwan isiwa Tamar okinpixkej inpilwan katlej intoka Fares iwan Zara. Iwan Fares oyáj tepapan de Esrom. Esrom oyáj tepapan de Aram. ⁴Aram oyáj tepapan de Aminadab. Aminadab oyáj tepapan de Naasón. Naasón oyáj tepapan de Salmón. ⁵Salmón iwan isiwa Rahab okipixkej inkone itoka Booz. Booz iwan isiwa Rut okipixkej inkone itoka Obed. Obed oyáj tepapan de Isaí. ⁶Iwan Isaí oyáj tepapan de yen rey David.

In rey David oyáj tepapan de Salomón. Imaman in Salomón yen katlej oyeka isiwa in Urías. ⁷Salomón oyáj tepapan de Roboam. Roboam oyáj tepapan de Abías. Abías oyáj tepapan de Asa. ⁸Asa oyáj tepapan de Josafat. Josafat oyáj tepapan de Joram. Joram oyáj tepapan de Uzías. ⁹Uzías oyáj tepapan de Jotam. Jotam oyáj tepapan de Acaz. Acaz oyáj tepapan de Ezequías. ¹⁰Ezequías oyáj tepapan de Manasés. Manasés oyáj tepapan de Amón. Amón oyáj tepapan de Josías. ¹¹Josías oyáj tepapan de Jeconías iwan noijki okinpixke oksekimej ipilwan, itech nekatej tonaltin nijuak in judiojtin okinwikakej presojtin para itech país de Babilonia.

¹²Ompa itech país de Babilonia, Jeconías okipixke se ikone itoka Salatiel. Salatiel oyáj tepapan de Zorobabel. ¹³Zorobabel oyáj tepapan de Abiud. Abiud oyáj tepapan de Eliaquim. Eliaquim oyáj tepapan de Azor. ¹⁴Azor oyáj tepapan de Sadoc. Sadoc oyáj tepapan de Aquim. Aquim oyáj tepapan de Eliud. ¹⁵Eliud oyáj tepapan de Eleazar. Eleazar oyáj tepapan de Matán. Matán oyáj tepapan de Jacob. ¹⁶Jacob oyáj tepapan de José. Yon José yen katlej oyeka iokich in María. Iwan yon María okitlakatilij in Jesús katlej tikixmatij yen Cristo.

17Opanokej majtlakte iwan nawi tetajmej desde Abraham asta David. Noijki opanokej majtlakte iwan nawi tetajmej desde David asta ijkuak okinwikakej itech país de Babilonia. Iwan noijki opanokej majtlakte iwan nawi tetajmej desde ijkuak okinwikakej itech país de Babilonia asta ijkuak otlakatiko in Cristo.

Ijkín nik otlakatke in Jesucristo

(Lc. 2:1-7)

18Ijkín nik otlakatke in Jesucristo. María yokichixtoka ma ajsi tonale para monamiktis iwan José. Pero antes de mosetiliskej, María okiwalmachilij ya kipia ikone ijlik itlalax ika ipoder in Espíritu Santo. **19**Iwan José, katlej yoyeka para monamiktis iwan María, yej oyeka kuale tlakatl, iwan mach okinekke kipijpinatis in María. Por yonik okiyejyekoj kikawas ichtaka. **20**Nijuak ijkón okiyejyekoj kichiwas, ovalaj se ángel katlej okualtitlanke in Señor. Yon ángel okimonextilij itech ikochteemikilis in José, iwan okilwij:

—José, tekone de David, amo ximomawti timosetilis iwan María para yetos mosiwa. Porke por yen ipoder in Espíritu Santo okichij ma kipia yon konetl. **21**María kipias ikone, iwan tiktokayotis JESÚS, porke Yej kimakixtis ipueblo de itlajtlakol.

22Nochi in yin otlapanok para ma mochiwa tlan okijtoj in toSeñor por medio de yen profeta Isaías:

23In ichpochtle kipias se ikone,
iwan ikone yetos itoka Emanuel,
Emanuel kijtosneki: Dios towan kajki.

24Nijuak José oisak, okichij ijkón ken okilwij iángel in Señor, iwan omonamiktij iwan María. **25**Pero in José mach semi okochke iwan María asta ijkuak otlakatke ikone, iwan José okitokayotij in konetl Jesús.

Nijuak oyeka konetl in Jesús okitlajpalotoj sekimej ixtlamatkej de sitlaltin

2 Jesús otlakatke itech pueblo de Belén, itech estado de Judea, iwan nijuak Herodes oyeka rey. Ijkuakón ovalajkej ik ikisayan tonale sekimej ixtlamatkej de sitlaltin iwan oejkokej itech weyikan de Jerusalén.
2Tlajtlantiwitzej:

—¿Kanin kajki in konetl katlej otlakatke para yetos Rey de yen judiojtin? Porke isitlal otikitakej desde ik ikisayan tonale, iwan otivalajkej otikweyikixtikoj.

3In rey Herodes okimakak tlapololistle nijuak ijkón okikakke, iwan nochtin tlakaj de Jerusalén noijki okinmakak tlapololistle. **4**Herodes okinnutzke nochtin tlayekankej tiopixkej iwan noijki in tlamachtijkej de

SAN MATEO 2

itlanawatil in Moisés. Iwan okintlajtlanij kanin tlakatis in Cristo.⁵ Iwan yejwan okilwijkej:

—Tlakatis itech pueblo de Belén itech estado de Judea. Porke ijkón okikuiloj in profeta:

⁶ Tej, Belén, katlej tikaj itech tlale de Judea,
maski titzikitzin, tej okachi tiweyikistok (tiweyititok).
Porke motech kisas se tlayekanke,
katlej kinyekanas nopolwan judiojtin.

⁷Ijkuakón Herodes okinnutzke ichtaka in ixtlamatkej de sitlaltin, iwan okintlajtlanij itech tlan tonale meroj omonextij in sitlale. ⁸Satepan okintitlanke itech pueblo de Belén, iwan okinmilwij:

—Ompa xiwian, iwan kuale xitlajtlanikan de yon konetl. Iwan nijuak ankajsiskej, annechilwiskej, para nej nojki nias nikweyikixtiti.

⁹Nijuak otlanke okintlapowij in rey, yejwan oyajkej. Iwan sitlale katlej okitakej ik ikisayan in tonale, okinyekanaya asta ijkuak oajsitoj Belén, iwan sitlale omoketzato kan oyeka in konetl. ¹⁰Iwan nijuak okitakej in sitlale sa tekitl opakej. ¹¹Satepan okalakej kalijtik, iwan okitakej in konetl iwan María katlej imaman. Omotlankuaketzkej iwan okiweyikixtijkej. Okintlapojkej inkajajwan iwan okitlatliokolijkej ika oro, ika kopale, iwan ika ajwiakayotl katlej itoka mirra. ¹²Satepan, itech inkochteemikilis, Dios okinmilwij mach ok ma wian inawak Herodes. Toneses, oyajkej para inchan itech oksé ojtle.

Okiwikakej in konetl Jesús itech país de Egipto

¹³Nijuak oyajkej in ixtlamatkej de sitlaltin, ijkuakón, ovalaj se ángel de toSeñor iwan okimonextilij itech ikochteemikilis in José. Okilwij:

—Ximewa, iwan xikwika in konetl iwan imaman asta itech país de Egipto. Ompa ximokawakan asta ijkuak Nej nimitznawatis xikisakan. Porke Herodes kitemos in konetl para kimiktis.

¹⁴Iwan niman yon yuak nijuak oisak in José, okiwakak in konetl iwan imaman para Egipto. ¹⁵Iwan ompa omokajkej asta ijkuak omikke in Herodes. Ijkón otapanok para ma mochiwa tlan okijtoj in toSeñor por medio de yen profeta nijuak okijtoj: “Oniknotzke in noKone ma kisa de Egipto.”

Herodes otlanawatij ma kinmiktikan in konemej

¹⁶Nijuak in Herodes okimomakak kuenta nik okikajkayajkej in nekatej ixtlamatkej de sitlaltin, sa tekitl okualanke, iwan otlanawatij ma kinmiktikan nochtin in chochokotzitzintin de ome xiwitl para ik tlani katlej chantij itech pueblo de Belén, iwan nochtin in pueblojtin katlej katej

ik ompa. Porke in ixtlamatkej de sitlaltin okilwijkaj in Herodes nik ya kipia kej ome xiwitl nijuak yakinika okimmonextilij in yon sitlale. ¹⁷Ijkón otlamochij ken okijtoj in profeta Jeremías:

¹⁸Itech pueblo de Ramá mokaki tzajtzilistle de tekokojkayotl, iwan chokilistle de neyolkokole.
Yen Raquel kinchokilia ipilwan, iwan mach kineki moyolosewis, porke yokinmiktilijkej.

¹⁹Iwan nijuak omikke in Herodes, se ángel de toSeñor okimmonextilij in José itech ikochteemikilis ompa Egipto. ²⁰Okilwij:

—Ximewa, iwan ximokuepa xikwika in konetl iwan imaman para mopaís de Israel. Porke yomikkej katlej okinekiaj kimiktianij in konetl.

²¹Ijkuakón José omejke iwan omokuepke iwan konetl iwan imaman para itech país de Israel. ²²Pero nijuak José okimatke nik itech estado de Judea, mach ok yen Herodes oyeka rey sino yen itelpoch katlej itoka Arquelao, tones omomawtij yas ompa. ToTajzin Dios okilwij in José itech ikochteemikilis, ma wia itech estado de Galilea. ²³Tones, oyáj itech yon estado iwan omochantij itech se pueblo itoka Nazaret. Ijkón otlapanok ken okijtojkej in profetajtin, nik in Cristo kitokayotiskej nazareno.

In Juan Tlakuateekij otlamachtiaya kan tlawaki

(Mr. 1:1-8; Lc. 3:1-9,15 -17; Jn.1 :19-28)

3 Itech nekatej tonaltin in Juan Tlakuateekij ovalaj kan tlawaki de estado de Judea, iwan okinmachtij in tlakaj katlej ovalajkej inawak.

²Okinmilwiaya:

—Ximoyolkuepakan inawak toTajzin Dios, porke yoajsiko in tonale para Dios tlanawatis amonawak.

³Yen yin Juan de akin otlajtoj in profeta Isaías, nijuak okijtoj:

Se tlajtole mokaki tetzajtzilia kan tlawaki, iwan kijta:
“Xikyektlalikan iwan xikmelawakan iojwi in Señor.”

⁴Itzotzol in Juan oyeka de itzojmio kameyo iwan omotlajkoilpiaya ika se kuatlaxtle. Okinkuaya chapulimej (xolinmej) iwan okikuaya nektle. ⁵Miekej tlakaj ovalayaj inawak Juan, ovalayaj de weyikan de Jerusalén, de nochí in estado de Judea iwan de nochtin in tlalmej katlej katej ik weyatl Jordán. ⁶Nijuak omoyolkuitiayaj de intlajtlakol, in Juan okinkuateekiaya ijtok in weyatl Jordán.

⁷Iwan nijuak in Juan okinmitak miekej fariseos iwan saduceos ovalayaj inawak para mokuateekiskej, okinmilwij:

—¡Namejwan kej ankoamej! ¿Akin oamechilwij ke tla anmokuateekiskej welis ancholoskej de itech ikualanilis in Dios katlej amopan witz?

⁸Xikchiwakan tlan kuale para ma mota nik ya amoyolkuepkej. ⁹Iwan

amo xikmolwikan ke ankatej kuale porke antepilwan de Abraham. Ipan melajka namechilwia, ke asta yinmej temej in Dios welis kinkuepas ipilwan in Abraham. ¹⁰Namejwan ankatej ken tlatokkuanmej katlej mach tlakij. Nochtin in tlatokkuanmej katlej mach tlakij motzontekiskej iwan kintlamotlaskej ijtk tltl. In acha sa mochixtok para kintzontekis asta itech innelwayo in tlatokkuanmej katlej mach tlakij. ¹¹Nej melawak namechkuateekia ika atl kej se señas nik melawak anmoyolkuepkej. Pero satepan de nej witz oksé katlej okachi nechpanawilia, porke okachi weyikistok (weyititok) iwan amo ken nej, iwan mach notech powi nion para nikkakkixtis. Yej amechkuateekis ika Espíritu Santo iwan ika tltl. ¹²Yej ejkos kej se tlakatl katlej pewas kichipawas in trigo. Iwan trigo katlej ya chipawak kitlaatis ijtk kueskomatl, pero itlajsolo kitlamotlas ijtk tltl katlej mach keman sewis.

Juan okikuateekij in Jesús

(Mr. 1:9-11; Lc. 3:21-22)

¹³Jesús okiske de estado de Galilea iwan oejkok itech weyatl Jordán kan oyeka in Juan Tlakuateekij, ompa ovalaj para ma kikuateeki in Juan.

¹⁴Pero in Juan mach okinekia kikuateekis. Okijtoj:

—Moneki yen tejwatzin xinechkuateeki. ¿Sejpa yej tejwatzin tikneki ma nimitzkuateeki?

¹⁵Jesús okinankilij:

—Axan ijkón moneki tikchiwaskej, porke in Dios ijkón kineki ma tikchiwakan nochí tlan kuale.

Juan mach ok itlaj okijtoj iwan okikuateekij in Jesús. ¹⁶Níjkuak Jesús omokuateekij iwan níjkuak ovalmej de ijtk atl, in ilwikak otlapowik iwan okitak in Espíritu Santo ovaltemok ipan Jesús kej se paloma. ¹⁷Iwan omokakke se tlajtole de ilwikak. Okijtoj:

—Yen yin notlasojKone, katlej inawak nipaki.

In Amo Kuale Tlakatl okinekia kitlajtlakolmayawini in Jesús

(Mr. 1:12-13; Lc. 4:1-13)

4 Satepan, in Espíritu Santo okiwikak in Jesús kan tlawaki kan diablo okinekia kitlajtlakolmayawini in Jesús.

²Okixikoj mach otakuaj omenpoale tonale iwan omenpoale yuale, iwan satepan otiojsij. ³Ijkuakón, in tetlajtlakolmayaj ovalaj inawak Jesús para kitlajtlakolmayawis, iwan okilwij:

—Tla melawak Tej titeKone de Dios, xikchiwa ma mokuepa pan in yinmej temej.

⁴Jesús okinankilij:

SAN MATEO 4

—In tiotlajkuilole kijta: “In tlakatl mach welis yolitos san ika tlakuale, sino noijki ika noch i tlajtote katlej Dios kijta.”

⁵Satepan, in diablo okiwikak in Jesús itech iweyikan in toTajtzin Dios, yen weyikan de Jerusalén, iwan okitlejkoltij ipan weyi tiopan. ⁶Iwan okilwij:

—Tla melawak Tej titeKone de Dios, ximotlamotla asta ipan tlale. Porke in tiotlajkuilole kijta:

Dios kinwaltitlanis iangelwan ma mitzpalewikan.

Mitzajkokuiskej ika inma,

para amo tkmomagati itlaj tetl itech mokxi.

⁷Jesús okilwij:

—Noijki in tiotlajkuilole kijta: “Amo xikyejyeko in Señor moDios para tikitas tlanon kichiwas.”

⁸Satepan, in diablo okiwikak in Jesús ipan se tepetl wejkapan, iwan okinmititij nochtin paismej de ixko yin tlaltikpak, iwan noch i tlan kipiaj.

⁹Iwan okilwij:

—Nochi in yin nimitzmakas, tla timotlankuaketzas iwan tinechweyikixtis.

¹⁰Tones, Jesús okinankilij:

—Xitzinkisa, Satanás, porke in tiotlajkuilole kijta: “Xikweyikixti in Señor moDios, iwan sanwel Yej xiktekipano.”

¹¹Ijkuakón in diablo okikajtej in Jesús, iwan ovalajkej sekimej angelestín iwan okimonekuitlawijkej in Jesús.

Jesús opéj tekipanoa itech estado de Galilea

(Mr. 1:14-15; Lc. 4:14-15)

¹²Nijuak Jesús okimatke nik in Juan Tlakuateekij okitzakej telpiloyan, ijkuakón Yej okiske de estado de Judea iwan oyáj itech estado de Galilea itech ipueblo Nazaret. ¹³Pero mach omokaj itech ipueblo Nazaret, sino yej oyáj ochantito itech oksé pueblo itoka Capernaum, katlej kajki itempan lago, iwan kajki itech región de Zabulón iwan de Neftalí. ¹⁴Ijkón otlapanok para ma mochiwa tlan okijkuijloj in profeta Isaías:

¹⁵Tlale de Zabulón iwan tlale de Neftalí,

ojtle katlej panotok itempan lago, ik ne lado de yen weyatl Jordán, tlale de Galilea kan chantij katlej mach judiojtin.

¹⁶Nochtin yonmej tlakaj katlej oyekaj ijtik tlatleyualotl okitakej se weyi tlanextle.

Opetlanke in tlanextle para katlej oyekaj itech iekawilo in mikilistle.

¹⁷Desde ijkuakón in Jesús opéj tetlapowia, iwan okijtoaya:

—Ximoyolpejpenakan (ximoyolkuepakan) de amotlajtlakol, porke yoajsiko in tonale para tlanawatis in Dios amonawak.

Jesús okinnotzke nawi michmajkej

(*Mr. 1:16-20; Lc. 5:1-11*)

18 Jesúś onejnentiaya itempan lago de Galilea. Okinmitak omen iknimej: Se itoka Simón, noijki kinotzaj Pedro, iwan oksé itoka Andrés. Okintlamotlatokaj inmichmatlawan ijtk atl, porke yejwan oyekaj michmajkej. **19** Jesúś okinmilwij:

—Namejwan anmichmajkej. Pero axan xiwikikan nowan, para ankintlapowiskej in tlakaj de notlajtol para ma momakixtikan kej yeskia ankinkitzkiskej michimej.

20 San niman okinkajtejkej inmichmatlawan iwan oyajkej iwan Jesúś.

21 Ok achitzin tlayakapan, Jesúś okinmitak ok omen iknimej: Se itoka Santiago iwan oksé itoka Juan, itelpokawan in Zebedeo, katlej oyekaj iwan intaj itech se barko okintilichojojtokaj inmichmatlawan. Iwan Jesúś okinnotzke. **22** Yejwan san niman okajtejkej inbarko iwan intaj, iwan oyajkej iwan Jesúś.

Jesúś okinmachtij miekej tlakaj

(*Lc. 6:17-19*)

23 Jesúś onemia itech nochí in estado de Galilea, otlamachtiaya itech intiopanwan in judiojtin. Otelapowiaya de yen kuale tlajtole katlej temakixtia de kenik in Dios tlanawatia. Iwan okinpajtiaya in tlakaj de nochí kokolistle iwan de nochí kualolistle. **24** Otlapoayaj de Jesúś asta ik nowian (nian nepa) país de Siria. Iwan tlakaj okinwalwikiliayaj nochtin katlej okipiayaj nochí tlamatle de kualolistle iwan de kokolistle, katlej okipiayaj mach kuale ejekatl, katlej mimikij, iwan katlej wilanmej (temetlamej). Iwan Jesúś okinpajtij nochtin. **25** Oyayaj iwan Jesúś miekej tlakaj de estado de Galilea iwan de se región kan oyekaj majtlakte pueblojtin katlej okitokayotiayaj Decápolis. Noijki oyayaj miekej de weyikan de Jerusalén, de estado de Judea, iwan de ik ne lado de yen weyatl Jordán.

Jesúś otlamachtij ipan tepetl

5 Níkuak in Jesúś okinmitak miekej tlakaj, otlejkok ipan se tepetl, iwan ompa omotlalij. Imomachtijkawan omíkuanijkej inawak. **2** Iwan Yej opéj kinmachtia ijkín:

Akinmej moneki ma pakikan

(Lc. 6:20-23)

3 —Ma pakikan katlej momachiliaj pobrestin ipan inyolo, porke yejwan kipiaj parte itech ilwikak kan Dios tlanawatia.

4'Ma pakikan katlej chokaj, porke yejwan moyolosewiskej.

5'Ma pakikan katlej mach moweyinekij, porke yejwan kimoaxkatiskej in tlale katlej Dios okinkakitij kinmakas.

6'Ma pakikan katlej melawak kinekij yeskej yolchipawakej, ken nikuak akaj tiojsiwi iwan amiki. Porke yejwan ixwiskej.

7'Ma pakikan katlej teiknomatiij, porke Dios noijklki kinmiknomatis.

8'Ma pakikan katlej yolchipawakej, porke yejwan kitaskej in Dios.

9'Ma pakikan katlej kichiwaj ma yeto yolosewilistle, porke Dios kinnotzas kej ikonewan.

10'Ma pakikan katlej kintlatlalochtiaj por kichiwaj tlan Dios kineki, porke yejwan kipiaskej parte itech ilwikak kan Dios tlanawatia.

11'Xipakikan namejwan nikuak in tlakaj amechwikaltiskej, nikuak amechtlatlalochtiskej, iwan nikuak amechtlajtoltlatlaliliskej por annechneltokaj. **12**Xipakikan, porke namejwan ankiresibiroskej se weyi tlaxtlawile ompa ilwikak. Xikelnamikikan nik in ya wejkawitl profetajtin noijklki okintlatlalochtijkej.

Namejwan ankatej ken istatl iwan ken tlanextle ixko yin tlaltikpak

(Mr. 9:50; Lc. 14:34-35)

13'Namejwan ankatej ken istatl ixko yin tlaltikpak. Pero tla in istatl kipolos ipuyeka, Ɂkenik oksemi puyeyas? Mach ok kuale, sa se kitlamotla ipan ojtle iwan in tlakaj sa ipan tlajtlaksaj.

14'Namejwan ankatej ken tlanextle ixko yin tlaltikpak, ken se weyikan katlej kajki ipan se tepetl iwan mach weli motlaatia. **15**Nion amakaj kitlikuitia se tlanextle para se kitlaatis itlampa se chikiwitl. Sino se kitlalia ajkopan para ma kintlawili nochtin katlej katej kalijtik. **16**Namejwan no ijkón, ma tlawi namotlanex inmixpan nochtin in tlakaj, para ma kitakan tlan kuale ankichiwaj, iwan ijkón ma kiweyikixtikan namoPapan Dios katlej kajki ilwikak.

Jesús otlamachtij de yen itlanawatil in Moisés

17'Amo xikyejyekokan ke oniwalaj onikpojpoloko itlanawatil in Moisés o noso tlan okijkuijlojkej in profetajtin. Mach oniwalaj para nikpojpolos, sino oniwalaj para nikchiwas nochti tlan kijta. **18**Pero ipan melajka namechilwia, mientras yetos in ilwikak iwan tlaltikpak, mach poliwis nion se letra,

iwan nion se punto katlej ijkuitlito itech itlanawatil in Moisés, asta ma mochiwa nochí tlan omíjkuiloj. ¹⁹Por yonik, tla akaj amo kichiwas kuénta kanaj se tlanawatile de Moisés, maski wel tzikitzin ma yeto, iwan tla akaj tlamachtis amo ma kichiwakan kuénta in yon tlanawatile, yon tlakatl sa tekitl tzikitzin yetos ompa ilwikak kan Dios tlanawatia. Pero tla akaj kichiwas iwan tlamachtis tlan kijta in yon tlanawatile, yetos sa tekitl weyi ompa ilwikak kan Dios tlanawatia. ²⁰Por yonik namechilwia nik mach ankalakiskej ompa ilwikak kan Dios tlanawatia, in tla amo ankichiwaskej tlan kuale ixpan Dios okachi ke tlan kichiwaj in tlamachtijkej de itech itlanawatil in Moisés iwan fariseos.

Tlajtlakole de kualanilistle

(Lc. 12:57-59)

²¹'Namejwan ya ankikakej ke ya wejkawitl okinmilwijkej namoweyitajwan: "Amo xitemikti, porke akin temiktis kipia de kitemaktiskej (kitemaktiliskej) innawak tekiwajkej para kitlajtlakoltiskej." ²²Pero Nej namechilwia, ke tla akaj kualanis inawak ikni, kipia de wetziti kan tlaixkomakaj (tlatzonmanaj) para kitlajtlakoltiskej. Iwan akin kilwis in ikni tonto, kipia de kixkomakaskej itech se junta para kitlajtlakoltiskej. Iwan akin kiwikaltis in ikni, yetos tlajtlakolej iwan welis yas ijtki tliko.

²³'Por yonik, tla ikuak ya tikitki moofrenda kan kajki in artal iwan ikuakón tikwalelnamiki nik in mokni mitzkualanijtok, ²⁴okachi kuale xikajtewa moofrenda ompa itech artal, iwan xiwia ximotlapojpolwiti iwan mokni. Iwan ikuakón ya welis timokuepas kan artal iwan xiktemaka moofrenda.

²⁵'Tla akaj mitztilwia kan tlaixkomakaj (tlatzonmanaj), xajsikan san se tlajtole achtoj mientras tiweli, para amo ma mitztemakti (mitztemaktili) inawak in jue. Porke in tla amo, in jue mitztemaktis inmak in mayoltin iwan mittzakuaskej telpiloyan. ²⁶Ipan melajka nimitzilwia, nik amo tikisas de ompa asta amo xiktlaxtlawa in salúltimo sentabo para tikisas.

Tlajtlakole tla se momekatis

²⁷'Namejwan ya ankikakej nik ya wejkawitl okinmilwijkej namoweyitajwan: "Amo ximomekatikan." ²⁸Pero Nej namechilwia, tla akaj kixelevia se siwatl, kijtosneki ya kimomekatia ipan iyolo.

²⁹'Por yonik, tla moyekixtololo mitztoktia xiwetzi ipan tlajtlakole, okachi kuale xikmokixtili iwan xiktlamotla wejka. Porke okachi kuale xikpolo se parte de motlalnakayo, ke nochí motlalnakayo ma kitlamotlakan ijtki tliko. ³⁰Iwan tla moyekma mitztoktia xiwetzi ipan tlajtlakole, okachi kuale

SAN MATEO 5

xikmotzontekili iwan xiktlamotla wejka. Porke okachi kuale xikpolo se parte de motlalnakayo, ke nochí motlalnakayo ma kitlamotlakan ijlik tliko.

Jesús otlamachtij amo ma mosiwakawakan

(Mt. 19:9; Mr. 10:11-12; Lc. 16:18)

31'Namejwan nojki ya ankikakej nik ya wejkawitl okinmilwijkej namoweyitajwan: "Akin kikajkawas isiwa, kipia de kimakas se amatl kan kijtojtos nik mokajkawa iwan isiwa." **32**Pero Nej namechilwia, tla se tlakatl mokajkawa iwan isiwa, maski isiwa mach momekatia, yon tlakatl kijtosneki kimaka parte isiwa ma momekatia iwan akaj tlakatl. Iwan tla akaj monamiktis iwan yon siwatl, kijtosneki iwan momekatia.

Amo xikijtokan Dios tlachixtok

33'Namejwan nojki ya ankikakej nik ya wejkawitl okinmilwijkej namoweyitajwan: "Tla tej tikipta tikchiwas itlaj tlamantle iwan asta tikipta Dios tlachixtok, tonses moneki xikchiwa." **34**Pero Nej namechilwia, amo xikijtokan Dios tlachixtok, iwan nion amo xikijtokan tlachixtok in ilwikak nik melawak tlan ankijtaj, porke in Dios ompa ewatok tlanawatijtok. **35**Nion amo xikijtokan tlachixtok in tlaltikpak nik melawak tlan ankijtaj, porke ompa tlaksatokej ikxiwan in toTajzin Dios. Nion amo xikijtokan tlachixtok in weyikan de Jerusalén nik melawak tlan ankijtaj, porke in toweyi Rey Dios yen yon iweyikan. **36**Nion amo xikijtokan tlachixtok namotzontekon nik melawak tlan ankijtaj, porke mach welis ankichiwaskej se amotzonkal ma istaya o noso ma tliliwia. **37**Amo ijkón xikchiwakan. Okachi kuale xikijtokan "kuale kaj" o noso "amo", porke tla ankijtoskej Dios tlachixtok, kijtosneki ankichiwiwaj tlan amo kuale, iwan Amo Kuale Tlakatl yen yon kineki xikchiwakan.

Jesús okijtoj amo ma tikinkuepaltikan tla itlaj techtoktiaj

(Lc. 6:29-30)

38'Namejwan ya ankikakej nik ya wejkawitl omijtoj: "Tla akaj teixkopina, ma kixkopinakan yej nojki. Tla akaj tetlanmayawi, ma kitlanmayawikan yej nojki." **39**Pero Nej namechilwia, tla akaj amechtoktia itlaj amo kuale, amo xikkuepaltikan. Sino, tla akaj amechixtlatzinia se lado, xikkawili nojki ma mitzixtlatzini in oksé lado. **40**Tla akaj kineki mitzwikas kan tlaixkomakaj (tlatzonmanaj) para mitzkixtilis motzotzol, xikmaka nojki mokoton. **41**Tla akaj mitznekatoktia xitlamama se kilómetro, tej xitlamama ome kilómetro. **42**Tla akaj mitztlajtlanilia itlaj tlamantle, tej xikmaka. Iwan tla akaj itlaj mitzlanewilia, xiktlaneti.

Xikintlasojtlakan akinmej amechkokoliaj

(Lc. 6:27-28, 32-36)

43'Noijklí ya ankikakej nik ya wejkawitl omijtoj: "Xikintlasojtlá mokni, iwan xikkokoli akin mitzkokolia." **44**Pero Nej namechilwia, xikintlasojtlakan akinmej amechkokoliaj, iwan ximotiotzajtzilikan por yen akinmej amechtlatlalochtiaj. **45**Ijkón namejwan anyeskej antekonewan de namoPapan Dios katlej kajki ilwikak. Porke Yej kichiwa in tonale ma kisa para katlej mach kualtin iwan para katlej kualtin, iwan kichiwa ma kiwi para katlej kichiwaj tlan kuale iwan para katlej kichiwaj tlan amo kuale. **46**Porke in tla namejwan ankintlasojtlaj sanwel katlej amechtlasojtlaj, čtlan welis ankitlaniskej? Asta katlej tlakobraroaj ika impuestos no ijkón kichiwaj. **47**Iwan tla ankintlajpalooaj san yen namokniwan, čankichiwaj itlaj tlan oksekimej mach welij kichiwaj? Asta katlej mach kixmatij Dios no ijkón kichiwaj. **48**Xiekan namejwan ipan melajka ankuaultin tlakaj, ken namoPapan Dios katlej kajki ilwikak Yej ipan melajka kuale tlakatl.

Kenamij se kichiwas ixpan Dios nijuak se kitemakas itlaj

6 'Xikpiakan kuidado nijuak ankichiwaskej tlan kuale, amo xikchiwakan inmixpan tlakaj san para ma kitakan tlan ankichiwaj. Tla ijkón ankichiwaskej, mach welis ankiresibiroskej in tlaxtlawile katlej kitemakas namoPapan Dios katlej kajki ilwikak.

2'Por yonik, nijuak itlaj ankitetliokoliskej amo xiktematiltikan nian nepa, ken kichiwaj in tlakaj katlej ome inmixko. Porke yejwan ijkón kichiwaj itech tiopanmej iwan ipan ojtle, para ma kinmitakan iwan ma tlapoakan kuale de yejwan. Ipan melajka namechilwia, nik in yonmej tlakaj mach ok itlaj tlaxtlawile kiresibiroskej. **3**Nijuak in tej itlaj tiktetliokolis, amakaj ma kímati nion yen moamigo katlej okachi iwan timuika. **4**Tla itlaj tiktemakas xiktemaka san ichtaka. Iwan moPapan Dios katlej kita nochí tlan tikchiwa ichtaka, Yej mitzmakas motlaxtlawil.

Jesús otechmachtij kenik timotiotzajtziliskej

(Lc. 11:2-4)

5'Nijuak amejwan anmotiotzajtziliskej, amo xikchiwakan ken kichiwaj in tlakaj katlej ome inmixko, katlej kiwelitaj motiotzajtziliskej mokejketojkej itech tiopanmej iwan itech eskinajtin de yen ojmej para ma kinmitakan. Ipan melajka namechilwia, nik in yonmej tlakaj mach ok itlaj tlaxtlawile kiresibiroskej. **6**Pero tej, nijuak timotiotzajtzilis, xikalaki mokalijtik, ximokaltzakua iwan ximotiotzajtzili ompa ichtaka inawak moPapan Dios.

Iwan moPapan Dios katlej kita tlan tikchiwa ichtaka, Yej mitzmkas motlaxtlawil.

⁷Iwan níkuak anmotiotzajtziliskej amo san ompa xikkueptokan in tlajtole, ken kichiwaj in tlakaj katlej mach kixmatij Dios, porke yejwan kiyejyekoaj tla san ompa kikueptoskej in tlajtole okachi kinkakilis in Dios. ⁸Amo xikchiwakan ken yejwan, porke namoPapan Dios ya kimati tlan namechpoloa antes de ankitlajtlaniliskej. ⁹Namejwan moneki ximotiotzajtzilikan ijkín:

ToPapan Dios katlej tejwatzin tikaj ilwikak,

Ma nochtin in tlakaj ma mitzyektenewakan.

¹⁰Ma ajsiki in tonale níkuak tikinnawatis nochtin in tlakaj.

Ma mochiwa tlan tkmonekiltia ixko yin tlaltikpak,

ijkón ken tlan tkmonekiltia ma mochiwa ompa ilwikak.

¹¹Xitechmaka axan tlan tikuaskej katlej nochipa ika tipanoskej.

¹²Iwan xitechtlapojojpolwi de totlajtlakol,

ken tejwan noiiki tikintlapojpolwiaj akinmej techtoktiaj tlan amo kuale.

¹³Iwan amo xitechmotekawili ma techtlajtlakolmayawi in Amo Kuale Tlakatl, sino xitechmakixti de inawak.

Timitzlajtlaniliaj in yin porke tejwatzin tiknawatia nochi, tikpia poder, iwan tikpia mawisotlanextle iktlanke (ik tlami). Ijkón ma yeto.

¹⁴Porke tla namejwan antetlapojpolwiaj de nochi tlan amechtoktiaj, namoPapan Dios katlej kajki ilwikak noiiki amechtlapojojpolwis. ¹⁵Pero in tla namejwan amo antetlapojpolwiskej, noiiki namoPapan Dios mach amechtlapojojpolwis.

Jesús otlamachtij kenik se mosawas (ayunarios)

¹⁶Níkuak amejwan anmosawaskej, amo ximoiknotlachaltikan ken kichiwaj in tlakaj katlej ome inmixko, porke yejwan moiknotlachaltiaj para ma kinmitakan nik mosawtokej. Ipan melajka namechilwia, nik mach ok itlaj tlaxtlawile kiresibiroskej. ¹⁷Tej níkuak timosawas, ximixami iwan kuale ximotzijitzikui. ¹⁸Ijkón, mach akaj kimatis kox timosawtok, sanwel kimatis moPapan Dios katlej yetos mowan, iwan moPapan Dios katlej kimati tlan tikchiwa ichtaka, Yej mitzmkas motlaxtlawil.

Ma se kololo rikojoyotl itech ilwikak

(Lc. 12:33-34)

¹⁹Amo xikololokan rikojoyotl ixko yin tlaltikpak, kan tlakuakualo iwan tlapalani, iwan tlachtekij. ²⁰Sino xikololokan rikojoyotl ompa ilwikak,

SAN MATEO 6

kan mach tlakuakualo, iwan mach tlapalani, iwan nion mach tlachtekij.
21Porke kan yetos namorikojyo, ompa yetos noiiki namoyolo.

Itlanex in totlalnakayo

(Lc. 11:34-36)

22'Namoixtololowan ankinpiaj kej se tlanextle para namoanima, iwan tla namoixtololowan kualemej, namoanima kipias tlanextle. 23Pero in tla namoixtololowan mach kualemej por yen tlajtlakole, nochi namoanima yetos ijtk tlatleyualotl. Ijkón kiné, tla namotlanex yomokuepke tlatleyualotl itech namoanima por yen tlajtlakole, kijtosneki ankatej itech se weyi tlatleyualotl iwan mach onkaj oksé tlatleyualotl ijkón.

In toTajtzin Dios iwan rikojyotl

(Lc. 16:13)

24'Mach akaj tlakatl welis kinpias ome itekowan, porke welis kitlasoijtas in se iwan oksé mach kitlasoijtas, o noso welis kitlakitas in se iwan oksé mach kitlakitas. Mach welis ankitekipanoskej in Dios mientras amechyoltilantok in rikojyotl.

Amo se ma motlanemililti

(Lc. 12:22-31)

25'Por yonik namechilwia, amo ximotlanemililtikan por tlan ankikuaskej o noso tlan ankoniskej para anyolitoskej, nion amo ximotlanemililtikan por tlan ankonakiskej. ¿Amo ankimatiij nik in tonemilis okachi ipatij ke totlakual? ¿Amo ankimatiij noiiki nik in totlalnakayo okachi ipatij ke tlan tikonakiaj? 26Xikinmitakan in totomej katlej patlantinemij. Mach tookaj, mach pixkaj, iwan nion mach itlaj kitlaatiaj ijtk kueskomatl. Pero namopapan katlej kajki ilwikak Yej kintlamaka. Iwan namejwan okachi amopatiij iwan amo ken totomej. 27Tla akaj de amejwan sa tekitl tlanemilia porke kineki moskaltis ok tlajko metro, ¿kox welis moskaltis?

28'¿Tlanik namejwan wel anmotlanemililtiaj por tlan ankonakiskej? Xikitakan kenik moskaltiaj in xochimej ipan tepetl. Mach tekipanoaj iwan nion mach tlajtzomaj. 29Pero Nej namechilwia ke nion rey Salomón mach semi omotzotzoltij ken se de yon xochitl maski omotzotzoltiaya ika katlej okachi kuale itzotzol. 30Iwan tla Dios ijkón kitlakentia in xochitl katlej axan kajki ipan tepetl iwan mostla wiptla mochichinos ijtk tlitl, ¿kenik amo ma amechezotzolti namejwan? iNamejwan wel tzikitzin namotlaneltokalis! 31Amo ximotlanemililtikan kiné, amo xikmolwikan: "¿Tlan tikkuaskej? o noso ¿tlan tikoniskej? o noso ¿tlan tikonakiskej?" 32Nochi in yin tlamantle ika motlanemililtiaj in tlakaj katlej mach kixmatij

Dios. Pero namejwan ankipiaj namoPapan katlej kajki ilwikak katlej ya kimati tlan amechpoloa. ³³Por yonik, namejwan achtoj xikchiwakan tlan Dios amechnawatia ipan namoyolo para xikchiwakan ken Yej kineki. Iwan ijkón Dios amechmakas noijki nochí yon tlamantle. ³⁴Ijkón kiné, amo ximotlanemililtikan por yen mostla, porke mostla welis oksemi anmotlanemililtiskej. Kada tonale yipa ankipiaskej tlan ika anmotlanemililt iskej.

Amo ma se tepojpoa

(Lc. 6:37-38, 41-42)

7 ¹Amo xikinpojpoakan oksekimej, para namejwan noijki amo ma amechpojpoakan. ²Porke tla antepojpoaskej namejwan noijki amechpojpoaskej. Porke Dios amechtoktis ijkón ken namejwan antetoktiaj. ³¿Kenik in tej weli tikistlakawia in mokni por yen tlajtlakole tlan kichiwa, iwan tej mach timota nik tikaj okachi titlajtlakolej? ⁴Iwan, ¿kenik weli tikilwia in mokni: “Mach ok xitlajtlako”, iwan tej tikchijtok miek tlajtlakole? ⁵¡Teixkajkayaj! Achtoj tej xikkawa in tlajtlakole katlej miek tikchijtok, iwan ijkón welis tikilwis in mokni mach ok ma tlajtlako.

⁶Itlajtol in Dios katlej chipawak amo xikinmakakan in tlakaj katlej kipiaj mach kuale inyolo. Porke yon kej yeskia ankinmakaj in chichimej ma kikuakan tlan Dios iaxka, iwan noijki kej yeskia ankinmakaj in pitzomej ma kikuakan se tlamantle katlej sa tekitl patíoj. Porke yejwan san ipan tlajtlaksaskej iwan welis mokuepaskej amotech iwan amechkuaskej.

Dios techmakas tlan tiktlajtlaniliskej

(Lc. 11:9-13; 6:31)

⁷Xiktlajtlanilikan Dios tlan amechpoloa, iwan Yej amechmakas. Xiktemokan tlan amechpoloa, iwan ankajsiskej. Xiktatalatzakan puerta, iwan Dios amechtlatlapolis. ⁸Porke akin itlaj kitlajtlani, kiresibiroa. Iwan akin itlaj kitemoa, kajsi. Iwan akin kitatalatza in puerta, kitlatlapoliaj.

⁹¿Welis tikmakas mokone se tetl nijuak mitztlajtlanilis se pan? ¹⁰¿O noso welis tikmakas se koatl nijuak mitztlajtlanilis se michin? ¹¹Iwan tla namejwan katlej mach ankuaultin ankimati ankinmakaj namopilwan tlan kuale, ¿amo ankineltokaj nik in namoPapan katlej kajki ilwikak welis kinmakas itlaj tlan kuale akinmej kitlajtlaniliskej?

¹²Ijkón kiné, namejwan xikinchiwilikan oksekimej ijkón ken namejwan ankinekij ma amechchiwilikan. Nochi in tlanawatile de Moisés iwan nochí tlan okijkuijlojkej in profetajtin yen yon tlan kijtaj xikchiwakan.

Puerta katlej kopichtik
(Lc. 13:24)

13'Xikalakikan itech puerta kopichtik katlej yawi ilwikak. Porke in puerta katlej kuyawak iwan ojtle katlej patlaktik tewikaj kan tlaixpolojkan, iwan miekej tlakaj yawij ipan yon ojtle. **14'**Pero sa tekitl kopichtik in puerta iwan sa tekitl pitzaktzin in ojtle katlej tewikaj itech nemilistle, iwan mach miekej kajsij.

Se kuawitl mixmati por yen itlakilo
(Lc. 6:43-44)

15'Xikpiakan kuidado de nekatej tlakaj teixkajkayajkej katlej mochiwaj tlapoaj de Dios. Yejwan motaj kej kualtin tlakaj, pero mach melawak, motaj kej ichkamej pero yejwan katej kej kojomej. **16'**Namejwan welis ankinmixmatiskej kuale por yen tlan kichiwaj. Porke mach moteki uvas itech witztle, iwan nion mach moteki igos itech nojpale. **17'**Nochi tlatoktle kuale kitemaka kuale itlakilo, pero in tlatoktle katlej mach kuale noiiki kitemaka itlakilo mach kuale. **18'**Se tlatoktle kuale mach kitemaka itlakilo mach kuale, iwan se tlatoktle katlej mach kuale mach weli kitemaka itlakilo kuale. **19'**Nochi tlatoktle katlej mach kitemaka kuale itlakilo, se kitzonteki iwan se kitlamotla ijlik tlitl. **20'**Ijkón kiné, namejwan welis ankinmixmatiskej kuale por yen tlan kichiwaj.

Mach nochtin kalakiskej ilwikak kan Dios tlanawatia
(Lc. 13:25-27)

21'Miekej tlakaj nechilwiaj: “Señor, Señor”, pero mach nochtin kalakiskej ilwikak kan Dios tlanawatia. Sino kalakiskej san yejwan katlej kichiwaj tlan kimonekiltia in noPapan katlej kajki ilwikak. **22'**Miekej nechilwiskej itech nekáj tonale: “Señor, Señor, ¿amo tikelnamiki nik in tejwan otitetlapowijkej ika motoka, iwan ika motoka otikinkixtijkej demoniojtin, iwan ika motoka otikinchijkej miekej milagrostin?” **23'**Ijkuakón Nej nikinmilwis: “Mach semi onamechixmatke. Ximachiwakan de Nej, tlajtlakolejkej.”

Omen tlakaj okichijkej inkalwan
(Lc. 6:47-49; Mr. 1:22)

24'Ijkón kiné, akin kikaki iwan kichiwa tlan nikijta, yon ken se tlakatl ixtlamatke katlej okichij ikal ipan tepejxitl. **25'**Owalaj se tlamawisolkiawatl, iwan otlatlawitonke ik nian nepa, iwan chikawak oehekak, iwan mach owetzke in yon kale porke kajki ipan tepejxitl. **26'**Pero akin nechkaki iwan amo kichiwa tlan nikijta, yon ken se tlakatl katlej mach kimati tlakaki

iwan okichij ikal ijlik xale. ²⁷Owalaj se tlamawisolkiaawatl, otlatlawitonke ik nian nepa, iwan chikawak oejekak, iwan kale owetzke iwan nochitxinke.

²⁸Nijuak Jesús otlanke okintlapowij, nochtin in tlakaj sa otlajtlachixkej (omomajmawtijkej) de kenik okinmachtiaya. ²⁹Porke otlamachtiaya ika chikawak tlanawatile, iwan amo ken otlamachtiayaj in tlamachtijkej de itlanawatil in Moisés.

Jesús okipajtij se tlakatl katlej opalania inakayo

(Mr. 1:40-45; Lc. 5:12-16)

8 Nijuak Jesús otemok de ipan tepetl, miekej tlakaj oyajkej Iwan.
²Ijkuakón omijkuanij inawak Jesús se tlakatl katlej opalania inakayo, omotlankuaketzke iyakapan iwan okilwij:

—Señor, tla tkmonekiltiani, welini tinechpajtiani.

³Jesús okitlalij ima ipan yon tlakatl iwan okilwij:

—Nej nikneki xipajti.

Iwan san niman opajtik de ikokolis. ⁴Iwan Jesús okilwij:

—Xikkaki, amakaj itlaj xikilwi. San xiwiá inawak in tiopixke, iwan xiktemaka moofrenda tlan Moisés otlanawatij ma motemaka, para ijkón nochtin ma kimatikan nik in Dios yomitzpajtij de mokokolis.

Jesús okipajtij itekipanoj se kapitan

(Lc. 7:1-10)

⁵Nijuak Jesús okalakke itech pueblo de Capernaum, ijkuakón se kapitan omijkuanij inawak Jesús, iwan okitlatlawtij. ⁶Okilwij:

—Señor, notekipanoj kajki nokalijtik mokokoa, owijwilantik iwan sa tekitl wapawiswilo.

⁷Jesús okinankilij:

—Ompa niawi nikpajtiti.

⁸In kapitan okilwij:

—Señor, mach notech powi xikalaki nokalijtik. Iwan mach moneki xiwiá asta ompa, san nian xikijto ma pajti iwan notekipanoj pajtis. ⁹Yon nej kuale nikmati. Porke nej noiiki nimomatok nikintlakita notlayekankej. Iwan noiiki nikinpia soldadojtin katlej nechtlakitaj. Iwan tla nikilwis se de yejwan: “Xiwiá ne”, in yej yawi. Iwan tla nikilwis oksé: “Xiwiki”, in yej witz. Iwan tla nikilwis in notekipanoj: “Xikchiwa yin tekitl”, in yej kichiwa.

¹⁰Nijuak ijkón okikakke in Jesús, sa otlajtlachixke (omomajmawtij), iwan okinmilwij in tlakaj katlej Iwan oyayaj:

—Ipan melajka namechilwia, nik mach nikajsi nion se judío katlej kipia weyi itlaneltokalis ken yin tlakatl. ¹¹Iwan namechilwia nik witzej miekej

SAN MATEO 8

tlakaj de ik ikisayan tonale iwan de ik ipoliwian tonale, iwan motlaliskej tlakuaskej iwan Abraham, iwan Isaac, iwan Jacob, ompa ilwikak kan Dios tlanawatia. ¹²Pero miekej judiojtin katlej Dios okinekia ma kalakikan ompa kan Yej tlanawatia, yeskej kalan ijtk tlatleyualotl. Ompa chokaskej iwan motlanteteyitzaskej.

¹³Ijkuakón Jesús okilwij in kapitan:

—Xiwia mochan, iwan ma mochiwa ijkón ken tej tikneltoka.

Iwan san niman ijkuakón opajtik itekipanoj in kapitan.

Jesús okipajtij imonan in Pedro

(Mr. 1:29-31; Lc. 4:38-39)

¹⁴Jesús oyáj ichan Pedro, iwan okitajsik imonan in Pedro wetok ipan itlapech kipia totonik. ¹⁵Jesús okimakitzkij imonan in Pedro, iwan in totonik okiske. Imonan Pedro omejke iwan okintlamakak.

Jesús okinpajtij miekej kokoxkej

(Mr. 1:32-34; Lc. 4:40-41)

¹⁶Nijuak owaltlatleyuak okinwikilijkej in Jesús miekej tlakaj katlej okipiayaj ejekamej mach kualtin. Iwan san ika se tlajtole okinkixtij in yonmej ejekamej, iwan noijki okinpajtij nochtin katlej omokokoayaj. ¹⁷Ijkón otlapanok para ma mochiwa tlan okijtoj in profeta Isaías, nijuak okijtoj: “Yej otechpajtij de tokokolis iwan otechpojpolilij in tokualolis.”

Katlej kinekij nemiskej iwan Jesús

(Lc. 9:57-62)

¹⁸Nijuak Jesús okitak opéj kiyawaloaj miekej tlakaj, ijkuakón okinnawatij imomachtijkawan ma panokan oksé lado de yen lago. ¹⁹Iwan ijkuakón omijkuanij inawak Jesús se tlamachtij itech tlanawatile de Moisés, iwan okilwij:

—Tlamachtij, nikneki nimitzwikas san kan Tej tias.

²⁰Jesús okinankilij:

—In ostomej kipiaj inkuyok, iwan totomej kipiaj intepajsol, pero Nej katlej onimochij nitlakatl mach nikpia kan nimosewis.

²¹Oksé de yen imomachtijkawan noijki okilwij:

—Señor, xinechkawili achtoj ma niktookati nopapan.

²²Jesús okinankilij:

—Xiliki nowan, xikinkawa katlej mach nechneltokaj yejwan ma kintookakan inmikkawan.

Jesús okiketzaltij in ejekatl iwan atl

(*Mr. 4:35-41; Lc. 8:22-25*)

23 Jesúś otlejkok itech se barko, iwan imomachtijkawan oyajkej Iwan.

24 Ijkuakón opéj ejeka chikawak iwan atl opéj motlatlamotla ipan barko iwan oatemiaj. Pero Jesúś okochtoka.

25 Tones imomachtijkawan okijxitijkej, iwan okilwijkej:

—iSeñor, xitechmakixti! ¡Tiapolakij!

26 Yej okinnankilij:

—¿Tlanik wel anmomawtiaj? Namejwan wel tzikitzin namotlaneltokalis.

Ijkuakón, omoketzke, okajwak in ejekatl iwan atl, iwan san niman omokaj sa tlamantok. **27** Imomachtijkawan sa otlajtlachixkej (omomajmawtijkej). Iwan okijtojkej:

—¿Akin yin tlakatl, porke asta yen ejekatl iwan atl kitlakitaj?

In gadarenostlakaj katlej okipiayaj ejekamej mach kualtin

(*Mr. 5:1-20; Lc. 8:26-39*)

28 Níkuak Jesúś oajsito oksé lado de yen lago, itech tlale de pueblo de Gadara, ijkuakón omen tlakaj katlej okipiayaj ejekamej mach kualtin owalkiskej de kan mikkakuyoktin iwan omíkuanijkej inawak Jesúś. Oyekaj sa tekitl temajmawtijkej iwan mach akaj owelia opanoaya ipan yon ojtle.

29 Níkuak okitakej in Jesúś, otzajtikej, iwan okijtojkej:

—¡Amo ximokalaki towan, Jesúś, teKone de Dios! ¿Otiwalaj nian para titechtlajyowiltis antes de ajsiki in tonale?

30 Iwan mach wejka de ompa, oyekaj miekej pitzomej otlakuajtokaj.

31 Iwan ejekamej mach kualtin okitlatlawtijkej in Jesúś:

—Tla titechkixtis de intech yinmej tlakaj, tones xitechkawili ma tikalakikan intech nekatej pitzomej.

32 Jesúś okinmilwij:

—Xiwian kiné.

In ejekamej mach kualtin okiskej de intech yonmej tlakaj iwan okalakej intech nekatej pitzomej. Iwan san niman ijkuakón nochtin in pitzomej omotlalojkej iwan omotepejxiwitoj asta ijtk atl, iwan ompa omoatlanwijkej iwan omikkej.

33 In tlajpixkej de yonmej pitzomej ocholojkej. Iwan níkuak oajsikej itech pueblo opéj kitematiltiaj nochí tlan otlapanok iwan de yen tlakaj katlej okipiayaj ejekamej mach kualtin. **34** Satepan nochtin in tlakaj de yon pueblo oyajkej kan oyeka in Jesúś, iwan níkuak okitakej okitlatlawtijkej ma wia de ompa de itech intlal.

Jesús okipajtij se tlakatl katlej owijwilantik (otemetlatik)

(*Mr. 2:1-12; Lc. 5:17-26*)

9 Jesús otlejkok itech se barko, opanok oksé lado de yen lago, iwan oajsito itech pueblo de Capernaum kan Yej ochantia. **2**Ompa oajsikoj sekimej tlakaj katlej okualwikiliayaj in Jesús se tlakatl ipan itlapech katlej owijwilantik. Iwan nikuak Jesús okitak intlaneltokalis in yonmej tlakaj, ikuakón okilwij in kokoxke:

—Ximoyolojchikawa, nokone. Nimitzlapojpolwia de nochí motlajtlakol.

3Pero sekimej tlamachtijkej de itlanawatil in Moisés okiyejyekojej: “Yin tlakatl tlajtoa biero de Dios.” **4**Pero Jesús okimomakak kuenta de tlan okiyejyekoayaj, iwan okinmilwij:

—¿Tlanik namejwan mach kuale tlan ankiyejyekoaj? **5**¿Katlij yen okachi mach owij nikilwis in kokoxke: “Nimitzlapojpolwia de nochí motlajtlakol”, o noso nikilwis: “Ximewa, iwan xinejnemi”? **6**Pero xikmatikan nik in Nej katlej onimochij nitlakatl, nikpia poder ixko yin tlaltikpak para nitetlapojpolwis itech tlajtlakole.

Iwan ikuakón okilwij in tlakatl katlej owijwilantik:

—Ximewa, xikajkokui motlapech iwan xiwia mochan.

7Tones in yej omoketzke iwan oyáj para ichan. **8**In tlakajtin nikuak ijkón okitakej, sa otajtlachixkej (omomajmawtijkej) iwan okiweyikixtijkej in toTajzin Dios por okinmakak in tlakaj ipoder ijkón ken Jesús okimakak.

Jesús okinotzke in Mateo

(*Mr. 2:13-17; Lc. 5:27-32*)

9Jesús okiske de ompa, okitak se tlakatl itoka Mateo oewatoka kan yej otlakobrarojtoka ika impuestos. Iwan Jesús okilwij:

—Xiwiki nowan.

Tones in Mateo omoketzke iwan oyáj iwan Jesús.

10Itech se tonale, Jesús otakuajtoka ichan Mateo inwan miekej katlej tlakobraroaj ika impuestos, iwan sekimej tlajtlakolejkej. Nochtin yejwan ovalajkej omothalijkej san sekan iwan Jesús iwan imomachtijkawan.

11Nikuak in fariseos ijkón okitakej, okinmilwijkej in momachtijkej:

—¿Tlanik namotlamachtij tlakua inwan tlakaj tlajtlakolejkej iwan noijki tlakua inwan tlakaj katlej tlakobraroaj ika impuestos?

12Jesús okikakke iwan okinmilwij:

—In tlakaj katlej mach mokokoaj mach intech moneki tepajtij, sino intech moneki yen katlej mokokoaj. **13**Ximomachtikan tlan kijtosneki in tlajtole katlej ikuilitok itech tiotlajkuilole: “Nikneki xiteiknomatikan, mach nikneki xinechinmiktilikan yolkamej para ika annechweyikixtiskej.”

Nej mach oniwalaq onikinnotzako katlej yolchipawakej, sino oniwalaq onikinnotzako katlej tlajtlakolejkej para ma moyolkuepakan inawak Dios.

Jesús okitlajtlanijkej tlanik san sekimej mosawaj iwan oksekimej amo

(*Mr. 2:18-22; Lc. 5:33-39*)

14 Imomachtijkawan in Juan Tlakuateekij omijkuanijkej inawak Jesús iwan okitlajtlanijkej:

—Tejwan iwan fariseos timosawaj (tiayunaroaj) miekpa, c̄tlanik momomachtijkawan mach mosawaj?

15 Jesús okinnankilij:

—¿Kox welis moyolkokoskej iinbitadoswan in novio nijuak yej inwan yetos? Pero ajsis tonale nijuak in yej mach ok inwan yetos, iwan ijkuakón welis moyolkokoskej iwan mosawaskej.

16 'Mach akaj kiyektlalia se tzotzole katlej ya tlajtlantok iwan kitilichoa ika se pedaso tzotzole yankuik, porke in tzotzole yankuik mololoa iwan kitzayana in tzotzole katlej ya tlajtlantok, iwan okachi tzayani. **17** Nion mach se kitlalia vino yankuik ijtik kulambre katlej ya tlajtlantok. In vino yankuik kitzomonia in kulambre katlej ya tlajtlantok, iwan vino iwan kulambre parejo ijtakawij. Por yonik, in vino yankuik moneki motlalis ijtik kulambre yankuik, para ijkón san ken omen ma tlaxikokan.

Ichpoch in Jairo iwan siwatl katlej oestlapowik

(*Mr. 5:21-43; Lc. 8:40-56*)

18 Iwan nijuak Jesús okintlapowijtoka in tlakaj de yon tlajtole, ijkuakón owalaj se tlayekanke judío, omotlankuaketzke iyakapan Jesús iwan okilwij:

—Nochpoch yakin tlami omikke. Pero tla tejwatzin tias iwan tla ipan tikintlalis momawan, moyolkuis (moyolitis).

19 Jesús omoketzke, oyáj iwan yon tlakatl iwan imomachtijkawan.

20 Ijkuakón se siwatl katlej yokipiaya majtlakte iwan ome xiwitl de oestlapowik, omijkuanij ik ikuilapan in Jesús iwan okitzkilij itzotzol san itempantzin. **21** Porke okimolwij: “Tla siera najsis niktlakenkitzkis, welis nipajtis.” **22** Pero Jesús omokuepke, okitlatak in siwatl iwan okilwij:

—Ximoyolojchikawa, nokone, yotipajtik porke otinechneltokak.

Iwan san niman ijkuakón opajtik in siwatl.

23 Nijuak Jesús oajsito ichan tlayekanke judío, okinmitak in tlapitzkej yomoyektlalijkej para kitookatiwej in ichpochtle, iwan in tlakaj okuawtzajtziq ika chokilistle. **24** Jesús okinmilwij:

—Xikisakan de nian, yin ichpochtle mach ya miki, sino yej kochi.

In tlakaj okiwewetzkilijkej in Jesús. ²⁵Pero Yej okinkixtij. Ijkuakón okalakke iwan okimakitzkij in ichpochtle, iwan ichpochtle omejke. ²⁶Iwan itech nochí nekáj país okimatkej de tlan otlapanok.

Jesús okinpajtij omen tlakaj katlej mach tlachiaj

²⁷Nijuak Jesús okiske de ompa, omen tlakaj katlej mach tlachiaj ikuilapan oyajkej tzajtzitiwej:

—iXitechiknomati tejwatzin, tekone de David!

²⁸Nijuak Jesús okalakke kalijtik, in tlakaj katlej mach tlachiaj omikuaniijkej inawak Jesús, iwan Jesús okintlajtlanij:

—¿Ankineltokaj namejwan nik welis namechpajtis?

Yejwan okijtojkej:

—Tikneltokaj, Señor.

²⁹Toneses Jesús okintlalij imawan ipan inmixtololowan, iwan okinmilwij:

—Ma mochiwa ijkón ken namejwan ankineltokaj.

³⁰Iwan san niman ya kuale otlachixkej. Iwan Jesús okinnawatij:

—Amakaj ma kinati de kenik anpajtikej.

³¹Pero niman nijuak okiskej, opéj tetlapowiaj itech nochí in yon región de tlan Jesús okichij.

Jesús okipajtij se tlakatl nontzin

³²Nijuak okiskej in yonmej tlakaj katlej mach otlachiayaj, ijkuakón oksekimej tlakaj okiwilikijkej in Jesús se tlakatl nontzin katlej okipiaya se ejekatl mach kuale. ³³Nijuak Jesús okikixtij in ejekatl mach kuale, in tlakatl nontzin opéj tlajtoa. In tlakaj sa otlajtlachixkej (omomajmawtijkej), iwan okijtoayaj:

—iMach semi otikitayaj yin tlamantle itech yin país de Israel!

³⁴Pero in fariseos okijtoayaj:

—Yin tlakatl kinkixtia mach kualtin ejekamej ika ipoder in tlayekanke demonio.

Onkaj miek pixkale

³⁵Jesús onemia itech nochtin weyikantín iwan pueblotín, iwan otlamachtiaya itech intiopanwan in judiojtín de kada lugar. Okitematiltiaya in kuale tlajtole katlej temakixtia de kenik in Dios tlanawatia, iwan okinpajtiaya de nochí kokolistle iwan de nochí kualolistle. ³⁶Nijuak okinmitak in tlakaj, okinmiknomaj, porke oyekaj kej iknamej iwan mach okimatiy় tlan kichiwaskej, oyekaj kej ichkamej katlej mach kipiaj tlajpixke. ³⁷Ijkuakón okinmilwij imomachtijkawan:

—Katej miekej tlakaj katlej moneki kikakiskej notlajtol, pero mach katej miekej katlej kitematiltiaj notlajtol. Kej yeskia onkaj miek tekitl itech pixkale iwan tekipanojkej mach miekej katej. ³⁸Por yonik, xiktlajtlanilikan in Dios katlej iteko yon pixkale ma kintitlani okachi tekipanojkej para ma pixkatij.

Jesús okinpejpenke majtlakte iwan ome itlatitlanilwan

(*Mr. 3:13-19; Lc. 6:12-16*)

10 Jesús okinpejpenke majtlakte iwan ome imomachtijkawan, okinmakak poder para kinkixtiskej ejekamej mach kualtin iwan para tepajtiskej de nochi kokolistle iwan de nochi kualolistle. ²Yinmej yejwan in majtlakte iwan ome itlatitlanilwan katlej okinpejpenke: Achtój in Simón, katlej noijki kinotzaj Pedro, iwan noijki okipejpenke in ikni itoka Andrés. Noijki okinpejpenke in Jacobo iwan ikni Juan, katlej itelpokawan in Zebedeo. ³Noijki okinpejpenke in Felipe, Bartolomé, Tomás, Mateo katlej okololoaya impuestos. Jacobo itelpoch in Alfeo, iwan Tadeo. ⁴Simón katlej onemia iwan cananistas, iwan Judas Iscariote katlej satepan okitemaktij (okitemaktilij) in Jesús.

Jesús okintitlanke majtlakte iwan omen imomachtijkawan para ma tetlapowitij

(*Mr. 6:7-13; Lc. 9:1-6*)

⁵Jesús okintitlanke majtlakte iwan omen imomachtijkawan iwan ijkín okinnajnawatij:

—Amo xiwan kan katej katlej mach judiojtin, nion amo xikalakikan itech pueblojtin de Samaria. ⁶Sino xiwan kan katej in tokniwan judiojtin katlej mopolojtinemij kej ichkamej. ⁷Xiwan, iwan xikinmatiltikan nik yoajsiko in tonale para Dios tlanawatis ipan inyolo in tlakaj. ⁸Xikinpajtikan in kokoxkej, xikinyolitikan in mikkamej, xikinpajtikan katlej nakayopalanij, iwan xikinkixtikan in ejekamej mach kualtin. Namejwan Dios oamechtliokolij ipoder, tones moneki no amo xitlakobrarokan por ankitekipanoltiskej in yon poder.

⁹Amo xikitkikan itlaj tomin, ¹⁰nion amo xikitkikan amotlaxkal para ankikuaskej ipan ojtle, nion amo xikitkikan ome amotzotzol, nion ome pares amokak, nion amokarrotij. Porke akinmej akinpalewiskej yejwan kipiaj de amechmakaskej tlan amechpolos, porke namejwan ankitekipanoaj in Dios.

¹¹Níkuak anmajsiskej itech se weyikan o itech se pueblo, xiktemokan se katlej kuale tlakatl iwan ompa ximokawakan ichan asta ikuak ankisaskej de yon lugar. ¹²Níkuak ankalakiskej kalijtik, xitetlajpalokan. ¹³Tla in

chanejkej kuale amechresibiroaj, Dios kintiochiwas ika yolosewilistle. Pero tla amo amechresibiroaj kuale, Dios mach kinmakas yolosewilistle. ¹⁴Iwan tla amo amechresibiroaj iwan nion amo kinekij amechkakiliskej, xikisakan de yon kalijtik o noso de yon pueblo, iwan ximokxitlaltzejzelokan kej yeskia se señas nik okixpanawijkej in Dios. ¹⁵Ipan melajka namechilwia, ke itech nekáj tonale de tlaixkomakalistle (tlatzonmanalos), intlajyowilis in yonmej tlakaj yetos okachi weyi ke para nekatej tlakaj de Sodoma iwan de Gomorra.

Amechtlatlalochtiskej

¹⁶'¡Kuale xikkakikan! Nej namechtitlani kej amichkamej kan katej koyomej. Xiekan anlistojtin ken koamej, pero xiekan anpasensiajtin ken palomastin iwan amo xitetoktikan tlan amo kuale. ¹⁷Xikpiakan kuidado, porke amechtemaktiskej (omechtemaktiliskej) inmak tekiwajkej, iwan amechwitekiskej itech tiopanmej. ¹⁸Iwan asta amechtemaktiskej inmak gobernadortin iwan inmak reytin por annechneltokaj. Ijkuakón namejwan moneki antlajtoskej de notlajtol inmixpan yonmej tekiwajkej, iwan inmixpan in tlakaj katlej mach judiojtin. ¹⁹Pero nijuak amechtemaktiskej inmak tekiwajkej, amo xitlanemilikan por kenik antlajtoskej o noso tlan ankijtoskej. Porke itech yon ora Dios amechmakas tlajtole tlan ankijtoskej. ²⁰Porke mach amejwan antlajtoskej, sino yen iEspíritu namoPapan Dios katlej tlajtos por amejwan.

²¹In teikni kitemaktis (kitemaktilis) in ikni ma kimiktikan, in tetaj kitemaktis ikone ma kimiktikan, in tepilwan inpan mokuepaskej in tetajmey iwan kintemaktiskej para ma kinmiktikan. ²²Nochtin amechkokoliskej por annechneltokaj. Pero akin kixikos nochí tlan panos, Dios kimakixtis. ²³Nijuak amechtlatlalochtiskej itech se pueblo, xicholokan xiwian itech oksé pueblo. Ipan melajka namechilwia, nik in Nej katlej onimochij nitlakatl niwitz oksemi antes de antlamiskej anyaskej itech nochtin pueblojtin de Israel.

²⁴'Se katlej momachtij mach kipanawilia itlamachtij, iwan se katlej san tekipanoj mach kipanawilia iteko. ²⁵Se katlej momachtij ma paki tla ajsiti ken itlamachtij, iwan se katlej tekipanoj ma paki tla ajsiti ken iteko. Iwan tla Nej, akin nikaj kej nitepapan de familia nechtokayotiaj niBeelzebú, namejwan noijki amechtokayotiskej san tlan amo.

Akin moneki tikimakasiskej

(Lc. 12:2-9)

²⁶'Amo xikinmiimakasikan in tlakaj. Porke nochí tlan tlatitok kipia de nesis, iwan nochí tlan amo momati kipia de momatis. ²⁷Tlan Nej

namechilwia san yen namejwan, xikijtokan inmixpan nochtin. Iwan tlan namechilwia ichtaka, xiktematiltikan kan nochtin kuale ma kikakikan.

28 Amo xikinmiimakasikan in tlakaj katlej kinekij amechmiktiskej, porke mach itlaj welis kitoktiskej namoanima. Xikimakasikan in Dios katlej kipia poder para kixpolos namotlalnakayo iwan para kixpolos namoanima ijtk tliko.

29 ¿Amo monamakaj ome tototzitzintin por se sentabo? Pero nion se de yejwan mach mikis tla namoPapan Dios mach kimonekiltia. **30** Iwan Nej namechilwia namejwan nik in Dios kimati asta keski namotzonkal ankipiaj. **31** Ijkón kiné, amo ximomawtikan. Namejwan okachi anpatiojkej iwan amo ken inpatij miekej tototzitzintin.

Ma se tlajto de Cristo teixpan

(Lc. 12:8-9)

32 Tla akaj kijtos inmixpan tlakaj nik kineltoka nik in Nej nitemakixtij de yej, Nej noijki nikijtos ixpan noPapan katlej kajki ilwikak nik in yej noaxka. **33** Iwan tla akaj kijtos mach nechixmati inmixpan tlakaj, Nej noijki nikijtos mach nikixmati ixpan noPapan katlej kajki ilwikak.

In tlakaj moxexeloskej por yen Cristo

(Lc. 12:51-53; 14:26-27)

34 Amo xikyejyekokan ke Nej oniwalaj para ma yeto yolosewilistle ixko yin tlaltikpak. Mach oniwalaj para namechmakas yolosewilistle, sino in tlakaj moxexeloskej por Nej. **35** Oniwalaj para nikinxixinis in tlakaj. In tlakatl mach motlajtolnamikis iwan ipapan, iwan ichpochtle mach motlajtolnamikis iwan imaman. In siwamontle mach motlajtolnamikis iwan imonan. **36** Se tlakatl welis yeskej ikontraswan mismo yejwan ifamiliareswan.

37 Akin kitlasojtla ipapan o noso imaman okachi ke Nej, mach yetos noaxka. Iwan akin kitlasojtlas itelpoch o noso ichpoch okachi ke Nej, mach yetos noaxka. **38** Iwan akin amo kinekis witz nowan iwan amo kinekis trabajojpanos asta komo para ma kimiktikan itech krus, mach powis noaxka. **39** Akin kinekis kipalewis inemilis, kipolos, pero tla akaj kipoloa inemilis por Nej, kajsis inemilis katlej mach keman tlamic.

Tlatliokoliltin

(Mr. 9:41)

40 Akin namejwan amechresibiroa, Nej nechresibiroa. Iwan akin Nej nechresibiroa, noijki kiresibiroaj akin onechwaltitlanke. **41** Akin kiresibiroa se profeta porke in profeta kitekipanoa in Dios, kimakaskej itlaxtlawil

ijkón ken kimakaj se profeta. Iwan akin kiresibiroa se katlej kuale tlakatl, kimakaskej itlaxtlawil ijkón ken kimakaj se katlej kuale tlakatl. ⁴²Iwan akin kintliokolis siera se xikale atl sesek se de yinmej nomomachtijkawan, ipan melajka namechilwia nik kipias itlaxtlawil.

In Juan Tlakuateekij okintitlanke omen imomachtijkawan inawak Jesús
(Lc. 7:18-35)

11 Níjkuak Jesús otlanke okinnajnawatij in majtlakte iwan ome imomachtijkawan, ijkukón oyáj de ompa para tlamachtis iwan kitematiltis itlajtol in Dios itech pueblojtin de yon regióñ.

²In Juan Tlakuateekij otzaktoka telpiloyan, iwan níjkuak okimatke tlan okichiwaya in Cristo Jesús, ijkukón okintitlanke omen imomachtijkawan inawak Jesús. ³Iwan imomachtijkawan in Juan okitlajtlanijkej in Jesús:

—¿Yen tejwatzin tiCristo katlej Dios techilwijtiwitz kipia de witz o noso ok moneki tikchiaskej ma wiki?

⁴Jesús okinnankilij:

—Xiwian iwan xikilwikan in Juan nochí tlan namejwan ankitakej iwan ankikakej. ⁵Xikilwikan ke katlej mach otlachiayaj axan ya tlachiaj, in koxomej ya kuale nejnemij, katlej opalania innakayo yopajtikej de inkokolis, katlej mach otlakakiaj axan ya tlakakij, in mikkamej moyolkuij, iwan pobrestin kikakij in kuale tlajtole katlej temakixtia. ⁶Ma paki akin amo kipoloa itlaneltokalis nonawak.

⁷Níjkuak imomachtijkawan in Juan oyajkej, ijkukón Jesús opéj kintlapowia in tlakaj de yen Juan Tlakuateekij. Okinmilwij:

—¿Akin anyajkej ankitatoj ne kan tlawaki? ¿Ankitatoj se tlakatl katlej itlaneltokalis kiitki in ejekatl no ken níjkuak in ejekatl kiitki se akatl?

⁸¿Akin kiné ankitatoj? ¿Ankitatoj se tlakatl katlej omotzotzoltiaya ika kuale itzotzol? Namejwan kuale ankitatoj ke katlej kuale motzotzoltiaya ika katej ichan reytiñ. ⁹Pero, ¿akin ankitatoj? ¿Se profeta? Melawak, yej okachi kipanawilia ke se profeta. ¹⁰In tiotlajkuilole tlapoa de yen Juan, kijta:

Nej niktitlani notlatematiltij moyakapan,
ma mitzyektlalili in ojtle.

¹¹Ipan melajka namechilwia, ke asta axan mach onkaj nion se tlakatl katlej okachi kipanawilia in Juan Tlakuateekij. Pero akin okachi tzikitzin de itech ilwikak kan Dios tlanawatia yen okachi weyi ke Juan.

¹²'Desde ijkukón in Juan Tlakuateekij opéj kitematiltia itlajtol in Dios iwan opéj tlakuateekia, in tlakaj mochikawaj kinekij kalakiskej kan Dios tlanawatia. Iwan kalakij sanwel katlej melawak mochijchikawaj. ¹³Asta axan nochtin in profetajtin iwan tlanawatile de Moisés otlapojkej de Cristo

asta ikuak ovalaj in Juan. ¹⁴Iwan tla namejwan ankinelkij ankineltokaskej, Juan yen profeta Elías katlej okipiaya de witz. ¹⁵Akin kipia itlakakilis, ma kikaki.

¹⁶¿Tlan ika welis nikinkompararos in tlakaj de yin tiempo? Yejwan katej ken telpokamej katlej motlalaj mawiltiaj itech tiankistle iwan kintzajtziliaj inmamigoswan, ¹⁷kinmilwiaj: “Mach ijkón nik anmawiltiaj. Tejwan otamechtlapichilijkej para ximijtotikan, pero mach anmijtotijkej. Otamechtlakuikilijkej se tlakuikale teyolkokoj, pero mach ankinelkij anchokakej.” ¹⁸Pues, ovalaj in Juan, katlej omosawaya (oayunaroaya) iwan mach itlaj vino okonia. Iwan namejwan ankijtojkej ke kipia se ejekatl mach kuale. ¹⁹Satepan oniwalaj Nej katlej onimochij nitlakatl, iwan nitlakua iwan nikoni. Iwan namejwan ankijtaj ke nitlakuani iwan nitlawanke, iwan ankijtaj inwan nimuika in tlajtlakolejkej iwan katlej tlakobraroaj ika impuestos. Pero nikuak in Dios akaj kimaka tlalnamikiliste, kimomaka kuenta nik melawak tlan nikchiwa.

Pueblojtin katlej mach tetlakitakej

(Lc. 10:13-15)

²⁰Toneses Jesús opéj kinmistlakawia in tlakaj itech pueblojtin kan okinchij okachi miekj milagrostin, porke in yonmej tlakaj mach omoyolkuepayaj de intlajtlakol. Okijtoj:

²¹—¡Pobre de tej, pueblo de Corazín! ¡Pobre de tej, pueblo de Betsaida! Porke tla itech weyikan de Tiro iwan itech weyikan de Sidón kitanij in milagrostin katlej amejwan ya ankitakej, ya ke tiempo yeskia yomoyolkuepkej. Iwan motzotzoltianij de luto iwan motlikonexwianij, para kiteititianij nik yomoyolkuepkej de intlajtlakol. ²²Pero Nej namechilwia, nik itech nekáj tonale de tlaixkomakaliste (latzonmanalos), namejwan ankipiaskej okachi weyi tlajyowilistle ke in tlakaj de weyikan de Tiro iwan de Sidón. ²³Iwan namejwan de pueblo de Capernaum, ¿ankiyejyekoaj anyaskej ilwikak? ¡Pues amo! Namejwan anyaskej asta tliko. Porke tla in tlakaj de weyikan de Sodoma kitanij in milagrostin katlej amejwan ya ankitakej, yon weyikan yeni asta axan. ²⁴Pero Nej namechilwia, nik itech nekáj tonale de tlaixkomakaliste (latzonmanalos), namejwan ankipiaskej okachi weyi tlajyowilistle ke nekatej tlakaj de región de Sodoma.

Xiwikan nonawak iwan ximosewikan

(Lc. 10:21-22)

²⁵Itech yon tonale, Jesús okijtoj:

—Nimitzonweyikixtia Papan, tejwatzin titlanawatia itech ilwikak iwan ixko yin tlaltikpak. Nimitzweyikixtia porke otikchij amo ma kimomakakan

kuenta tlan kijta motlajtol katlej momachiliaj wel kimatij iwan momachiliaj wel kuale intzontekon, iwan otikinmajsikamatiltij in tlakaj katlej mach moweyinekij. ²⁶Ijkón otikchij, Papan, porke ijkón otikmonekiltij.

²⁷NoPapan onechmaktilij nochí tlamantle. Iwan Nej niiKone mach akaj nechixmati, sino san yej noPapan nechixmati. Iwan mach akaj kixmati noPapan, sino san yen Nej niiKone nikixmati iwan noijsi nekatej tlakaj katlej Nej nikneki ma kixmatikan noPapan. ²⁸Xiwikikan nonawak, aminochtin namejwan katlej antekipanojtokej iwan antlamamajtokej itech tlajyowilistle de tlajtlakole, iwan Nej namechmakas nesewile. ²⁹Xinechmokawilikan ma namechpalewi, iwan xinechmokawilikan ma namechmachti, porke Nej nipasensia iwan mach nimoweyinekke. Ijkón namejwan ankipiaskej nesewile ipan amoanima. ³⁰Porke in tekitl katlej namechmaka mach tesotlaj. Iwan in tlamachtile katlej moneki xikchiwakan yon kej se tlamamale katlej mach etik.

Jesús imomachtijkawan okitekej trigo itech weyi tonale

(Mr. 2:23-28; Lc. 6:1-5)

12 Itech nekatej tonaltin Jesús onejnentiaya kan toktok trigo itech weyi tonale. Imomachtijkawan Jesús opéj tiojsiwij iwan opéj kitekij trigo iwan opéj kikuaj. ²Nijuak in fariseos ijkón okitakej, okilwijkej in Jesús:

—Xikita, momomachtijkawan kitekij in trigo iwan axan weyi tonale, iwan tlanawatile de Moisés kijta mach se ma kichiwa yon itech weyi tonale.

³Pero Jesús okinmilwij:

—¿Amo keman ankileroaj tlan okichij in rey David nijuak in yej iwan ikompañeroswan otiojsijkej? ⁴David okalakke ikalijtik in Dios iwan okikuaj in pan katlej tlatiochiwaloj, katlej mach oyeka para kikuani in David iwan ikompañeroswan, sino san yejwan tiopixkej welis kikuaskej. ⁵¿O noso amo keman ankileroaj tlan kijta itlanawatil in Moisés, nik in tiopixkej tekipanoaj itech weyi tiopan iwan amo mosewiaj itech weyi tonale, iwan yon mach tlajtlakole? ⁶Pero Nej namechilwia nik in Nej akin axan nian nikaj okachi niweyikistok (niweyititok) ke yon weyi tiopan. ⁷Namejwan mach ankimomakaj kuenta tlan kijta in tiotlajkuilole: “Nikneki xiteiknomatikan, mach nikneki xinechinmiktilikan yolkamej para ika annechweyikixtisijkej.” Tla amejwan ankimomakanij kuenta, mach ankintlajtlakolmakanij in tlakaj katlej mach kipiaj tlajtlakole. ⁸Porke Nej katlej onimochij nitlakatl, Nej nikpia de nikijtos tlanon moneki se kichiwas itech weyi tonale.

Jesús okipajtij se tlakatl katlej omawakke

(*Mr. 3:1-6; Lc. 6:6-11*)

⁹Satepan, Jesús oyáj de ompa iwan okalakke itech se tiopan de yen judiojtin. ¹⁰Iwan ompa oyeka se tlakatl katlej omawakke. In fariseos okitemoliayaj in Jesús itlaj tlan ika welis kitilwiskej, iwan okitlajtlanijkej:

—¿Kox techkawilia itlanawatil in Moisés ma tikpajtikan se kokoxke itech weyi tonale?

¹¹Jesús okinnankilij:

—Tla se de amejwan kipia se ichka iwan motepejxiwia ijlik kuyoktle itech weyi tonale, ¿amo anyaskej ankikixtiwej? ¹²Pues, ¿amo okachi ipatij se tlakatl ke se ichka? Por yonik, welis tikchiwaskej itlaj tlan kuale itech weyi tonale.

¹³Tones in Jesús okilwij in tlakatl katlej omawakke:

—Xikmelawa moma.

Iwan níkuak okimelaj, opajtik ima iwan omokaj ya kuale ken oksé ima. ¹⁴In fariseos okiskej de itech intiopan, iwan opéj motlatlalwiaj para kimiktiskej in Jesús.

Jesús okinnawatij in tlakaj amakaj itlaj ma kilwikan akin Yej

¹⁵Níkuak Jesús okimatke, oyáj de ompa, iwan miekej tlakaj oyajkej Iwan. Jesús okinpajtiaya nochtin in kokoxkej. ¹⁶Iwan okinnawatiaya amakaj itlaj ma kilwikan akin Yej. ¹⁷Ijkón otlapanok para ma mochiwa tlan okijtoj in profeta Isaías, níkuak okijtoj:

¹⁸Yin yej notekipanoj, katlej Nej onikpejpenke,
katlej Nej niktlasojtla iwan nipaki por Yej.
Niktlalis noEspíritu itech Yej,
iwan kinmatiltis nochtin in tlakaj de ixko yin tlaltikpak ke kada se
tlakatl nikixkomakas segúñ tlan okichij.

¹⁹Mach momagatinemis, nion mach tzajtzitinemis,
nion mach akaj kikakis itlajtol ipan ojtle.

²⁰Kipias kuale iyolo para nekatej katlej mach chijchikawakej,
iwan kinpalewis katlej yakin mewaj,
asta ikuak ma mochiwa nochitlan kuale ken Yej kineki.

²¹Iwan nochtin in tlakaj de ixko yin tlaltikpak kichiaskej
momakixtiskej inawak.

Jesús kipia poder de toTajzin Dios

(*Mr. 3:19-30; Lc. 11:14-23; 12:10*)

22Satepan okiwikilijkej in Jesús se tlakatl katlej kipia se ejekatl mach kuale, iwan noijki mach tlachia iwan nontzin. Jesús okipajtij in tlakatl iwan ya owelik otlachixke iwan ya owelik otlajtoj. **23**Nochtin in tlakaj sa otlajtlachixkej (omomajmawtijkej), iwan okijtojkej:

—¿Kox yen yin ikone in David katlej Dios okijtoj techwaltitlanilis?

24Pero nijuak in fariseos ijkón okikakej, okijtojkej:

—Yin tlakatl kinkixtia in ejekamej mach kualtin ika ipoder in Beelzebú, in tlayekanke demonio.

25Jesús okimatia tlan okiyejyekoayaj, iwan okinmilwij:

—Tla in tlakaj de se país pewas momijmiktiskej entre yejwan mismo, yon país tlajtlamis. Iwan tla in tlakaj de se pueblo o noso de se familia sa tekitl pewas momagaskej, no mach wejkawitl yeskej san sekan. **26**Ijkón noijki, tla Satanás kikixtis in Satanás, kijtosneki yej mismo momaga. Ipoder mach wejkawas iwan niman pojpoliwis. **27**Namejwan ankijtaj ke Nej nikinkixtia in ejekamej mach kualtin ika ipoder in Beelzebú. Tla ijkón yeni, ¿tonses akin kinmaka poder namomomachtijkawan para kinkixtiaj in ejekamej mach kualtin? Yejwan kiné ma kijtokan kox melawak o noso amo tlan namejwan annechilwiaj. **28**Pero Nej nikinkixtia in ejekamej mach kualtin ika ipoder iEspíritu in toTajzin Dios, iwan yon kijtosneki nik in Dios ya peva tlanawatia amonawak.

29¿Welis akaj kalakis ichan se tlakatl katlej chikawak iwan kichtekilis tlan kipia, in tla amo achtoj kijilpia? Solamente tla kijilpis welis kitlachtekis.

30Akin amo kajki nowan, kajki kontra Nej. Iwan akin amo nowan kinpixka animajtin, san kinmamayawi.

31Por yonik namechilwia, nik in Dios kintlapojpolwis in tlakaj de nochitlajtlakole iwan de nochitlan amo kuale kijtoskej, pero tla tlapoaskej biero de yen Espíritu Santo, Dios mach kintlapojpolwis. **32**Iwan tla akaj tlajtos kontra Nej katlej onimochij nitlakatl, Dios welis kitlapojpolwis, pero akin tlajtos biero de yen Espíritu Santo, Dios mach kitlapojpolwis, nion axan ixko yin tlaltikpak iwan nion satepan nijuak yopanok in yin tlaltikpak.

Se kuawitl moixmati por yen itlakilo

(*Lc. 6:43-45*)

33Se katlej kuale kuawitl, kitemaka itlakilo kuale. Iwan tla in kuawitl mach kuale, noijki kitemaka itlakilo mach kuale. Porke in kuawitl moixmati por yen itlakilo. **34**iNamejwan kej ankoamej! Mach ankuaultin, ¿kenik welis ankijtoskej itlaj tlan kuale? Porke tlan kijta se tlakatl ika iten

SAN MATEO 12

kisa de tlan tentok ipan iyolo. ³⁵Se kuale tlakatl kijta tlan kuale porke ipan iyolo onkaj tlan kuale, iwan se tlakatl mach kuale kijta tlan amo kuale porke ipan iyolo onkaj tlan amo kuale. ³⁶Pero Nej namechilwia ke itech nekáj tonale de tlaixkomakalistle (tlatzonmanalos), nochtin namejwan ankitemakaskej kuenta de nochí tlajtote tlan amo kuale katlej ankijtojkej. ³⁷Ijkón kiné, ika namotlajtol katlej kuale mach amechnatlakolmakaskej, pero ika namotlajtol katlej mach kuale ika amechnatlakolmakaskej.

Okitlajtlanilijkej in Jesús se weyi milagro

(Mr. 8:12; Lc. 11:29-32)

³⁸Ijkuakón sekimej fariseos iwan tlamachtijkej de itlanawatil in Moisés, okilwijkej in Jesús:

—Tlamachtij, tiknekij tikitaskej xikchiwa se milagro kej se señas nik in Tej melawak tiwitz de Dios.

³⁹Jesús okinnankilij:

—Namejwan mach ankualtin iwan mach ankitlakitaj in Dios. Iwan axan ankinekij ma nikchiwa se milagro para annechneltokaskej. Pero mach namechmakas oksé milagro, sino san yen milagro tlan opanok in profeta Jonás. ⁴⁰Porke ijkón ken Jonás oyeka eyi tonale iwan eyi yuale ijlik se weyi michin, ijkón noijki in Nej katlej onimochij nitlakatl nietos ijlik tlale eyi tonale iwan eyi yuale. ⁴¹In tlakaj de Nínive omoyolkuepkej nikuak in Jonás okintlapowij de tlajtol in Dios. Iwan itech nekáj tonale de tlaixkomakalistle (tlatzonmanalos) yejwan kinmixkomakaskej in tlakaj de yin tiempo, porke mach omoyolkuepkej, maski onikintlapowij de tlajtol in Dios, iwan Nej okachi niweyikistok (niweyititok) ke Jonás. ⁴²Iwan in reina katlej ovalaj de ik tlani kan okachi wejka de ixko yin tlaltikpak para kikakilis iixtlamachilis in rey Salomón, yej noijki itech nekáj tonale de tlaixkomakalistle (tlatzonmanalos) kinmixkomakas in tlakaj de yin tiempo, porke mach kinekij nechkakiliskej, iwan Nej okachi niweyikistok (niweyititok) ke Salomón.

In ejekatl mach kuale katlej walmokuepa

(Lc. 11:24-26)

⁴³Nikuak se ejekatl mach kuale kisa de itech se tlakatl, nemí kan tlawaki kitemojtinemi kan mosewis. Iwan tla amo kajsis, kimolwia:

⁴⁴“Nimokuepas oksemi itech nekáj tlakatl kan onikiske.” Iwan nikuak walmokuepa, kajsitaksi in yon tlakatl kej se kale kan mach akaj chantí, tlachipawkan iwan tlayektlalitok. ⁴⁵Satepan yawi kinnotzatij oksekimej chikomen ejekamej okachi bierojkej ke yej, iwan nochtin yawij mochantitiwej itech yon tlakatl, iwan satepan yon tlakatl mokawa okachi

pior ke antes. Ijkón nojki mochiwaskej in tlakaj katlej mach kualtin de yin tiempo.

Imaman iwan ikniwan in Jesús

(*Mr. 3:31-35; Lc. 8:19-21*)

46 Jesús ok okintlapowijtoka in tlakaj, iwan ijkuakón oejkokej imaman iwan ikniwan. Omokajkej kalan, iwan okinekiaj motlapowianij Iwan.

47 Ijkuakón se tlakatl okilwij in Jesús:

—Momaman iwan mokniwan katej kalan mitznotzaj.

48 Pero Yej okinankilij:

—¿Akin nomaman, iwan akinmej nokniwan?

49 Ijkuakón Jesús okinmajpilwij imomachtijkawan, iwan okijtoj:

—Yinmej yejwan nomaman iwan yejwan nokniwan. **50** Porke akin kichiwa tlan kimonekiltia noPapan katlej kajki ilwikak, yen yon nokni tlakatl, yen yon nokni siwatl, iwan yen yon nomaman.

Ejemplo de se tlakatl tlatoookak

(*Mr. 4:1-9; Lc. 8:4-8*)

13 Yon tonale Jesús okiske kalijitik iwan omotlalito itempan lago. **2** Iwan komo omololojkej miekej tlakaj kan Yej oyeka, okachi kuale in Jesús otlejkok itech se barko iwan ompa ipan omotlalij, iwan nochtin in tlakaj omokajkej atlatentle. **3** Ijkuakón okinmachtij miek tlamantle ika ejemplos. Okijtoj:

—Se tlakatl okiske otookato. **4** Iwan nijuak otookatoka, sekin semiya owetzke ipan ojtle. Toneses ovalajkej in totomej iwan okikuajkej. **5** Oksekin semiya owetzke ijlik teyoj, kan mach oyeka miek tlale. Yon semiya okiske totoka porke mach wejkatlan oyeka in tlale. **6** Pero nijuak okiske in tonale, okichichinoj, iwan komo mach okipiaya wejkatlan inelwayo, owakke. **7** Oksekin semiya owetzke itzalko in bierojxiwitl, omoskaltij okachi miek yon bierojxiwitl, iwan tlatoktle oxiwmikke. **8** Pero oksekin semiya owetzke kan kuale tlale, iwan otlakke. Sekin tlatoktle okitemakak san de se semiya se siento itliolo, iwan oksekin okitemakak eyinfoale itliolo, iwan oksekin okitemakak senpoale iwan majtlakte itliolo. **9** Tla ankinekij ankimomakaskej kuenta, xikkakikan.

Por tlanik otlamachtij ika ejemplos

(*Mr. 4:10-12; Lc. 8:9-10*)

10 Toneses imomachtijkawan in Jesús omijkuanijkej inawak iwan okitlajtlanijkej:

—¿Tlanik tikintlapowia in tlakaj ika ejemplos?

11Yej okinnankilij:

—Namejwan Dios amechkawilia xikmatikan tlan oyeka tlatitok de kenik Dios tlanawatia ompa ilwikak. Pero Dios mach kinkawilia yejwan ma kimatikan. **12**Porke akin kinekis moskaltis okachi itech itlajtol in Dios, moskaltis okachi. Iwan katlej amo kinekis, kipolos asta tlan ya kinati. **13**Por yonik nikintlapowia ika ejemplos, porke maski kitaj tlan nikchiwa iwan maski kikakij tlan nikijta, yejwan mach kimomakaj kuenta. **14**Ijkón, mochiwa itech yejwan tlan okijtoj in profeta Isaías:

Namejwan ika amotlakakilis antlakakiskej, pero mach itlaj ankimomakaskej kuenta.

Ika amoixtololowan antlachiaskej, pero mach ankimatiskej tlanon kijtosneki tlan ankitaskej.

15Porke in yinmej tlakaj wel oyoltlakuawakej,
yejwan omonakastzajtzakej,
iwan omoixtzajtzakej
para amo tlachiaskej ika inmixtololowan,
iwan nion amo kinekij tlakakiskej ika intlakakilis,
nion mach itlaj kinekij kimomakaskej kuenta ipan inyolo,
iwan nion mach kinekij moyolkuepaskej nonawak para ma nikinmakixti.

16'Pero namejwan xipakikan, porke antlachiaj ika amoixtololowan, iwan ankimatiij tlan kijtosneki tlan ankitaj. Iwan ankimomakaj kuenta tlan ankikakij nikijta. **17**Ipan melajka namechilwia, ke miekej profetajtin iwan miekej tlakaj katlej kualtin de nekáj tiempo okinekiaj kitaskej iwan kikakiskej tlan namejwan axan ankitaj iwan ankikakij, pero mach okitakej iwan nion mach okikakej.

Jesús okintomilij in ejemplo de yen tlatoookak

(Mr. 4:13-20; Lc. 8:11-15)

18'Xikkakikan kiné tlan kijtosneki in ejemplo de yen tlatoookak. **19**Katlej okikakej in tlajtole de kenik in Dios tlanawatia, iwan amo kimomakaj kuenta, yonmej ken semiya katlej owetzke ipan ojtle. Witz in Amo Kuale Tlakatl iwan kinkixtilia in tlajtole katlej omotoookak ipan inyolo. **20**In semiya katlej owetzke ijlik teyoj, kijtosneki in tlakaj katlej kikakij in tlajtole iwan niman kiresibiroaj ika pakilstle, **21**pero komo mach wejkatlan monelwayotiaj, niman nelwayowakij. Iwan nijuak pewa trabajoppanoaj o noso pewa kintlatlalochtiaj por yen itlajtol in Dios, walmosotlawaj iwan kikawaj in Dios. **22**In semiya katlej owetzke itzalko in bierojxiwitl, kijtosneki yejwan katlej kikakij itlajtol in Dios, pero sa tekil tlanemiliaj itech tlamantin de yin nemilistle iwan kinkajkayawa in rikojyotl. Nochi

in yin tlamantle kijyomiktia itlajtol in Dios katlej omotookak ipan inyolo, iwan mach tlakij. ²³Pero in semiya katlej omotookak kan kuale tlale, kijtosneki yejwan katlej kikakij itlajtol in Dios iwan kimomakaj kuenta, iwan kitemakaj miek tlakilotl. Iwan sekimej san de se semiya kitemakaj se siento intliolo, sekimej kitemakaj eyinpoale intliolo, iwan sekimej kitemakaj senpoale iwan majtlakte intliolo.

Ejemplo de yen mach kuale xiwitl

²⁴Jesús okinmilwij oksé ejemplo, okijtoj:

—Iwan ixko yin tlaltikpak kan Dios tlanawatia no ijkón ken se tlakatl katlej okitookak kuale semiya itlalaj. ²⁵Pero nijuak in tlaltekwaj iwan itekipanojkej okochtokaj, owalaj in tlakatl katlej kikokolia in tlaltekwaj iwan okitookak xiwitl mach kuale kan toktok trigo, iwan oyáj. ²⁶Nijuak in trigo omoskaltij iwan omiawatik, ikuakón oneske noiiki in mach kuale xiwitl. ²⁷Tones in tekipanojkej oyajkej okilwitoj in tlaltekwaj: “Señor, tla tezwatzin otiktookak kuale semiya, ¿de kan okiske kiné, in mach kuale xiwitl?” ²⁸Pero yej okinmilwij: “Se katlej nechkokolia ijkón okichij.” In tekipanojkej okitlajtlanijkej: “¿Tikneki ma tiwian ma tikwiwitlatij in mach kuale xiwitl?” ²⁹Pero yej okinmilwij: “Amo, porke tla ankiwiwitlaskej in mach kuale xiwitl, welis noiiki ankiwiwitlaskej in trigo. ³⁰Okachi kuale xikkawakan ma moskaltikan san sekan asta ikuak se kololos. Iwan ikuakón nikintitlanis sekimej tekipanojkej para achtoj ma kololokan in mach kuale xiwitl iwan ma kimanojoijilpikan para kichichinoskej. Iwan satepan ninkinmilwis ma kololokan in trigo para niktlaatis ijlik nokueskon.”

Ejemplo de iyolo in mostaza katlej okachi tzikitzin ke iyolo in miltomatl

(Mr. 4:30-32; Lc. 13:18-19)

³¹Jesús noiiki okinthalilij yin ejemplo:

—Kan Dios tlanawatia yon noiiki ken iyolo in mostaza katlej se tlakatl kitooka itlalaj. ³²Iwan iyolo in mostaza yen okachi tzikitzin de noctin semiyas. Pero nijuak moskaltia, yen moskaltia okachi weyi tlatoktle iwan motlami weyi kuawitl, ke asta in totomej motepajsooltiaj ipan imamayo.

Ejemplo de yen levadura

(Lc. 13:20-21)

³³Noiiki okinmilwij in yin ejemplo:

—Kan Dios tlanawatia yon noiiki ken levadura para pan katlej se siwatil kineloa ika eyi tlatamachiwale de arina, para kisamawas nochí in yon tixtle.

Tlanik in Jesús okintekipanoltij ejemplos

(Mr. 4:33-34)

34 Nochtin in yinmej tlamantin Jesús okinmilwij in tlakaj ika ejemplos. Iwan nochipa nijuak okintlapowiaya, okintlapowiaya ika ejemplos. **35** Para ma mochiwa tlan okijtoj in profeta:

Nitlapoas ika ejemplos.

Nikinmijtos tlamantin katlej mach akaj kinmati desde ikuak in Dios okichij in tlaltikpak.

Jesús okintomilij in ejemplo de yen mach kuale xiwitl

36 Tones in Jesús okinmakaj in tlakaj iwan okalakke kalijtik, kan imomachtijkawan omikuaniijkej inawak iwan okitlajtlanjkej:

—Xitechtomili in ejemplo de yen mach kuale xiwitl katlej okiske itzalko in trigo.

37 Ijkuakón Jesús okinmilwij:

—Nej katlej onimochij nitlakatl, yen Nej in nekáj tlakatl katlej okitookak in kuale semiya. **38** Iwan notlalaj, yen tlaltikpak. In kuale semiya, yejwan in tlakaj katlej kipiaskej parte kan Dios tlanawatia. In mach kuale semiya, yejwan in tlakaj katlej kinnawatia in Amo Kuale Tlakatl. **39** Iwan in tekokolij de yen tlaltekowaj katlej okitookak in mach kuale xiwitl, yen diablo. Iwan nijuak kololoskej in trigo, yen yon kijtosneki nijuak tlamic in tlaltikpak. Iwan katlej kololoaj in trigo, yejwan in angelesti. **40** Ijkón ken mowiwitla in mach kuale xiwitl iwan mochichinoa ijlik tlitl, ijkón noijki yetos nijuak tlamic in tlaltikpak. **41** Nej katlej onimochij nitlakatl nikualintlanis noangelwan kan katej noaxkawan, para ma kinkixtikij nochtin katlej tetlajtlakolmayajkej iwan katlej kichiwaj tlan mach kuale. **42** Iwan kintlamotlaskej ijlik tlako, kan chokaskej iwan motlanteteyitzaskej. **43** Iwan katlej kichiwaj tlan Dios kineki, petlaniskej ken tonale ompa kan tlanawatia inPapan. Akin kineki kimomakas kuenta, ma kikaki.

Ejemplo de yen tomin tlalpachitok

44 In tlakatl katlej kikawilia in Dios ma kinawati, yon ken se tlakatl katlej okajsik tomin tlalpachitok itech se tlale. Nijuak okajsik in yon tomin, oksemi ompa okitlaatij. Iwan ika pakilistle oyáj ichan, iwan okinamakak nochitlan kipia. Iwan okikoj in yon tlale kan okajsik in tomin tlalpachitok.

Ejemplo de se perla patíoj

45 Noijki, in tlakatl katlej kikawilia in Dios ma kinawati, no ken se tlasemanke kintemojtinemi perlas patiojkej, **46** iwan nijuak kaksi se perla

katlej patíoj, yawi ichan, iwan kinamaka nochi tlan kipia, iwan kikowa yon perla.

Ejemplo de se michmatlatl

47'Kan Dios tlanawatia yon noijki ken se michmatlatl katlej kitlamotlaj ijlik atl iwan kinmololoa nochi tlatlamantle de michimej. **48**Nijuak temi in michmatlatl, in michmajkej kikixtiaj atlatentle, iwan ompa motlaliaj kinpejpenaj in michimej. In michimej katlej kualemej kintlaliaj ijlik chikiwitl, iwan katlej mach kualemej kintlamotlaj. **49**Ijkón yetos noijki nijuak tlamic in tlaltikpak. Kisaskej in angelestín iwan kinxeloskej in tlakaj katlej mach kualtin de intech in tlakaj katlej kualtin. **50**Iwan kintlamotlaskej in tlakaj katlej mach kualtin ijlik tliko, kan chokaskej iwan motlanteteyitzaskej.

Tlamantle yankuik iwan tlamantle katlej mach yankuik

51Toneses Jesús okintlajtlanij:

—¿Ankimomakaj kuenta namejwan nochi in yin tlamantle?

Yejwan otlanankilijkej:

—Aján, Señor, tikmomakaj kuenta.

52Ijkúakón okinmilwij:

—Nijuak se tlamachtij itech tlanawatile de Moisés momachtia kenik in Dios tlanawatia, weli tlamachtia ika yankuik tlamachtile iwan ika katlej mach ok yankuik. No ijkón ken se chanej katlej kimati kinkixtia de tlan kintlaatijtok ikalijtik, kinkixtia ikosaswan katlej yankuikej iwan katlej mach ok yankuikej.

In tlakaj de pueblo de Nazaret mach otlaneltokakej inawak Jesús

(*Mr. 6:1-6; Lc. 4:16-30*)

53Nijuak in Jesús otlanke okinmilwij in yinmej ejemplos, oyáj de ompa.

54Iwan oajsito ipueblo. Ompa opéj tlamachtia itech tiopan, iwan tlakaj sa otlajtlachiayaj (omomajmawtiayaj), iwan okijoayaj:

—¿Kan okikuito yin tlakatl nochi yin ixtlamachilistle? ¿Kenik weli kinchiwa in yinmej milagrostín? **55** ¿Amo yen yin itelpoch in kuawxinke? ¿Amo imaman itoka María, iwan ikniwan intoka Jacobo, José, Simón, iwan Judas? **56** ¿Amo nian chantij noijki in siwamej katlej ikniwan? ¿Kan okikuito kiné, nochi yin ixtlamachilistle?

57Iwan por yonik in tlakaj mach ok okiwelitakej, iwan mach ok okinekej okikakej. Pero Jesús okinmilwij:

—Akin tlapoá de Dios se kitlakitas ik nian nepa, menos itech ipueblo iwan itech ichan.

58 Iwan mach okinchij miekej milagrostin ompa, porke yejwan mach otlaneltokakej inawak.

In Juan Tlakuateekij okimiktijkej

(*Mr. 6:14-29; Lc. 9:7-9*)

14 Itech nekatej tonaltin Herodes in tetrarca katlej oyeka gobernador de estado de Galilea, okikakke de tlan Jesús okichiwaya, ²iwan ikuakón okinmilwij itekipanojkawan:

—Nekáj tlakatl yen Juan Tlakuateekij. Yomoyolkuij oksemi satepan de omikke, iwan por yonik kinchiwa wejweyin milagrostin.

³Herodes ijkón okijtoj, porke itech nekatej tonaltin yej otlanawatij ma kikitzkikan in Juan, ma kikadenaijilpijan iwan ma kitzakuakan telpiloyan. Ijkón okichij in Herodes porke okitlankuamotlatoka in Felipe maski oyeka ikni. In siwatl oyeka itoka Herodías. ⁴Juan okilwiaya in Herodes:

—Tikchijtok se weyi tlajtlakole porke iwan tikaj mokoñada.

⁵Herodes okinekia kimiktiani in Juan, pero okinmiimakasia in tlakaj. Porke nochtin okimatiaj nik in Juan oyeka profeta de Dios. ⁶Pero nijuak okumpliroj xiwitl in Herodes, ichpoch in Herodías omijtotij inmixpan nochtin iinbitadoswan in Herodes, iwan Herodes sa tekitl okiwelitak. ⁷Iwan okilwij ipan melajka nik kimakas nochí san tlan yej kitlajtlanilis. ⁸Tones in ichpochtle achtoj omotlapowij iwan imaman, iwan satepan okilwij in Herodes:

—Xinechmaka ika se plato itzontekon in Juan Tlakuateekij.

⁹Nijuak ijkón okikakke in rey Herodes, omoyolkokoj, pero komo yokilwika ipan melajka nik kimakas nochí san tlan kitlajtlanilis iwan inmixpan iinbitadoswan, tones otlanawatij ma kimakakan. ¹⁰Iwan otlanawatij ma kikechtzontekikan in Juan ompa telpiloyan. ¹¹Iwan okualkuijkej ika se plato itzontekon, iwan okimaktilijkej in ichpochtle, iwan yej okimakak imaman.

¹²Satepan oejkokej imomachtijkawan in Juan, okitkikej itlalnakayo iwan oyajkej okitookatoj. Satepan oyajkej okimatiltitoj in Jesús.

Jesús okintlamakak makuile mil tlakaj

(*Mr. 6:30-44; Lc. 9:10-17; Jn. 6 :1-14*)

¹³Nijuak in Jesús okimatke, oyáj de ompa iselti itech se barko, iwan oyáj se lugar kan tlalkawale kan mach akaj tlakatl nemí. Pero in tlakaj okimatkej, okiskej de inpueblojwan iwan oyajkej okajsitoj nejnentiwej.

¹⁴Nijuak Jesús otemok de itech barko, okinmitak miekej tlakaj, iwan okinmiknomaj, iwan okinpajtij in kokoxkej katlej okualinwikayaj.

15 Níjkuak yopéj tiotlaki, imomachtijkawan in Jesús omíjkuanijkej inawak, iwan okilwijkej:

—Yotiotlakik, iwan nian mach akaj chanti. Xikintitlani in tlakaj para ma wian ik pueblobjtin, para ma kikowatij tlan kikuaskej.

16 Jesús okinmilwij:

—Mach moneki ma wian. Namejwan xikintlamakan.

17 Iwan yejwan okinankilijkej:

—Nian tikpiaj san makuile pan iwan ome michin.

18 Iwan Jesús okinmilwij:

—Xinechinwalkuulikan nian.

19 Ijkuakón Jesús otlanawatij ma motlalikan in tlakaj kan xiwyoj.

Satepan okitilanke in makuile pan iwan ome michimej, oajkopantlachixke omotlasojkamatke inawak Dios, iwan okipojpostekke in pan iwan okinmakak imomachtijkawan, iwan yejwan okinxejxelilijkej nochtin in tlakaj. **20** Nochtin kuale otlakuajkej asta oixwikej. Satepan okintemitijkej majtlakte iwan ome chikimej de pantlapojpostektle iwan michintlakojkotonale de katlej osobraroj. **21** Iwan katlej otlakuajkej oyekaj kej makuile mil tlakaj, mach okinpojkej in siwamej nion pilalaktin.

Jesús onejenenke ipan atl

(Mr. 6:45-52; Jn.6 :16-21)

22 Satepan Jesús okinnawatij imomachtijkawan ma tlejkokan itech barko para ma panokan oksé lado de yen lago ma sa tlayekanakan, mientras in Yej ok okinmakawaya in tlakaj. **23** Iwan satepan de okinmakaj, Jesús otlejkok itech se tepetl omotiotzajtzilito iselti. Níjkuak owaltlatleyuak, Jesús ompa oyeka iselti. **24** In barko yoyaya tlatlajko lago. In atl omajkokua ipan barko porke in ejekatl inpan oyaya. **25** Iwan san kualkan ok otlatleyuatoka, Jesús okinmajsito nejnentiw ipan atl. **26** Iwan níjkuak imomachtijkawan okitakej nejnentiw ipan atl, omomawtijkej iwan otzajtzikey:

—iSe temawtij!

27 Pero Jesús okinnotzke, iwan okinmilwij:

—Amo ximomawtikan, Nej niJesús.

28 Ijkuakón Pedro otlanankilij, okijtoj:

—Señor, tla yen tejwatzin, xikchiwa ma ninejnemi ipan atl asta kan tejwatzin tikaj.

29 Iwan Jesús okilwij:

—Xiwiki kiné.

Ijkuakón Pedro otémok de itech barko iwan opéj nejnemi ipan atl para yas kinamikitij in Jesús. ³⁰Pero níjkuak okimomakak kuenta nik wel chikawak ejeka, omomawtij. Iwan komo opéj apolaki, otzajtzik:

—iSeñor, xinechmakixti!

³¹San niman Jesús okimakitzkij, iwan okilwij:

—Wel tzikitzin motlaneltokalis. ¿Tlanik mach otinechneltokak?

³²Iwan níjkuak otlejkokej itech barko, in ejekatl omoketzke. ³³Ijkuakón katlej oyekaj itech barko omotlankuaketzkej iyakapan Jesús iwan okiweyikixtijkej, okijtoijkej:

—Melawak nik tejwatzin titeKone de Dios.

Jesús okinpajtij in kokoxkej de Genesaret

(Mr. 6:53-56)

³⁴Satepan de otlankej opanokej de itech yon lago, oajsitoj itech tlale de Genesaret. ³⁵Níjkuak in tlakaj de yon lugar okixmatkej nik yen Jesús, oyajkej okitematiltijoj itech nochí yon región, iwan okualinwikilijkej nochtin kokoxkej kan Yej oyeka. ³⁶Okitlatlawtiayaj ma kinkawili ma kikitzkilikan itzotzol maski san yen itempantzin. Iwan nochtin katlej okikitzkilijkej itzotzol, opajtikej.

Katlej kiyolsokiotia in tlakatl

(Mr. 7:1-23)

15 Ijkuakón sekimej fariseos iwan tlamachtijkej de itlanawatil in Moisés katlej ovalajkej de Jerusalén, omíjkuanijkej inawak Jesús, iwan okitlajtlaniijkej:

²—¿Tlanik momomachtijkawan mach kitlakitaj in kostumbres katlej otechkajtewilijkej in ya wejkawitl toweyitajwan? Porke mach momajtekiaj níjkuak tlakuaj ken otechmachtijkej.

³Iwan Jesús okintlajtlani:

—¿Tlanik namejwan nojiki mach ankitlakitaj itlanawatil in Dios iwan yej okachi ankitlakitaj namokostumbre? ⁴Porke in Dios okijtoj: “Xiktlakita mopapan iwan momaman”, iwan “Akin biero kitenewilis ipapan o noso imaman, ma kimiktikan.” ⁵Pero namejwan ankijtaj ke se tlakatl welis kilwis ipapan o noso imaman: “Mach welis nimitzpalewis ika tlan mitzpoloa, porke tlan nikpia yonikmaktilij in Dios.” ⁶Namejwan ankijtaj ke mach ok moneki se kinpalewis in tetajmej. Ijkón namejwan ankijtlakoaj itlanawatil in Dios porke ankichiwaj yej tlan de amejwan amokostumbre. ⁷iTeixkajkayajkej! Yompa tlan okijtoj in profeta Isaías de amejwan, níjkuak okijtoj:

⁸Yinmej tlakaj nechtlakitaj san ika inten,

pero inyolo kajki wejka de Nej.

⁹San tekitl nechweyikixtiaj,

tlamachtiaj ika intlayejyekolis in tlakaj kej yeskia itlanawatil in Dios.

¹⁰Ijkuakón Jesús okinnotzke in tlakaj, iwan okinmilwij:

—Xikkakikan iwan xikmomakakan kuenta tlan namechilwis: ¹¹Tlan kalaki ijtk iten se tlakatl mach yon kiyolsokiotia. Sino kiyolsokiotia yen tlan kisa de ijtk iten.

¹²Ijkuakón imomachtijkawan omijkuanijkej inawak Jesús, iwan okitlajtlanijkej:

—¿Tikmati nik in fariseos okualankej nijuak okikakej tlan otikijtoj?

¹³Pero Yej okinnankilij:

—NoPapan katlej kajki ilwikak, kiwiwitlas ika nochí inelwayo nochí tlatoktle katlej mach okitookak. ¹⁴Xikinkawakan. Porke in yonmej fariseos katej kej yeskia mach tlachiaj. Iwan tla se katlej mach tlachia kiyekanas oksé katlej noiji mach tlachia, san ken omen welis wetziskej ijtk se kuyoktle.

¹⁵Pedro otlanankilij okijtoj:

—Xitechtomili in yon ejemplo.

¹⁶Jesús okijtoj:

—¿Noiji mach ankimomakaj kuenta namejwan? ¹⁷¿Amo ankimomakaj kuenta ke nochí tlan kalaki ijtk iten se tlakatl kalaki ijtk itlalax, iwan satepan kisa kalan? ¹⁸Pero tlan kisa de ijtk iten se tlakatl, kisa de ijtk iyolo. Iwan yen yon kiyolsokiotia. ¹⁹Porke de ipan inyolo in tlakaj kisa in mach kuale tlayejyekoliste, temiktiaj, momekatiaj katlej tlanamikttiltin iwan katlej mach tlanamikttiltin, tlachtekij, tlakajkayawaj, iwan tewikaltiaj. ²⁰Yen yonmej tlamantin katlej kiyolsokiotia se tlakatl. Pero tla se tlakuas iwan mach se momajtekis, yon mach kiyolsokiotia in tlakatl.

Se siwatl de Canaán okineltokak in Jesús

(Mr. 7:24-30)

²¹Jesús okiske de ompa iwan oyáj ik región de Tiro iwan de Sidón. ²²Se siwatl cananea katlej ochantia itech yon región, ovalaj kuawtzajtzitiwitz inawak Jesús. Okijtoj:

—iSeñor, tekone de David, xinechiknomati! Nochpoch kipia se ejekatl mach kuale iwan kitlajyowiltia.

²³Pero Jesús mach okinankilij. Ijkuakón imomachtijkawan omijkuanijkej inawak iwan okitlatlawtijkej, okilwijkej:

—Xiknawati in siwatl ma wia, porke kuawtzajtzitiwitz tokuitlapan.

²⁴Toneses Jesús okilwij in siwatl:

—Dios mach onechwaltitlanke para ma ninkinpaleti oksekimej tlakaj, sino san yen tlakaj de Israel, katlej katej kej ichkamej katlej mopolotokej.

25 Pero in siwatl omijkuanij inawak iwan omotlankuaketzke iyakapan, okilwij:

—Señor, xinechpalewi.

26 Iwan Jesúus okilwij:

—Mach kuale kaj tla yej namejwan namechmakas tlan kintokaroa in judiojtin. Porke yon kej yeskia niktlamaka se chichij ika intlakual ikonewan in Dios.

27 Pero in siwatl okijtoj:

—Aján, Señor. Pero noijki in chichimej kikuaj in tlakualpayextle katlej tepewi itlampa mesa nijuak tlakuaj intekowan.

28 Ijkuakón Jesúus okilwij:

—Siwatl, sa tekitl weyi motlaneltokalis. Ma mochiwa ijkón ken tej tikneki.

Iwan san niman ijkuakón yon ichpoch opajtik.

Jesúus okinpajtij miekej kokoxkej

29 Jesúus okiske de ompa iwan oyáj itempan lago de Galilea. Satepan otlejkok ipan se tepetl iwan ompa omotlalij. **30** Miekej tlakaj oajsitoj kan Jesúus oyeka, ompa okinwikilijkej katlej koxomej, katlej mach tlachiaj, katlej nontzitzintin, katlej matepomej, iwan miekej oksekimej kokoxkej okachi. Okintlalijkej ikxitlan Jesúus, iwan Yej okinpajtij. **31** Iwan in tlakaj sa otlajtlachiayaj (omomajmawtiayaj), nijuak okinmitayaj in nontzitzintin opéj tlajtoaj, nijuak in matepomej okisaya oksé yankuik inma, nijuak in koxomej ya kuale onejnemiaj, iwan nijuak ya kuale otlachixkej katlej mach otlachiayaj. Iwan opéj kiweyikixtiaj in toTajtzin Dios de Israel.

Jesúus okintlamakak nawi mil tlakaj

(Mr. 8:1-10)

32 Ijkuakón Jesúus okinnutzke imomachtijkawan, iwan okinmilwij:

—Nikinmiknomati in yinmej tlakaj, porke ya kipia eyi tonale katej nian nowan iwan mach itlaj kipiaj tlan kikuaskej. Mach nikneki nikintitlanis inchan ma tiojsijtiwian, porke welis kuatleyuiliskej ipan ojtle.

33 Tones imomachtijkawan okilwijkej:

—Nian mach akaj chanti, ¿kan tikkixtiskej tanto pan para tikintlamakaskej asta achinmej tlakaj?

34 Jesúus okintlajtlanij:

—¿Keski pan ankipiaj?

Iwan yejwan okinankilijkej:

—Chikome pan iwan kanaj keskimej michimej.

³⁵Toneses Jesús otlanawatij ma motlalikan in tlakaj ipan tlale.

³⁶Okintilanke in chikome pan iwan michimej, iwan omotlasojkamatke inawak Dios. Satepan okikojkotonke in pan iwan michimej iwan okinmajmakak in imomachtijkawan, iwan yejwan okinxelilijkej nochtin in tlakaj. ³⁷Nochtin otlakuajkej asta oixwikej. Iwan asta okintemitijkej chikome chikimej de yen pedasos katlej osobraroj. ³⁸Iwan tlakaj katlej otlakuajkej oyekaj kej nawi mil tlakaj, mach okinpojkej in siwamej nion pilalaktin. ³⁹Satepan Jesús okinmakaj in tlakaj, otlejkok itech barko iwan oyáj itech región de Magdala.

In fariseos iwan saduceos okitlajtlanilijkej in Jesús ma kichiwa se milagro

(Mr. 8:11-13; Lc. 12:54-56)

16 Oejkokej in fariseos iwan saduceos para kitlajtlakolmayawiskej in Jesús, iwan okitlajtlanilijkej ma kichiwa se milagro kej se señas para kitaskej kox melawak in Yej witz de Dios. ²Pero Yej okinnankilij:

—Níjkuak tiotlaki, namejwan ankijtaj: “Yetos kuale tiempo, porke tlachichiliwia ik ilwikak.” ³Iwan níjkuak tlanesi ankijtaj: “Axan yetos mach kuale tiempo porke tlachichiliwia iwan tlamixtemi.” ¡Teixkajkayajkej! Namejwan kuale ankixyejyekoaj tlan ankitaj itech ilwikak pero mach ankixyejyekoaj nochí tlan ankitaj tlan tlamochijtok itech yin tiempo. ⁴Namejwan mach ankualtin iwan mach ankitlakitaj in Dios. Iwan axan ankinekij ma nikchiwa se milagro para annechneltokaskej. Pero mach namechmakas oksé milagro, sino san yen milagro tlan opanok in profeta Jonás.

Jesús ompa okinkajtej iwan oyáj.

Jesús okijtoj ke intlamachtilis in fariseos mach melawak

(Mr. 8:14-21)

⁵Níjkuak in momachtijkej opanokej oksé lado de yen lago, okelkajkej de kitkinij in pan. ⁶Ijkuakón Jesús okinmilwij:

—Ximotlachilikan de yen inlevadura in fariseos iwan saduceos.

⁷Imomachtijkawan opéj kimolwiaj entre yejwan:

—Ijkón techilwia porke mach otikualkuijkej in pan.

⁸Jesús okimomakak kuenta, iwan okinmilwij:

—¿Tlanik ankimolwiaj ke mach ankipiaj pan? Namejwan wel tzikitzin namotlaneltokalis. ⁹¿Ayamo ankimomakaj kuenta, iwan nion mach ok ankelnamikij de yen makuile pan katlej onikinxelilij in makuile mil tlakaj, iwan keski chikiwitl osobraroj? ¹⁰¿Iwan nion mach ok ankelnamikij de yen chikome pan katlej onikinxelilij in nawi mil tlakaj, iwan keski

chikiwitl ankololojkej de tlan osobraroj? ¹¹ ¿Kenik mach ankimomakakej kuenta nik in Nej mach onitlapoaya de yen pan, nijuak onamechilwij ximotlachilikan de yen inlevadura in fariseos iwan saduceos?

¹² Ijkuakón imomachtijkawan okimomakakej kuenta nik in Jesús mach okinmilwiaya ma motlachilikan de yen ilevadura in pan, sino okinmilwij ma motlachilikan de yen intlamachtil in fariseos iwan saduceos.

Pedro okijtoj Jesús yen Cristo

(*Mr. 8:27-30; Lc. 9:18-21*)

¹³ Nijuak Jesús oajsito itech región kan kajki in weyikan de Cesarea de Filipo, ijkuakón okintlajtlanij imomachtijkawan:

—Nijuak in tlakaj motlapowiaj de Nej katlej onimochij nitlakatl, ¿ken kijtaj? ¿Akin Nej?

¹⁴ Yejwan okijtojkej:

—Sekimej kijtaj tejwatzin tiJuan Tlakuateekij. Oksekimej kijtaj tejwatzin tiElías, iwan oksekimej kijtaj tejwatzin tiJeremías o noso akaj oksé profeta.

¹⁵ Iwan Yej okintlajtlanij:

—Iwan namejwan, ¿ken ankijtaj? ¿Akin Nej?

¹⁶ Simón Pedro okinankilij:

—Tejwatzin tiCristo, titeKone de Dios katlej nochipa yolitok.

¹⁷ Iwan Jesús okilwij:

—Xipaki tej, Simón, titekone de Jonás, porke mach akaj tlakatl mitzajsikamatiltia nik in Nej niCristo, sino yen noPapan katlej kajki ilwikak.

¹⁸ Iwan Nej noijki nimitzilwia nik in tej tiPedro (kijtosneki tetl), iwan itech yin tetl nikinnotzas notlaneltokawan. Porke tej otiknextij tlan melawak. Iwan nochtin katlej nechneltokaskej, kiresibiroskej tlan melawak. Iwan ipoder in mikilistle mach semi welis kintlanis. ¹⁹ Iwan tej nimitzinmakas in yabejtin de ilwikak kan Dios tlanawatia para tikintlatlapolis in tlakaj. Iwan katlej tikijtos kipiaj intlajtlakol ixko yin tlaltikpak, ompa ilwikak in Dios noijki kijtos nik kipiaj intlajtlakol. Iwan katlej tikijtos mach kipiaj intlajtlakol ixko yin tlaltikpak, ompa ilwikak in Dios noijki kijtos nik mach kipiaj intlajtlakol.

²⁰ Ijkuakón Jesús okinnawatij imomachtijkawan amakaj itlaj ma kilwikan kox yen Cristo.

Jesús okinmilwij kenik mikis

(*Mr. 8:31-9 :1; Lc. 9:22-27*)

²¹ Ijkuakón Jesús opéj kinyekilwia imomachtijkawan, nik kipia de yas Jerusalén iwan kitlajyowiltiskej miek in tlayekankej tetajtzitzintin, in tlayekankej tiopixkej, iwan in tlamachtijkej de itlanawatil in Moisés. Iwan

okinmilwij nik kimiktiskej, pero ipan eyi tonale moyolkuis (moyolitis).
22Toneses in Pedro okiwikak in Jesús ik se lado iwan opéj kajwa por ijkón okijtoj, okilwij:

—Amo Dios ma kimonekilti, Señor. Amo semi ijkón xipano de tlan tikija.

23Pero Jesús omokuepke iwan okilwij in Pedro:

—Xitzinkisa de Nej, Satanás. San tinechtzatzakuilia. Porke mach mitztekipachoa tlan Dios kineki, sino mitztekipachoa tlan kinekij in tlakaj.

24Satepan Jesús okinmilwij imomachtijkawan:

—Tla akaj kineki witz nonawak, ma wiki kiné, pero moneki ayakmo ma kichiwa san tlan yej kinekis. Sino kipia de kixikos nochí san tlan panos, ma wiki nowan iwan maski ma kimiktikan itech krus. **25**Porke tla akaj kineki kipalewis inemilis, kipolos. Pero tla akaj kipolos inemilis por Nej, kipalewis inemilis. **26**Mach itlaj ipatij tla se tlakatl kimoaxkatis nochí in tlaltikpak iwan satepan kipolos ianima. Porke mach itlaj onkaj ixko yin tlaltikpak tlan ika welis kitlaxtlawas para kipalewis ianima. **27**Porke Nej katlej onimochij nitlakatl niwitz ika imawisotlanex in noPapan iwan iangelwan, iwan ijkuakón kada se tlakatl niktlaxtlawis segúñ tlan okichij. **28**Ipan melajka namechilwia, ke sekimej tlakaj katlej nian katej, mach kixmatiskej in mikilistle asta amo ma nechitakan Nej katlej onimochij nitlakatl ma pewa nitlanawati.

Jesús otlakenpetlanke

(Mr. 9:2-13; Lc. 9:28-36)

17 Chikuasen tonale satepan, Jesús okiwikak in Pedro, in Jacobo iwan ikni itoka Juan, oyajkej itech se weyi tepetl. **2**Jesús omoixpatlak ompa inmixpan. Ixko opetlanke ken tonale, iwan itzotzol opetlankaistayak ken tlanextle. **3**Iwan owalmonextijkej in Moisés iwan Elías, motlapowijtokej iwan Jesús. **4**Ijkuakón Pedro okilwij in Jesús:

—Señor, sa kuale nian tikatej. Tla tikneki, nian ma tikinchiwakan eyi akawalkaltin, se para tejwatzin, se para Moisés, iwan se para Elías.

5Nijuak ok otlapojtoka in Pedro, ijkuakón se mixtle okinkenke iwan omokakke se tlajtole de ijtok yon mixtle, okijtoj:

—Yen yin notlasojKone, akin inawak nipaki. Xikkakilikan itlajtol.

6Nijuak ijkón okikakej, in momachtijkej omotlankuaketzkej asta okitennamikej in tlale, iwan sa tekitl omomawtijkej. **7**Ijkuakón Jesús omijkuani innawak imomachtijkawan, okintlalij imawan inpan iwan okinmilwij:

—Ximoketzakan. Amo ximomawtikan.

8Iwan nijuak otlajtlachixtewakej, mach ok akaj okitakej, sino sa yen Jesús.

9Nijuak otomoayaj de ipan tepetl, Jesús okinnawatij:

—Amakaj itlaj xikilwikan de tlan ankitakej, asta ikuak Nej katlej onimochij nitlakatl ma nimoyolkui oksemi de itech nomikilis.

10Tones imomachtijkawan okitlajtlanjkej in Jesús:

—¿Tlanik kiné, kijtaj in tlamachtijkej de itlanawatil in Moisés nik in Elías yen kipia de witz achtoj antes de witz in Cristo?

11Jesús okinnankilij:

—Melawak, Elías achtoj witz, iwan yej kiyektlalis noch. **12**Pero Nej namechilwia ke Elías yowitza, iwan yejwan mach okineltokilijkej iwan yej san tlan amo okitoktijkej. Iwan Nej katlej onimochij nitlakatl no ijkón nechtlajyowiltiskej.

13Ikuakón imomachtijkawan okimomakakej kuenta nik in Jesús okintlapowiaya de yen Juan Tlakuateekij.

Jesús okipajtij se nontzin

(*Mr. 9:14-29; Lc. 9:37-43*)

14Nijuak oajsitoj kan oyekaj in tlakaj, se tlakatl omijkuani inawak Jesús omotlankuaketzke iyakapan, iwan okilwij:

15—Señor, xikiknomati notelpoch, mimiki iwan sa tekitl panoa tekokojkayotl. Miekpa wetzi ijtit tlilt iwan ijtit atl. **16**Nian onikinwalwikilij momomachtijkawan, pero mach welij kipajtiaj.

17Nijuak Jesús ijkón okikakke, okijtoj:

—¡Namejwan wel mach antetlakitatej iwan ankiyejyekoaj tlan mach kuale! ¿Asta keman nietos amowan? ¿Asta keman ijkón namechxikojtos? Xinechwalwikilikan nian in telpochtle.

18Ikuakón Jesús okajwak in ejekatl mach kuale, iwan okiske de itech yon telpochtle. Iwan san niman ikuakón opajtik.

19Satepan imomachtijkawan omijkuaniijkej inawak Jesús se lado, iwan okitlajtlanjkej:

—¿Tlanik in tejwan mach otiwelikej otikixtijkej in ejekatl mach kuale?

20Jesús okinmilwij:

—Porke amechpoloa miek tlaneltokalistle. Ipan melajka namechilwia, tla ankipiaskej tlaneltokalistle maski san ken se semiyajtzin de mostaza, anwelinij ankilwianij in yin tepetl: “Ximikuani de nian iwan xiwia ik ne”, iwan in tepetl mijkuani. Nochi anwelinij ankichiwanij tla melawak namejwan ankipianij tlaneltokalistle. **21**Pero in yinmej ejekamej mach kualtin welis ankinkixtiskej tla anmotiotzajtziliskej iwan anmosawaskej (onmayunaroaskej).

Jesús oksemi okitematiltij imikilis

(Mr. 9:30-32; Lc. 9:43-45)

²²Se tonale, nijuak ok oyekaj itech estado de Galilea, Jesús okinmilwij nik in Yej katlej omochij tlakatl kitemaktiskej (kitemaktiliskej) inmak in tlakaj katlej mach kualtin, ²³iwan nechmiktiskej, pero ipan eyi tonale nimoyolkuis (nimoyolitis).

Iwan imomachtijkawan sa tekitl omoyolkokojkej.

Jesús okitlaxtlaj impuesto para in weyi tiopan

²⁴Nijuak Jesús iwan imomachtijkawan oajsitoj itech pueblo de Capernaum, katlej tlakobraroaj ika impuestos para in weyi tiopan omijkuanijkej inawak in Pedro, iwan okitlajtlanijkej:

—¿Namotlamachtij kox kitlaxtlawa impuesto para in weyi tiopan?

²⁵Pedro otlanankilij:

—Kenik amo.

Satepan nijuak in Pedro okalakke kalijtik kan oyeka in Jesús, yen Jesús achtoj okilwij in Pedro:

—¿Ken tikita, Simón? In reytin de ixko yin tlaltikpak, ¿akinmej kinkobraroaj ika impuestos? ¿Kinkobraroaj katlej chantij itech se pueblo o noso katlej mach ompa chantij?

²⁶Pedro okinankilij:

—Katlej mach ompa chantij.

Jesús okilwij:

—Tenses kijtosneki in chanejkej mach kipiaj de kitlaxtlawaskej. ²⁷Pero maski amo tikpij de tiktlaxtlawaskej, iwan para amakaj ma kualani, xiwia kan lago, xikkajkawa moanzuelo ijtk atl, iwan in michin katlej achtoj tikixtis, xikkamachalolti iwan tikkajxilis se tomin, iwan ika xiktlaxtlawa in de Nej noimpuesto iwan de tej moimpuesto.

¿Akin okachi weyikistok?

(Mr. 9:33-37; Lc. 9:46-48)

18 Itech yonmej tonaltin imomachtijkawan omijkuanijkej inawak Jesús iwan okitlajtlanijkej:

—¿Akin okachi weyikistok (weyititok) kan Dios tlanawatia?

²Ijkuakón Jesús okinotzke se chokotzin, okitlalij tlatlajko de kan yejwan oyekaj, ³iwan okijtoj:

—Ipan melajka namechilwia, tla namejwan amo anmoyolkuepaj iwan amo anmochiwaj ken pilalaktin, mach ankalakiskej kan Dios tlanawatia.

⁴Ijkón kiné, akin okachi weyikistok (weyititok) kan Dios tlanawatia, yen

SAN MATEO 18

katlej moiknomati iwan mochiwa ken yin chokotzin.⁵ Iwan akin kiresibiroa se chokotzin ken yin itech notoka, kijtosneki Nej nechresibiroa.

Dios kintlajtlakoltis katlej tlajtlakolchiwaj

(*Mr. 9:42-48; Lc. 17:1-2*)

⁶’Tla akaj kitoktis ma wetzi ipan tlajtlakole se de yinmej tzitzikinmej katlej nechneltokaj, okachi kuale ma kilpilikan ikechtlan se metlatl iwan ma kiwitlazokan ijlik atl kan okachi tlawejkatlan. ⁷’iPobrestin tlaltikpaktlakaj! Porke sa tekitl onkaj tlan ika se wetzis ipan tlajtlakole. Nochipa ijkón yetos, pero ipobre in tlakatl katlej kitoktis akaj oksé ma wetzi ipan tlajtlakole!

⁸’Por yonik, tla moma o noso mokxi mitztoktia xiwetzi ipan tlajtlakole, okachi kuale xikinmotzontekili iwan wejka xikintlamotla. Porke okachi kuale xikalaki ilwikak timatepoj o noso tikoxo, ke ma mitztlamotlakan ijlik tlitl katlej mach keman sewis ika nochí ome momawan o noso ika nochí ome mokxiwan. ⁹Iwan tla moixtololo mitztoktia xiwetzi ipan tlajtlakole, okachi kuale xikmokixtili. Porke okachi kuale xikalaki ilwikak ika se moixtololo, ke ika nochí ome moixtololowan ma mitztlamotlakan ijlik tliko kan xotlatok in tlitl.

Ejemplo de se ichka katlej opoliwik

(*Lc. 15:3-7*)

¹⁰’Amo xikchiwakan menos se de yin achintzin. Porke ompa ilwikak iángel nochipa kajki ixpan noPapan katlej kajki ilwikak. ¹¹’Porke Nej katlej onimochij nitlakatl oniwalaj onikinmakixtiko katlej mopolojtinemij.

¹²’¿Kenamij ankitaj? Tla se tlakatl kinpia se siento ichkamej, iwan tla kipolos se, ¿amo kinkajtewas in nawinfoale iwan kaxtole iwan nawi ipan tepetl iwan yas kitemotij katlej opoliwik? ¹³Iwan tla kajsi, ipan melajka namechilwia ke okachi pakis por yon ichka, ke por nekatej in nawinfoale iwan kaxtole iwan nawi katlej mach okinpoloj. ¹⁴Ijkón nojki, namoPapan katlej kajki ilwikak mach kineki ma mopolon se de yinmej achintzitzintin.

Kenik tiktlapojojpolwiskej in se tokni

(*Lc. 17:3*)

¹⁵’Tla se mokni omitztoktij itlaj amo kuale, xiknotza iselti iwan xikilwi tlan omitztoktij. Tla mitzkaki, kijtosneki yotikmotlanilij, porke oksemi anmowikaskej kuale. ¹⁶Pero tla amo mitzkaki, ikuakón xiknotza se o kanaj omen tlaneltokakej, para ke nochí tlan mijtos ma kimatikan omen o noso eyin testigojin. ¹⁷Iwan tla nion yejwan mach kinkaki, ikuakón xikinmilwi

nochtin in tiopantlaneltokakej. Iwan tla nion yejwan nojki mach kinkaki, tones xikitakan yon tlakatl kej se katlej mach kineltoka Dios o noso kej se katlej tlakobraroa ika impuestos.

18'Ipan melajka namechilwia, ke nochti katlej tikijtos kipiaj intlajtlakol ixko yin tlaltikpak, ompa ilwikak in Dios nojki kijtos nik kipiaj intlajtlakol. Iwan katlej tikijtos mach kipiaj intlajtlakol ixko yin tlaltikpak, ompa ilwikak in Dios nojki kijtos nik mach kipiaj intlajtlakol.

19'Nojki namechilwia, tla omen de amejwan anmotlaliskej san se tlajtole ixko yin tlaltikpak para ankitlajtlaniskej itlaj ika tiotzajtzilistle, noPapan katlej kajki ilwikak amechmakas. **20**Porke kan mololoaj omen o noso eyin katlej nechneltokaj, Nej nojki ompa inwan nikaj.

21Ijkuakón Pedro omijkuanij inawak Jesús iwan okitlajtlanij:

—Señor, ¿keski buelta niklapojpolwis se nokni tla onechtoktij itlaj mach kuale? ¿Asta chikome buelta?

22Jesús okinankilij:

—Mach nimitzilwia xiklapojpolwi san chikome buelta, sino asta eyinfoale iwan majtlakte de chikome buelta, in tej moneki nochipa xiklapojpolwi.

Ejemplo de se tlakatl katlej mach okinekke otetlapojpolwij

23'Por yonik, kan Dios tlanawatia yon ken se rey katlej okinekke kichiwas kuenta iwan itekipanojkawan. **24**Iwan nijuak opéj kichiwa kuenta, okualwikilijkej se itekipanoj katlej okiwiliaya miek miyones de tomin. **25**Komo itekipanoj mach okipiaya tomin para kikuepilis, ijkuakón in rey otlanawatij ma kinamakakan yon tlakatl iwan isiwa, iwan ipilwan, iwan nochti tlan kipia, para ika ma kitlaxtlawa tlan kitewikilia. **26**Ijkuakón itekipanoj omotlankuaketze iyakapan rey iwan okitlatlawtij: "Señor, nimitzlatlawtia xinechonchia ok keski tonale iwan nimitzuepilis nochti tlan nimitzwikilia." **27**In rey okiknomatke, okitlapojpolwij de nochti tlan okiwiliaya iwan okikajkaj ma wia. **28**Pero niman nijuak in yon tlakatl okiske, okinamikke se ikompañero nojki tekipanoj de yen rey, katlej okiwiliaya kanaj kexkich tomin. Okikechkitzkij iwan opéj kikechpatzka, iwan okilwij: "iXinechkuepili tlan tinechwikilia!" **29**Tones ikompañero omotlankuaketze iyakapan iwan okitlatlawtij, okilwij: "Nimitzlatlawtia xinechonchia ok keski tonale, iwan nimitzuepilis nochti tlan nimitzwikilia."

30Pero yej mach okinekke kichias, sino yej okiwiliak okitzakuato telpiloyan para ma kikuepili nochti tlan kiwikilia. **31**Nijuak oksekimej itekipanojkawan in rey ijkón okitakej, sa tekitl omoyolkokojkej. Iwan oyajkej okilwitoj in rey nochti tlan okitakej otlapanok. **32**Ijkuakón in rey otlanawatij ma kinotzatij yon itekipanoj, iwan okilwij: "Tej mach tikuale

tinotekipanoj. Nej onimitztlapojojpolwij de nochí tlan otinechwikiliaya, porke otimotlatlawtij nonawak.³³Tej nojki omonekia tikiknomatini mokompañero, ijkón ken nej onimitzikomatke.”³⁴In rey sa tekitl okualanke, iwan otlanawatij ma kitlajyowiltikan asta kan ma kitlaxtlawa nochí tlan kitewikilia.

³⁵Satepan de ijkón okinmilwij, in Jesús okijtoj:

—NoPapan katlej kajki ilwikak, no ijkón kitoktis akin amo kinekis kitlapojpolwis se ikni ika nochí iyolo.

Jesús otlamachtij mach se ma mosiwakawa

(Mr. 10:1-12; Lc. 16:18)

19 Níjkuak Jesús otlanke okijtoj yin tlajtole, ijkuakón okiske de estado de Galilea iwan oyáj itech estado de Judea, ik ne lado de yen weyatl Jordán ik ikisayan tonale. ²Sa tekitl miekej tlakaj ikuitlapan oyajkej, iwan ompa okinpajtij in kokoxkej.

³Ijkuakón sekimej fariseos omíjkuanijkej inawak Jesús para kitlajtlakolmayawiskej, iwan okitlajtlanijkej:

—¿Kox kuale kajki in se tlakatl kikawas isiwa san ika itlaj tzikitzin?

⁴Jesús okinnankilij:

—¿Amo ankileraj in tiotlajkuilole kan kijta níjkuak in Dios opéj kichiwa in tlaltikpak, iwan ijkuakón nojki okinchij in tlakatl iwan siwatl?

⁵Iwan nojki kijta in tiotlajkuilole: “Por yonik in tlakatl kikawas ipapan iwan imaman para mosetilis iwan isiwa, iwan de omen, mochiwas sa se tlakatl.” ⁶Mach ok yeskej omen, sino sa se. Por yonik, katlej Dios yokinsetilij mach kipia de kinxeelos akaj tlakatl.

⁷Tones okitlajtlanijkej:

—¿Tlanik kiné, Moisés okitekawilij tla akaj tlakatl kineki mosiwakawas, moneki kimakas isiwa se amatl kan ma kijto nik mosiwakawa?

⁸Jesús okinmilwij:

—Moisés okitekawilij se tlakatl ma mosiwakawa, porke mach itlaj ankinekij ankimomakaskej kuenta de tlan kuale. Pero achtoj mach ijkón oyeka. ⁹Nej namechilwia, tla se tlakatl kikawa isiwa, iwan monamiktis iwan akaj oksé siwatl, kijtosneki iwan momekatia. Pero tla isiwa kichiwa tlajtlakole de momekatia iwan akaj tlakatl, tones iokich welis kikawas in yon isiwa. Iwan tla akaj monamiktis iwan yon siwatl katlej yokikajkajkej, kijtosneki no iwan momekatia.

¹⁰Ijkuakón imomachtijkawan okilwijkej:

—Tla melawak mach kuale se mokajkawas iwan isiwa, okachi kuale mach akaj ma monamikti.

¹¹Jesús okinmilwij:

—Mach nochtin welij kimomakaj kuenta yin tlajtole, sino sanwel nekatej katlej Dios kinpalewia ma kimomakakan kuenta. ¹²Katej sekimej tlakaj katlej mach monamiktiaj porke desde intlakatilis otlakatkej mach welis kinpiaskej inkonewan. Sekimej mach monamiktiaj porke okintoktijkej amo ma welikan ma kinpiakan inkonewan. Iwan sekimej mach kinekij monamiktiskej porke kitemoaj kenik okachi kuale kitekipanoskej in Dios. Akin kinekis yetos iselti, ma yeto kiné iselti.

Jesús okintiochij in pilalaktin

(*Mr. 10:13-16; Lc. 18:15-17*)

¹³Satepan okualinwikilijkej in Jesús sekimej pilalaktin, para inpan ma kintlali imawan, iwan para ma tiotzajtzi por yejwan. Pero imomachtijkawan opéj kinmajwaj katlej okualinwikayaj in pilalaktin.

¹⁴Pero Jesús okinmilwij:

—Xikinkawakan in pilalaktin ma wikikan nonawak, amo xikintzatzakuilikan. Porke in tlakaj katlej yolyamankej ken pilalaktin, kalakiskej ilwikak kan Dios tlanawatia.

¹⁵Jesús okintlalij imawan inpan pilalaktin, iwan satepan oyáj de ompa.

Se tlakatl katlej wel kimopialia omotlapowij iwan Jesús

(*Mr. 10:17-31; Lc. 18:18-30*)

¹⁶Se tlakatl omijkuanij inawak Jesús iwan okitlajtlanij:

—Tlamachtij, tejwatzin wel tikuale tlakatl. ¿Tlan welis itlaj kuale nikchiwas para nikpias nemilistle katlej mach keman tlamis?

¹⁷Jesús okilwij:

—¿Tlanik tinechilwia nikuale tlakatl? Mach onkaj oksé kuale tlakatl, sino san yen Dios. Pero tla tikneki tikalakis ilwikak, moneki xikintlakita itlanawatilwan in Dios.

¹⁸Iwan tlakatl okilwij in Jesús:

—¿Katlij yejkej tlanawatiltin?

Iwan Jesús okilwij:

—Amo xitemikti, amo ximomekati, amo xitlachteki, amakaj xiktlajtoltlatlalili, ¹⁹xikintlakita mopapan iwan momaman, iwan xiktlasojtla mokni ken tej timotlasojtla.

²⁰Iwan yon tlakatl okilwij:

—Nochi yon nikchijtiwitz desde nitzikitzin. ¿Tlan oksé nechpoloa nikchiwas?

²¹Jesús okilwij:

—Tla tikneki tietos entero tikuale tlakatl, xiwia mochan iwan xiknamaka nochí tlan tikpia iwan tomin xikinmaka katlej pobrestin. Ijkón

welis tikpias rikojoyotl ompa ilwikak. Iwan ijkuakón kemaj xiwiki iwan xinemí nowan.

22Pero in tlakatl nijuak ijkón okikakke, oyáj omoyolkokojtiaj, porke sa tekitl okimopialiya.

23Ijkuakón Jesús okinmilwij imomachtijkawan:

—Ipan melajka namechilwia, nik sa tekitl owij para katlej kimopialiaj kalakiskej ilwikak kan Dios tlanawatia. **24**Oksemi namechilwia, ke okachi mach owij para se kameyo panos kan kuyontok in akuxaj ke para se katlej kimopialiaj kalakis kan Dios tlanawatia.

25Imomachtijkawan sa otlajtlachixkej (omomajmawtijkej) nijuak ijkón okikakej, iwan okimolwiayaj entre yejwan:

—¿Akin kiné welis momakixtis?

26Jesús okintlatak, iwan okinmilwij:

—Yin tlamantle in tlakaj mach welij kichiwaj, pero Dios nochí weli kichiwa.

27Toneses in Pedro okilwij:

—Señor, tejwan otikwalkajtejkej nochí tlan otikpiayaj porke tiknekij tiaskej mowan. ¿Tlan tikkajsiskej kiné?

28Jesús okinankilij:

—Ipan melajka namechilwia, itech nekatej tonaltin nijuak nochí moyankuilis, nijuak Nej katlej onimochij nitlakatl nimotlalis itech nosiya katlej kipia weyi imawisotlanex, namejwan noijki katlej nowan anwalajkej anmotlaliskej noijki ipan majtlakte iwan ome siyajtin, para ankinmixkomakaskej in majtlakte iwan ome familias de Israel. **29**Iwan akinmej okiwalkajtejkej inkal, inmikniwan okichtin o noso siwamej, inpapan, inmaman, insiwa, inpilwan, o noso intlal, por Nej, kiresibiroskej sien buelta okachi de tlan okikajtejkej, iwan noijki Dios kinmakas nemilistle katlej mach keman tlamic. **30**Pero miekej yeskej salúltimo katlej axan katej achtoj, iwan yeskej achtoj katlej axan katej salúltimo.

Ejemplo de sekimej tlapalewijkej

20 ¹Porke ompa ilwikak kan Dios tlanawatia yon ken se tlaltekwaj, katlej okiske kualkan okintemoto sekimej tlapalewijkej para kitekiskej uvas. ²Iwan omokajkej kintlaxtlawis se denario tomin por se tonale. Iwan okintitlanke ma tekipanotij itlalaj. ³Satepan in tlaltekwaj okiske kej las nuebe de kualkan, iwan okinmitak itech tiankistle oksekimej tlapalewijkej katlej omajxilijtokaj. ⁴Iwan okinmilwij: “Xiwan namejwan noijki xitekipanotij notlalaj, iwan namechtlahtlawis ijkón ken moneki ankitlaniskej.” Iwan yejwan oyajkej. ⁵In tlaltekwaj oksemi okiske kej tlajko tonale, iwan noijki kej las tres de tiotlakke, okintemoto oksekimej

tlapalewijkej. ⁶Iwan kej las sinko de tiotlakke, oksemi oyáj itech tiankistle iwan okinmajsik oksekimej tlapalewijkej katlej omajxilijtokaj, iwan okinmilwij: “¿Tlanik nian antleyuilijkej iwan mach antekipanoaj?” ⁷Yejwan okinankilijkej: “Porke mach akaj techtlakewa.” Ijkuakón in tlaltekowaj okinmilwij: “Namejwan xiwan noijki xitekipanotij notlalaj, iwan namechtlaxtlawis ijkón ken moneki ankitlaniskej.” ⁸Nijuak otleyuak, in tlaltekowaj okilwij itekipanoj katlej kita in tekitl: “Xikinnotza in tlapalewijkej iwan xikintlaxtlawi, achtoj xikintlaxtlawi katlej okalakej satepan, iwan satepan xikintlaxtlawi katlej achtoj okalakej.” ⁹Toneses oejkokej in tlapalewijkej katlej okalakej kej las sinko de tiotlakke, iwan kada se de yejwan okitlaxtlawijkej se denario tomin. ¹⁰Iwan nijuak okintokaroto kintlaxtlawiskej in tekipanojkej katlej achtoj okalakej, okiyejyekojkej kintlaxtlawianij okachi. Pero noijki okintlaxtlawijkej kada se de yejwan se denario tomin. ¹¹Pero nijuak okintlaxtlawijkej, opéj kixnamikij in tlaltekowaj, ¹²iwan okilwijkej: “Nekatej katlej okalakej satepan otekipanojkej san se ora, iwan otikintlaxtlawij no ken tejwan.” ¹³Pero in tlaltekowaj okinankilij se de yejwan: “Amigo, mach nimitztoktia itlaj tlan amo kuale. ¿Amo otimokajkej ke nimitztlaxtlawis se denario tomin por tinechpalewis? ¹⁴Xikitzi motlaxtlawil iwan xiwia. Nej nikneki nikmakas katlej okalakke satepan noijki ken tej onimitsmakak. ¹⁵¿Amo welis nikchiwas san tlan nej niknekis ika notomin? ¿O noso timoxikoa por wel nikuale tlakatl?”

¹⁶Ijkón kiné, miekej katlej axan katej salúltimo, yeskej achtoj. Iwan katlej axan katej achtoj, yeskej salúltimo. Porke Dios kinnotza miekej tlakaj pero san sekimej kinpejpena para ma yekan iaxkawan.

Jesús okitematiltij de imikilis ya eyi buelta

(Mr. 10:32-34; Lc. 18:31-34)

¹⁷Nijuak Jesús yoyaya para Jerusalén, okinwikak ik se lado in majtlakte iwan ome imomachtijkawan iwan okinmilwij:

¹⁸—Axan tejwan tiawij Jerusalén. Iwan Nej katlej onimochij nitlakatl nechtemaktiskej (nechtemaktiliskej) inmak in tlayekankej tiopixkej iwan inmak in tlamachtijkej de itlanawatil in Moisés. Iwan yejwan nechtlajtlakoltiskej para ma nechmiktikan. ¹⁹Nechtemaktiskej inmak in tlakaj katlej mach judiojtin para ma nechpijpinatikan, para ma nechwitekikan iwan para ma nechmajmasoltikan itech krus. Pero ipan eyi tonale nimoyolkuis (nimoyolitis).

Jacobo iwan Juan iwan innaman okitlajtlankej se favor

(Mr. 10:35-45)

20 Ijkuakón isiwa in Zebedeo, omijkuanij inawak Jesús inwan omen itelpokawan, omotlankuaketzke iyakapan para kitlajtlanilis se favor.

21 Jesús okilwij:

—¿Tlan tikneki?

In tenan okijtoj:

—Nimitztlatlawtia xitlanawati ma motlalikan in yinmej notelpokawan, se ik moyekma iwan oksé ik moopochma, nijuak tejwatzin pewas titlanawatis.

22 Pero Jesús okinankilij:

—Namejwan mach ankimatij tlan ankitlajtlanij.

Jesús okintlajtlanij itelpokawan in yon tenan:

—¿Kox welis namejwan ankixikoskej anpanoskej ken tlan Nej nipanos?

¿Kox welis anmokuateekiskej ika tekokojkayotl katlej ika nimokuateekis?

Iwan yejwan okijtojkej:

—Tiweliskej.

23 Jesús okinmilwij:

—Ipan melajka, namejwan anpanoskej ken Nej nipanos, iwan anmokuateekiskej ika tekokojkayotl katlej ika nimokuateekis. Pero tla anmotlaliskej ik noyekma o noso ik noopochma, mach Nej nikijtos, sino noPapan kintlalis ompa katlej Yej yokinpejpenke.

24 In oksekimej majtlakin momachtijkej nijuak ijkón okikakej, okualankej innawak in yonmej omen iknimej. **25** Pero Jesús okinnottzke, iwan okinmilwij:

—Namejwan kuale ankimatij ke akinmej mochiwaj gobiernojtin de se país, tlanawatiaj ika miek tlanawatile. Iwan tlakaj katlej okachi weyikistokey (weyititokey), yejwan okachi tlanawatiaj chikawak itech se pueblo. **26** Pero namejwan mach ijkón xiekan, sino tla se de amejwan kineki weyikistos, kipia por kintekichiwilis in oksekimej. **27** Iwan akin kineki tlayekantos de yen namejwan, kipia por kintekichiwilis nochtin in oksekimej, **28** ijkón ken Nej katlej onimochij nitlakatl mach oniwalaj para ma nechpalewikan, sino Nej oniwalaj para nitlapalewis iwan para niktemakas nonemilis, iwan ijkón niktlaxtlawas para nikinmakixtis miekey de intlajtlakol.

Jesús okintlachialtij omen tlakaj katlej mach otlachiayaj

(Mr. 10:46-52; Lc. 18:35-43)

²⁹Nikuak yejwan yokistiayaj de itech weyikan de Jericó, miekej tlakaj oyajkej ikuatlapan Jesús. ³⁰Omen tlakaj katlej mach tlachiaj oewatokaj ipan ojtle, iwan nikuak okikakej nik in Jesús opanoaya ik ompa, otzajtikej chikawak okijtokej:

—Señor, iKone in David, xitechiknomati.

³¹In tlakaj okinmajwakej para ayakmo ma tzajtzikan, pero yejwan okachi otzajtikej chikawak:

—Señor, iKone in David, xitechiknomati.

³²Ijkuakón Jesús omoketzke, okinnotzke in omen tlakaj katlej mach tlachiaj, iwan okintlajtlanij:

—¿Tlan ankinekij ma namechtoki?

³³Tones yejwan okilwijkej:

—Señor, tiknekij titlachiaskej.

³⁴Jesús okinmiknomatke, okintlalij imawan ipan inmixtololowan, iwan san niman ijkuakón ya kuale otlachixkej, iwan oyajkej iwan Jesús.

Jesús okalakke itech weyikan de Jerusalén

(Mr. 11:1-11; Lc. 19:28-40; Jn.12 :12-19)

21 Nikuak oajsitoj itech pueblo de Betfagé, inakastlan Olivostepetl mach ok wejkatzin de Jerusalén, ijkuakón Jesús okintitlanke omen imomachtijkawan ²iwan okinmilwij:

—Xiwian itech nekáj pueblo katlej kajki tlayakapan. Ompa ankajsiwej se burra ilpitok iwan ikone. Xikintotomakan iwan xinechinwalwikilikan.

³Iwan tla akaj itlaj amechilwis, xikilwikan nik in Señor kinneki, iwan san niman amechinkawiliki.

⁴Ijkón otlapanok para ma mochiwa tlan okijtoj in profeta:

⁵Xikinmilwikan in tlakaj de Sión:

“Xikita, moRey walmuika monawak,
pasensiatzin, yetiwitz ipan se burrajtzin,
ipan ikone in burra katlej tlamama.”

⁶Ijkuakón imomachtijkawan oyajkej iwan okichijkej ijkón ken Jesús okinmilwij. ⁷Okualwikakej in burra iwan ikonetzin, iwan okinkentilijkej intlakenwan inpan iwan Jesús otlejkok ipan burra. ⁸Iwan tlakaj, sa tekitl miekej oyekaj, okinsojokej intlakenwan ipan ojtle, iwan oksekimej okisojokej ixiwyo in kuanmej. ⁹In tlakaj katlej oyayaj tlayakapan iwan katlej oyayaj tlakuitlapan, otzajtiaz okijtoayaj:

—¡Hosana! ¡Oejkok iKone in rey David! ¡Ma Dios kitiochiwa katlej okiwaltilanke para tlanawatis! ¡Hosana! ¡Ma weyijkatlalito in toTajzin Dios katlej kajki ilwikak!

¹⁰Nijuak Jesús okalakke itech weyikan de Jerusalén, nochtin oyomonkej iwan otlajtlaniaj:

—¿Akin yin tlakatl?

¹¹Iwan tlakaj okijoayaj:

—Yin yen Jesús, in profeta de pueblo de Nazaret, de estado de Galilea.

Jesús okinkixtij in tlanamakakej de ijtk in weyi tiopan

(*Mr. 11:15-19; Lc. 19:45-48; Jn. 2:13-22*)

¹²Satepan Jesús okalakke ijtk weyi tiopan de Dios, iwan okinkixtij nochtin katlej ompa otlanamakatokaj iwan otlakojtokaj. Okintlatlamochilij inmesajwan in tominpatlakej, iwan okintlatlamochilij insiyajwan in palomasnamakakej. ¹³Iwan okinmilwij:

—Itech tiotlajkuilole kijta: “Nokal kinotzaskej kale de tiotzajtzilistle”, pero namejwan ya ankikuepkej se kale de ichtekej.

¹⁴Ompa ijtk in weyi tiopan omikuanikey inawak Jesús sekimej tlakaj katlej mach tlachiaj iwan sekimej koxomej, iwan Jesús okinpajtij. ¹⁵Pero in tlayekankej tiopixkej iwan tlamachtijkej de itlanawatil in Moisés, sa tekitl okualankej nijuak okitakej in milagrostin katlej Jesús okinchiwaya, iwan nijuak okinkakej kenik in pilalaktin otzajtiaz chikawak ijtk in weyi tiopan, nijuak okijoayaj: “¡Hosana! ¡Oejkok iKone in David!” ¹⁶Ijkuakón okilwijkej in Jesús:

—¿Tikkaki tlan kijtaj in yinmej pilalaktin?

Iwan Jesús okinnankilij:

—Aján, nikinkaki. ¿Amo semi ankileroaj in tiotlajkuilole kan tlapoa de yon tlajtole? Kan kijta:

Otikchij ke in pilalaktin iwan konemej katlej ok chiichij,
ma mitztlakuikilikan ika melajka kuale weyikixtilistle.

¹⁷Ijkuakón Yej okinkajtej, okiske de itech yon weyikan, iwan oyáj itech pueblo de Betania iwan ompa omokaj yon yuak.

Jesús okajwak in igoskuawitl

(*Mr. 11:12-14, 20-26*)

¹⁸In kualkan, nijuak Jesús yomokuepaya para Jerusalén, otiojsij.

¹⁹Okitak ipan ojtle se igoskuawitl, omikuaniy kan oyeka yon kuawitl, pero mach itlaj igos okajsik, sino okipiaya san puro ixiwyo. Ijkuakón, Jesús okilwij in igoskuawitl:

—Mach ok semi xitlaki.

Iwan san niman ikuakón in igoskuawitl owakke. ²⁰Nikuak imomachtijkawan ijkón okitakej, sa otlajtlachixkej (omomajmawtijkej) iwan okitlajtlanijkej in Jesús:

—¿Kenik in igoskuawitl owakke san niman?

²¹Jesús okinnankilij:

—Ipan melajka namechilwia, tla ankipiaj tlaneltokalistle iwan amo anmoijtitlapowiskej, amo san yen igoskuawitl welis ankiwatzaskej, sino asta welis ankilwiskej yin tepetl: “Ximikuani de nian iwan ximotlamotla ijistik atl”, iwan ijkón tlapanos. ²²Tla amejwan ankineltokaj nik in Dios amechmakas nochi tlan ankitlajtlaniliskej, toneses xikmatikan nik in Dios melawak amechmakas nijuak anmotiotzajtziliskej.

Jesús okitlajtlanijkej akin okimakak tlanawatijkayotl

(*Mr. 11:27-33; Lc. 20:1-8*)

²³Iwan ikuakón Jesús okalakke ijistik in weyi tiopan, iwan mientras otlamachtijtoka, ikuakón omijkuanijkej inawak in tlayekankej tiopixkej iwan tlayekankej tetajtzitzintin judoijtin, iwan okitlajtlanijkej:

—¿Ika tlan tlanawatijkayotl tikchiwa nochi yin tlamatle tlan tikchijtinemi? ¿Akin omitzmakak yon tlanawatijkayotl?

²⁴Jesús okinnankilij:

—Nej noijki namechtlajtlanis se tlajtole, tla namejwan annechnankiliskej, toneses Nej noijki namechilwis ika tlan tlanawatijkayotl nikchiwa. ²⁵¿Akin okinawatij in Juan ma tlakuateeki? ¿Yen Dios okinawatij, o noso yen tlakaj okinawatijkej?

Iwan opéj kimolwiaj entre yejwan, okijtoayaj:

—Tla tikijtoskej yen Dios okinawatij, techilwis: “¿Tlanik mach ankineltokakej?” ²⁶Iwan tla tikilwiskej ke okinawatijkej in tlakaj, kualaniskej nochtin. Tejwan tikanmiimakasij in tlakaj porke nochtin kimatij nik in Juan oyeka profeta.

²⁷Toneses okinankilijkej in Jesús:

—Mach tikmatij akin okinawatij.

Ikuakón Jesús noijki okinmilwij:

—Pues Nej noijki mach namechilwis ika tlan tlanawatijkayotl nikchiwa.

Ejemplo de se tlakatl iwan omen itelpokawan

²⁸Jesús okinmilwij:

—¿Kenamij ankiyejyekoaj yin ejemplo? Se tlakatl okinpiaya omen itelpokawan. Omijkuanij inawak se, iwan okilwij: “Nokone, xiwia xitekipanoti axan itech nouvasyoj.” ²⁹Itelpoch okinankilij: “Mach nias.” Pero satepan okipatlak itlayeheyekol iwan oyáj otekipanoto. ³⁰In tetaj

omijkuanij inawak oksé itelpoch, iwan noiji okilwij ma wia ma tekipanoti itech iuvasyoj, iwan itelpoch okinankilij: “Kuale kajki, nias.” Pero mach oyáj. ³¹¿Katlij yen de yonmej omen okichij tlan okinekia in tetaj?

Yejwan okijtojkej:

—Yen katlej achtoj okinawatij.

Toneses in Jesús okinmilwij:

—Ipan melajka namechilwia, ke katlej tlakobraroaj ika impuestos iwan siwamej momekatijkej, yejwan achtoj kalakiskej kan Dios tlanawatia iwan namejwan satepan. ³²Porke Juan owalaj oamechmatiltiko kenik welis amoyolkuepaskej inawak Dios, iwan namejwan mach ankineltokakej. Pero katlej tlakobraroaj ika impuestos iwan siwamej momekatijkej, yejwan okineltokakej. Pero namejwan maski ankitakej nik in yejwan omoyolkuepkej, namejwan mach amoyolkuepkej iwan nion mach ankineltokakej tlan oamechilwij in Juan.

In tlatoookakej mach kualtin

(Mr. 12:1-12; Lc. 20:9-19)

³³Xikkakikan yin oksé ejemplo: Oyeka se tetaj katlej ouvastookak. Okikorraltij ika kuawitl. Okichij se tanke para ompa kipatzkas uvas, iwan okichij se torre wejkapan para ipan tlejcos para kimonekuitlawis iuvasyoj.

'Satepan okinkajtewilij sekimej tekipanojkej para ma kimonekuitlawikan iwan satepan kimokawiskej tlaatlajko de tlan kisas, iwan yej oyáj wejka itech oksé país. ³⁴Nijuak oajsik in tonale para uvastekiskej, ijkuakón okintitlanke sekimej itekipanojkawan para ma kikuitij tlan kitokaroa. ³⁵Pero in tekipanojkej okinkitzkijkej iwan okinmagakej itekipanojkawan in tlaltekwaj. In se okimagakej, in se okimiktijkej, iwan oksekimej okinmojmotlakej ika tetl. ³⁶In tlaltekwaj oksemi okintitlanke oksekimej itekipanojkawan, okachi miekej ke achtoj. Pero in tekipanojkej no ijkón okintoktijkej ken katlej achtoj okintitlanke.

³⁷Salúltimo okititlanke ikone, iwan okimolwij: “Kitlakitaskej in nokone.” ³⁸Pero nijuak okitakej ikone, in tekipanojkej okimolwijkej entre yejwan: “Yin ikone yen kimokawis in tlale. Ma tikmiktikan, iwan tejwan tikmoaxkatiskej itlal.” ³⁹Ijkuakón kiné, okinkitzkijkej, okikixtijkej de itech yon uvasyoj, iwan okimiktijkej.

⁴⁰Nijuak witz in tlaltekwaj de yon uvasyoj, ¿tlan kintoktis in yonmej tekipanojkej katlej okinkajtewilij iuvasyoj?

⁴¹Okilwijkej:

—Kinmiktis in yonmej tekipanojkej mach kualtin, iwan mach kinmiknomatis. Iwan satepan kinmaktilis iuvasyoj oksekimej tekipanojkej, katlej kimakaskej tlan kitokaros nijuak ajsis tonale.

42 Toneses Jesús okintlajtlanij:

—¿Amo semi ankileroaj in tiotlajkuilole? In tiotlajkuilole ijkín kijta:

In tetl katlej in kalchijkej mach okixitakej,

omochij yen tetl katlej okachi kichikajtok in kale.

Yin tetl ovalaj de yen toSeñor iwan tejwan tikmotetzawiaj.

43 Por yonik namechilwia, nik namejwan mach ok amechtokaros anyeskej kan Dios tlanawatia, sino kintokaros in tlakaj katlej kitemakaskej in tlakilotl katlej Dios kineki. **44** Iwan akin wetzis ipan yon tetl, kipojpostekis. Iwan tla yon tetl wetzis ipan akaj, sa tekitl kikuejkuechos.

45 Nijuak in tlayekankej tiopixkej iwan fariseos okinkakej yonmej ejemplos katlej Jesús okinmijtoj, okimomakakej kuenta nik yejwan okimilwiftoka. **46** Ijkuakón okinekiaj kikitzkianij in Jesús, pero okinmiimakaskej in tlakaj, porke in tlakaj okineltokayaj nik in Jesús Yej se profeta.

Ejemplo de kan monamiktiaj

22 Jesús oksemi opéj kintlapowia ika ejemplos, okinmilwij:

2 —Kan Dios tlanawatia yon ken se rey katlej okichij se ilwitl nikuak okinamiktij itelpoch. **3** In rey okintitlanke itekipanojkawan ma kinnottatij iinbitadoswan, pero iinbitadoswan mach okinekej oyajkej. **4** In rey oksemi okintitlanke oksekimej itekipanojkawan, okinmilwij: “Xikinmilwikan noinbitadoswan, in tlakuale yokualtik. Notorojwan iwan noyolkawan katlej tojtomawakej yonikinmiktij, iwan nochi ya tlayektlalitok. Ma wikikan ilwitl.” **5** Pero iinbitadoswan mach okichijkej kuenta. Se oyáj otekipanoto itlalaj, se oyáj otasemanato, **6** iwan oksekimej okinkitzkijkej itekipanojkawan in rey, okinmagakej iwan okinmiktijkej. **7** Ijkuakón in rey sa tekitl okualanke, iwan okintitlanke isoldadojwan para ma kinmiktitij katlej otemiktijkej iwan para ma kinchichinilikan inpueblo. **8** Toneses okinmilwij itekipanojkawan: “In tlakuale yokualtik para yen ilwitl, pero nochtin katlej onikinminbitaroj mach okintokaroaya para witzej porke mach kualtin. **9** Xiwian ipan ojtle iwan xikinminbitarokan nochtin akinmej ankinmajsiskej, ma wikikan nian itech ilwitl kan monamiktiaj.” **10** Ijkuakón itekipanojkawan in rey oyajkej ipan ojtle iwan okinmololokjej nochtin katlej okinmajsikej, katlej mach kualtin iwan katlej kualtin. Iwan ijkón in kalijtit otenke de tlakaj itech yon ilwitl kan monamiktiaj.

11 Ijkuakón in rey okalakke kalijtit para kinmitas katlej inbitadostin, okitak ompa oyeka se tlakatl katlej mach omotzotzoltij ken omonekia motzotzoltiani para yon ilwitl kan monamiktiaj. **12** Iwan rey okitlajtlanij: “Amigo, ¿kenik otikalakke nian iwan mach otimotzotzoltij ken moneki para tietos itech yin ilwitl kan monamiktiaj?” Pero in tlakatl mach okinankilij.

13Tones in rey okinmilwij katlej otlaserbirojtokaj: “Xikijilpikan itech ikxiwan iwan itech imawan, iwan xiktlamotlakan kalan ijtk tlatleyualotl, kan chokas iwan motlanteteyitzas.”

14’Porke Dios kinnotza miekej tlakaj pero san sekimej kinpejpena para ma yekan iaxkawan.

Kox se kitlaxtlawas impuestos para César

(*Mr. 12:13-17; Lc. 20:19-26*)

15Ijkuakón in fariseos oyajkej, iwan omotlatlalwijkej kenik kimayawiskej in Jesús ika itlaj tlajtole para ika kitilwiskej. **16**In fariseos okintitlankej sekimej intekipanojkawan iwan sekimej itekipanojkawan in Herodes, para ma kitlajtlaniitij in Jesús:

—Tlamachtij, tikmatij nik tejwatzin tikija tlan melawak, iwan titlamachtia ipan melajka kenik se nemis ken Dios kineki, iwan mach timotekawilia akaj ma mitzkajkayawa, porke mach tikita akin tejwan kox tirikojtin o noso tipobrestin. **17**Xitechilwi kiné, kenamij tikyejyekoa: ¿Kox kuale se kitlaxtlawas impuestos para César o noso amo?

18Pero Jesús okimatia nik mach kuale tlan yejwan okiyejyekoayaj, iwan okinmilwij:

—¿Tlanik ankinekij annechmayawiskej ika itlaj tlajtole? Namejwan san anteixkajkayajkej. **19**Xinechititikan se tomin katlej ika motlaxtlawa impuesto.

Yejwan okimakakej se denario tomin. **20**Ijkuakón Jesús okintlajtlanij:

—¿De akin ixko in yin iwan de akin itoka katlej nian ikuilitok?

21Okinankilijkej:

—De César.

Iwan Jesús okinmilwij:

—Xikmakakan in César tlan de yen César, iwan xikmakakan Dios tlan de yen Dios.

22Nikuak ijkón okikakej, sa otlajtlachixkej (omomajmawtijkej). Satepan okikajtejkej iwan oyajkej.

Okitlajtlanijkej in Jesús kox moyolkuiskej in mikkamej

(*Mr. 12:18-27; Lc. 20:27-40*)

23Itech yon tonale noijki, in saduceos omijkuanijkej inawak Jesús, katlej kijtaj mach melawak moyolkuiskej (moyolitiskej) in mikkamej. Iwan okitlajtlanijkej:

24—Tlamachtij, Moisés okijtoj tla se tlakatl yomonamiktij iwan miki iwan mach okinpixke ipilwan, in ikni in yon difunto kipia de monamiktis iwan viuda para kinpialis ipilwan in ikni in difunto. **25**Ijkón kiné, nian

entre tejwan oyekaj chikomen iknimej. In tetiachka achtoj omonamiktij, iwan omikke. Komo amo okinpixke ipilwan, okajtej isiwa para ikni. ²⁶No ijkón omochij ikni katlej kiwaltoka, iwan satepan no ijkón omochij in oksé katlej kiwaltoka, iwan ijkón omochijkej san ken nochtin chikomen iknimej. ²⁷Iwan satepan de omijmikkej nochtin iknimej noiiki omikke in siwatl. ²⁸Toneses, itech nekáj tonale nijuak moyolkuiskej (moyolitiskej) in mikkamej, ɿkatlij yej de nochtin yonmej chikomen iknimej yetos isiwa? Porke nochtin omonamiktijkej iwan yon siwatl.

²⁹Jesús okinnankilij:

—Namejwan mach ompa tlan ankijtaj, porke mach ankimomakaj kuenta in tiotlajkuilole nion mach ankimomakaj kuenta de ipoder in Dios. ³⁰Porke nijuak moyolkuiskej (moyolitiskej) in mikkamej, in tlakaj iwan siwamej mach monamiktiskej, sino yeskej kej angelestín de Dios ompa ilwikak. ³¹Pero ken ya timotlapowijtokej de yen mikkamej moyolkuiskej, ɿamo ankileroaj tlan Dios oamechilwij? Porke okijtoj: ³²“Nej niDios de Abraham, de Isaac iwan de Jacob.” In Dios mach Dios de mikkamej, sino de katlej yolitokej.

³³In tlakaj nijuak ijkón okikakej, sa otlatlachixkej (omomajmawtijkej) por yen itlamachtil in Jesús.

Itlanawatil in toTajtzin Dios katlej okachi kuale

(Mr. 12:28-34)

³⁴Nijuak in fariseos okimatkej nik in Jesús okinkamatzakke in saduceos, ikuakón yejwan omololojkej inawak Jesús. ³⁵Iwan se de yejwan katlej tlamachtij itech tlanawatile de Moisés, okitlajtlanij para kitlajtlakolmayawis:

³⁶—Tlamachtij, ɿkatlij yen tlanawatile okachi weyi de nochtin in tlanawatiltin?

³⁷Jesús okilwij:

—“Xiktlasojtla in Señor moDios ika nochí moyolo, ika nochí moanima, iwan ika nochí motlalnamikilis.” ³⁸Yen yin tlanawatile okachi weyi iwan yen tlayekantok. ³⁹Iwan onkaj oksé tlanawatile, ikniyo: “Xiktlasojtla mokni ken tej timotlasojtla.” ⁴⁰Yinmej omen tlanawatiltin kijtosneki yen nochí tlan kijta itlanawatil in Moisés iwan nochí tlan kijta intlamachtil in profetajtin.

ɿDe akin iKone in Cristo?

(Mr. 12:35-37; Lc. 20:41-44)

⁴¹Iwan mientras ok oololitokaj in fariseos, Jesús okintlajtlanij,
⁴²okinmilwij:

—¿Tlan ankiyejyekoaj namejwan de yen Cristo? ¿De akin iKone?

Yejwan okilwijkej:

—De yen rey David.

⁴³Toneses Jesús okinmilwij:

—Tla namejwan ijkón ankiyejyekoaj, toneses, ictlanik kiné in David ika Espíritu Santo okinotzke “noSeñor”? Porke David okijtoj:

⁴⁴In toTajtzin Dios okilwij in noSeñor yin tlajtole:

“Ximotlali ik noyekma,

asta ikuak Nej nimitztlalis titlayekanke de yejwan katlej
mitzkokoliaj.”

⁴⁵Ijkón kiné, tla David okinotzke “noSeñor”, ickeniji kiné ma yeto ikone?

⁴⁶Iwan mach akaj owelik okinankilij nion se tlajtole, iwan desde yon tonale nion se mach ok omixewij ok itlaj okitlajtlanij.

Jesús okijtoj mach kuale tlan kichiwaj in fariseos iwan tlamachtijkej de itlanawatil in Moisés

(Mr. 12:38-40; Lc. 11:37-54; 20:45-47)

23 Ijkuakón Jesús okinmilwij in tlakaj iwan imomachtijkawan:
²—In tlamachtijkej de itlanawatil in Moisés iwan fariseos motlaliaj para amechmachtiskej ken otlamachtij in Moisés. ³Ijkón, nochi tlan amechilwiskej xikneltokakan iwan xikchiwakan. Pero amo xikchiwakan tlan yejwan kichiwaj, porke yejwan mach kichiwaj tlan kijtaj. ⁴Porke yejwan kintoktiaj in tlakaj ma kinmamakan miekej tlanawatiltin, katlej sa tekitl owijtitok para se kinxikos. Pero yejwan nion siera ika se inmajpil mach kinekij kajkokuiskej yon tlamamale. ⁵Teixkajkayawaj kichiwaj tlan kuale para ma kinmitakan. Noijki teixkajkayawaj ke yolchipawakej, kitkij wejweyin textos de tiotlajkuilole ijtk kajajtzitzintin de kuettaxtle iwan kimotlaliliaj inmixkuak iwan itech inma. Iwan noijki kiwelitaj kitlaliskej intlaken okachi tenweweyakej ken katlej kinmonakiaj oksekimej tlakaj. ⁶Iwan itech se tlakuale kitemoaj katlej okachi kuale lugar para tlakuaskej, iwan itech tiopanmej kinekij motlaliskej tlayakapan kan motlaliaj katlej okachi tlayekantokej, ⁷iwan kinekij ma kinyektlajpalokan itech tiankistle iwan kinekij ma kinmilwikan tlamachtijkej.

⁸Pero namejwan amo xikchiwakan de ma amechilwikan antlamachtijkej, porke nochtin namejwan anmiknimej iwan ankipiaj san se amoTlamachtij, yen Cristo. ⁹Iwan amakaj xikilwikan “papan” ixko yin tlaltikpak, porke san se namoPapan ankipiaj, katlej kajki ilwikak. ¹⁰Nion amo xikchiwakan ma amechilwikan antlayekankej, porke san se namoTlayekanke ankipiaj, yen Cristo. ¹¹Akin kintekichiwilis oksekimej, yen okachi weyikistos de

yen namejwan. ¹²Porke akin moweyinekis, mopinatis. Pero akin amo moweyinekis, weyikistos.

¹³'iAy de amejwan, antlamachtijkej de itlanawatil in Moisés iwan amejwan anfariseos, anteixkajkayajkej! Porke ankintlatzakuiaj in tlakaj para amo ma kalakikan ilwikak kan Dios tlanawatia. Iwan nion amejwan mach ankalakij, iwan nion amo ankinkawiliaj ma kalakikan akinmej kinekij kalakiskej.

¹⁴'iAy de amejwan, antlamachtijkej de itlanawatil in Moisés iwan namejwan anfariseos, anteixkajkayajkej! Porke namejwan ankinkalkixtiliaj in viudajtin, iwan antlaixkajkayawaj anmotiotzajtziliaj sa tekitl para ma amechitakan ke ankichiwaj tlan kuale. Iwan por yonik namejwan ankitlaxtlawaskej okachi weyi namotlajtlakol.

¹⁵'iAy de amejwan, antlamachtijkej de itlanawatil in Moisés iwan namejwan anfariseos, anteixkajkayajkej! Porke ik nowian (nian nepa) tlaltikpak ankitemoaj akin welis ankitlaneltokitiskej ika namotlamachtil. Iwan nikuak ya ankajsikej, ankikuepaj okachi sa tekitl yolbierotik de ke namejwan. Iwan ijkón aminochtin anyaskej ijtek tliko.

¹⁶'iAy de amejwan, ankatej kej antlayekankej katlej mach antlachiaj! Porke namejwan ankijtaj tla se tlakatl kijtos nik melawak tlan kijta iwan asta kijtos tlachixtok in weyi tiopan, yon mach itlaj kijtosneki, pero tla se tlakatl kijtos nik melawak tlan kijta iwan asta kijtos tlachixtok in oro katlej kajki ijtek in weyi tiopan, yon kipia por kichiwas. ¹⁷iMelawak mach antlachiaj iwan antzontemnej! ¿Katlij yen okachi importante: yen oro, o noso yen weyi tiopan katlej kitiochijtok in oro? ¹⁸Iwan noijki namejwan ankijtaj tla se tlakatl kijtos nik melawak tlan kijta iwan asta kijtos tlachixtok in artal, yon mach itlaj kijtosneki. Pero tla se tlakatl kijtos nik melawak tlan kijta iwan asta kijtos tlachixtok in ofrenda katlej kajki ipan artal, yon kipia por kichiwas. ¹⁹iMelawak mach antlachiaj iwan antzontemnej! ¿Katlij yen okachi importante: yen ofrenda, o noso yen artal katlej kitiochijtok in ofrenda? ²⁰Porke tla se tlakatl kijtos nik melawak tlan kijta iwan asta kijtos tlachixtok in artal, kijtosneki noijki tlachixtok nochí tlan ompa kajki ipan artal. ²¹Iwan tla se tlakatl kijtos nik melawak tlan kijta iwan asta kijtos tlachixtok in weyi tiopan, kijtosneki noijki tlachixtok in Dios katlej ompa chanti. ²²Iwan noijki tla se tlakatl kijtos nik melawak tlan kijta iwan asta kijtos tlachixtok in ilwikak, kijtosneki noijki kijtojtok tlachixtok isiya in Dios, iwan noijki kijtojtok tlachixtok in Dios katlej motlalia itech yon siya.

²³'iAy de amejwan, antlamachtijkej de itlanawatil in Moisés iwan namejwan anfariseos, anteixkajkayajkej! Porke namejwan ankitemakaj namodiesmo de xiwitl ajwiakayotl de menta, de anís iwan de komino. Pero mach ankichiwaj katlej okachi importante tlan kijta in tlanawatile, de se

ma kichiwa tlan melawak, de se ma teiknomati, iwan de se ma tlaneltoka inawak Dios. Kuale in tla se kitemakas diesmo, pero noijki moneki se kichiwas katlej okachi importante. ²⁴Namejwan ankatej kej antlayekankej katlej mach tlachiaj, ankitzejtzeloaj tlan ankonij para amo ma pano kanaj itlaj sayolintzin, ipero ankitoloaj asta se kameyo!

²⁵'iAy de amejwan, antlamachtijkej de itlanawatil in Moisés iwan namejwan anfariseos, anteixkajkayajkej! Porke namejwan ankichipawaj in vaso iwan plato san ik tlixko, pero ik tlijtik anyolbierotikej. Porke namoijtik antentokej de ichtekayotl iwan de nochi tlan amo kuale tlan namejwan ankichiwaj. ²⁶Namejwan anfariseos mach antlachiaj. Achtoj xikchipawakan in vaso iwan plato ik tlijtik, iwan ijkón anyeskej anchipawakej noijki ik tlixko.

²⁷'iAy de amejwan, antlamachtijkej de itlanawatil in Moisés iwan namejwan anfariseos, anteixkajkayajkej! Porke namejwan ankatej ken mikkakuyoktin katlej ik tlixko motaj kuakualtzitzintin, pero ik tlijtik tentokej de omitl de mikkamej iwan de nochi pitzoyotl. ²⁸Ijkón noijki namejwan, ik tlixko anmotaj kej ankaultin tlakaj, pero ik tlijtik antentokej de teixkajkayawalistle iwan de tlajtlakole.

²⁹'iAy de amejwan, antlamachtijkej de itlanawatil in Moisés iwan namejwan anfariseos, anteixkajkayajkej! Porke namejwan kuakualtzin ankinchiwiliaj inmikkakuyokwan in profetajtin, iwan antlachijchiwaj kan toktokej katlej oyajkej kualtin tlakaj. ³⁰Iwan ankijtaj: "Tla tejwan ya tienij itech nekatej tonaltin nikuak oyekaj in ya wejkawitl toweyitajwan, mach tikinpalewianij tikinmiktianij in profetajtin." ³¹Ika yon, namejwan amonewian ankimokuitiaj nik antepilwan de nekatej tlakaj katlej okinmiktijkej in profetajtin. ³²Xikyakatlamican kiné, in tlajtlakole katlej okipewaltijkej in ya wejkawitl namoweyitajwan.

³³'iKoamej! iNamejwan kej ankoamej! ¿Kenik ancholoskej de yen tlajyowilistle de ijtk tliko? ³⁴Por yonik, Nej ok namechinwalintitlanilijtos sekimej profetajtin iwan sekimej tlamachtijkej itech yankuik tlanawatile. Pero namejwan sekimej ankinmiktiskej iwan sekimej ankinmajmasoltiskej itech krus, iwan oksekimej ankinwitekiskej itech namotiapanwan, iwan oksekimej ankintlatlalochtijinemiskej nian nepa itech pueblojtin kan ajsiskej. ³⁵Ijkón kiné, amopan wetzis in tlajtlakole de nochtin in tlakaj katlej kualtin katlej okinmiktijkej, desde yen Abel katlej oyáj kuale tlakatl asta Zacarías ikone in Berequías, katlej namejwan ankinmiktijkej ijtk in weyi tiapan iyakapan artal. ³⁶Ipan melajka namechilwia, nik nochi in yon tlajtlakole wetzis inpan tlakaj katlej axan katej.

Jesús ochokak por yen weyikan de Jerusalén

(Lc. 13:34-35)

³⁷¡Ay, Jerusalén, Jerusalén, tej tikinmiktia in profetajtin iwan tikinmojmotla ika tetl katlej Dios kualintitlani monawak! ¡Miekpa oniknekke nikinmololos mokonewan, ken se pio kinmololoa ikonewan itlampa iajaswan, pero mach otiknekke! ³⁸Axan Dios mach ok amechpalewis, sino amechkawas. ³⁹Por yonik kiné, namechilwia nik mach oksemi annechitaskej asta ma ajsiki nekáj tonale nijuak namejwan ijkín ankijtoskej: “¡Ma Dios kitiochiwa katlej okiwaltitlanke para tlanawatis!”

Jesús okijtoj in weyi tiopan xitinis

(Mr. 13:1-2; Lc. 21:5-6)

24 Jesú斯 okiske de kan weyi tiopan, iwan nijuak yoyaya, ijkakón imomachtijkawan omikuanikey inawak iwan opéj kititiaj in wejweyin kalmej katlej iaxkawan in weyi tiopan. ²Iwan Jesú斯 okinmilwij: —¿Ankinmitaj nochtin in yonmej wejweyin kalmej? Ipan melajka namechilwia, nian mach ok mokawas pepechitos nion se tetl ipan oksé tetl, nochi xitinis.

Ijkín tlapanos antes de tlamis in tlaltikpak

(Mr. 13:3-23; Lc. 21:7-24; 17:22-24)

³Satepan oyajkej ipan tepetl katlej itoka Olivostepetl. Iwan nijuak Jesú斯 omotlalij ompa, imomachtijkawan omikuanikey inawak ichtaka, iwan okilwijkey:

—Xitechilwi, ¿keman tlapanos iwan katlij yen señas tikchiaskej nijuak tiwalmukas? ¿Iwan keman tlamis in tlaltikpak?

⁴Jesú斯 okinnankilij:

—Xikpiakan kuidado, amakaj ma amechkajkayawa. ⁵Porke miekey witzej ika notoka kijtoskej: “Nej niCristo”. Iwan miekey kinkajkayawaskej. ⁶Namejwan ankimatiskej onkaj guerra iwan motlapowiskej yetos guerra, pero amo ximomawtikan, ijkón kipia de tlapanos. Pero ayamo tlamis in tlaltikpak. ⁷Se país momagas iwan oksé país, iwan se pueblo momagas iwan oksé pueblo. Yetos apostle, yetos kokolistle, iwan tlalolinis nian nepa. ⁸Pero nochí yon tlajyowilistle yakin ik pewas ken nijuak se siwatl pewa ijtkualo nijuak ya ajsi ora kitlakatilis ikone.

⁹Ijkakón namejwan amechtemaktiskej (omechtemaktiskej) para amechkojkokoskej iwan amechmiktiskej. Nochtin amechkokoliskej por annechneltokaj. ¹⁰Itech nekatej tonaltin miekey wetziskej ipan tlajtlakole iwan mach ok tlaneltokaskej inawak Dios, mokokoliskej se iwan oksé,

iwan motemaktiskej se iwan oksé. ¹¹Monextiskej miekej tekajkayajkej profetajtin, iwan kinkajkayawaskej miekej. ¹²Sa tekitl momiekilis miek tlajtlakole, iwan miekej mach ok motlasojtlaskej nion se iwan oksé. ¹³Pero akin kixikos nochí tlan panos, Dios kimakixtis. ¹⁴Iwan yin kuale tlajtole katlej temakixtia de kenik in Dios tlanawatia, motematiltis itech nochí in tlaltikpak, para ke nochtin in tlakaj de nochtin paismej ma kimatikan. Iwan ikuakón tlamis in tlaltikpak.

¹⁵'Noijki namejwan ankitaskej tlapanos tlan okijuiloj in profeta Daniel, okijtoj ajsis tonale namejwan ankitaskej moketos itlaj bierotik Kan Tlatiochiwalojkan de yen weyi tiopan kan amo kipia de ompa yetos —akin kileros yin tlan okijuiloj in Daniel, ma kimomaka kuenta—, ¹⁶ijuakón katlej yeskej Judea, ma cholokan asta inpan tepemej. ¹⁷Iwan akin yetos ipan ikal amo ma temo ma kixtiti itlaj ikalijtik. ¹⁸Iwan akin yetos itlalaj, amo ma mokuepa ichan para ma kikuiti itzotzol. ¹⁹iPobrestin siwamej katlej itech nekatej tonaltin kipiaskej inkone intlalaxko iwan katlej selikkonewajkej! ²⁰Xiknotzakan Dios amo ma amechtokaro ancholoskej nikuak meroj sewa, iwan nion nikuak weyi tonale. ²¹Porke ikuakón yetos miek tlajyowilistle iwan temawtij, ken mach semi ijkón tlamochiwa desde ikuak opéj in tlaltikpak asta axan, iwan nion mach oksemi ijkón tlamochiwas satepan. ²²Iwan tla Dios amo kitzikitziniliani in yonmej tonaltin mach akaj momakixtiani. Pero yokitzikitzinilij por yejwan katlej Dios kintlasojtla katlej Yej yokinpejpenke.

²³Ikuakón, tla akaj amechilwis: "Xikitakan, nian kajki in Cristo", o noso "Xikitakan, nepa kajki", amo xikneltokakan. ²⁴Porke monextiskej Cristojtin iwan profetajtin tekajkayajkej, iwan kinchiwaskej señalestin iwan milagrostin, para ika tlakajkayawaskej, iwan kinekiskej kinkajkayawaskej noijki katlej Dios yokinpejpenke. ²⁵Nej yonamechilwij antes de tlamochiwas. ²⁶Por yonik, tla amechilwiskej: "Xikitakan, nepa kajki kan tlawaki", amo xiwan. Iwan tla amechilwiskej: "Xikitakan, nian kajki itech kuarto", amo xikneltokakan. ²⁷Porke ijkón ken ikuak tlapejpetlani ik ikisayan tonale iwan tlawia asta ik ipoliwian tonale, ijkón Nej noijki akin onimochij nitlakatl ik nian nepa nechitaskej nikuak niwitz. ²⁸Ijkón ken nikuak tikanmitaj in tzojpilomej pewa mololoaj kan kajki se mikkatl.

Jesús walmokuepas oksemi

(Mr. 13:24-37; Lc. 21:25-33; 17:26-30, 34-36)

²⁹Iwan san niman nikuak panos in tlajyowilistle itech nekatej tonaltin, in tonale tlanexosewis, in metztle sewis, mach ok metztonas, in sitlaltin wetziskej de ilwikak, iwan chikawalistin katlej katej ilwikak papatlakaskej (bibioskej). ³⁰Iwan ikuakón motas se señal de Nej katlej onimochij

nitlakatl, ninesis itech ilwikak, iwan ikuakón nochtin in tlajtlakolejkej de ixko yin tlaltikpak chokaskej nikuak nechitaskej niwitz ijlik mixtle de ilwikak, ika miek nopoder iwan ika weyi nomawisotlanex.³¹ Iwan nikinwalintitlanis noangelwan, iwan ika se chikawak tlapitzalistle, kinmololoskej in tlakaj katlej Nej yonikinpejpenke de ik nowian (nian nepa) ixko yin tlaltikpak.

³²'Xikmomakakan kuenta in ejemplo de yen igoskuawitl: Nikuak peva moselialtia imamayo iwan peva moxiwyotia, namejwan ya ankimatiij nik ya pevas tlaxiwyaoas.³³Ijkón nojki, nikuak namejwan ankitaskej nochti in yon ya pevas tlapanos, ikuakón nojki xikmatikan nik in Nej katlej onimochij nitlakatl ya niwalkistiwit kaltempa. ³⁴Ipan melajka namechilwia, nik nochti in yin tlapanos antes de mikiskej in tlakaj katlej katej itech yinmej tonaltin.³⁵In ilwikak iwan yin tlaltikpak mach ok yetoskej, nochti poliwiwaskej, pero notlajtol mach poliwiwas, sino kipia de mochiwas.

³⁶'Mach akaj kimati tlan tonale iwan tlan ora nikuak niwalmokuepas, nion yen angelesti de ilwikak mach kimatiij, nion Nej niiKone in Dios no mach nikmati, san yen noPapan Dios kimati.

³⁷'Iwan ijkón ken oyeka itech tiempo de Noé, no ijkón yetos nikuak niwitz Nej katlej onimochij nitlakatl.³⁸Itech nekatej tonaltin, antes de mokajkawani in tlamawisolkiawatl, in tlakaj oilwitlakuayaj iwan okoniaj, omonamikiayaj iwan okintlajtlaniaj ichpokamej. Ijkón okichijtokaj asta itech nekáj tonale nikuak in Noé okalakke ijlik in weyi barko.³⁹In tlakaj mach okichijkej kuenta asta ikuak ovalaj in tlamawisolkiawatl iwan nochtin okinmiktij. No ijkón tlapanos nikuak niwitz Nej katlej onimochij nitlakatl.⁴⁰Nikuak Nej niwitz, omen tlakaj sepantekipanojtoskej intlalaj. Se kiwikaskej iwan oksé kikajtewaskej.⁴¹Omen siwamej sepantistoskej inkalijtik. Se kiwikaskej iwan oksé kikajtewaskej.

⁴²'Xijsatokan, kiné, porke mach ankimatiij tlan ora witz namoSeñor.⁴³Xikmomakakan kuenta yin tlamantle, tla se tetaj kimatin tlan ora witz in ichtekke, ijsatoni iwan amo kitekawiliani akaj ma kalaki ikalijtik para ma kitlachteki.⁴⁴Por yonik, namejwan nojki kuale ximoyektlalikan. Porke Nej katlej onimochij nitlakatl niwitz nikuak namejwan mach annechchiaj.

In tekipanojkej katlej kualtin iwan katlej mach kualtin (Lc. 12:41-48)

⁴⁵'¿Namejwan kox antekipanojkej de konfiansa iwan antlalnamikilisejkej, katlej toSeñor oamechtalij xikitakan in tekitl itech ichan iwan xikintlamakan in tekipanojkej nikuak ajsis ora?⁴⁶Xipakikan namejwan tla ikuak niwalmokuepas namechajsiki ankichijtokej tlan onamechnawatij.

⁴⁷Ipan melajka namechilwia, nik namechtalis xikitakan nochí tlan noaxka.
⁴⁸Pero tla amejwan mach ankualtin antekipanojkej iwan ankiyejyekoskej ke niwejkawas para niwalmokuepas, ⁴⁹iwan tla pewa ankinwitekij in oksekimej tekipanojkej, iwan pewa anmiilwitlakuaj iwan antlawanaj, ⁵⁰namoSeñor witz itech se tonale níkuak namejwan mach ankichiáj, iwan itech se ora katlej namejwan mach ankimatiј. ⁵¹Sa tekitl amechwitekis, iwan amehtalis inwan teixkajkayajkej kan anchokaskej iwan anmotlantet eyitzaskej.

Se ejemplo de majtlaktin ichpokamej

25 ¹Kan Dios tlanawatia tlamočiwas ken omochijkej in majtlaktin ichpokamej katlej okitkikej inkandil iwan oyajkej okinamikitoj in novio. ²Makuile de yonmej ichpokamej oyekaj tlalnamikilisejkej iwan ok makuiltin amo. ³Katlej mach oyekaj tlalnamikilisejkej, níkuak okitkikej inkandil, mach okitkikej inmaseite para kintemitiskej oksemi. ⁴Pero oksekimej ichpokamej katlej tlalnamikilisejkej okitkikej inboteya de aseite iwan inkandil. ⁵Iwan como in novio mach oejkoya totoka, okochisnekkej in ichpokamej, iwan okochkej. ⁶Satepan, kej tlajko yuak, okikakej se tlajtote: “¡Ompa witz in novio, xiknamikitij!” ⁷Toneses noctin in ichpokamej omejtewakej iwan okinyektlalijkej inkandilwan. ⁸Iwan in makuiltin ichpokamej katlej mach tlalnamikilisejkej okinmilwijkej in oksekimej makuiltin katlej tlalnamikilisejkej: “Xitechmakakan sekin namoaseite, porke tokandilwan ya sewtokej.” ⁹Pero in ichpokamej tlalnamikilisejkej okinnankilijkej: “Amo, porke tla tamechmakaskej mach kajxilis nion para tejwan. Okachi kuale xiwan xikmokowitij kan kinamakaj.” ¹⁰Pero níkuak in makuiltin ichpokamej katlej mach tlalnamikilisejkej oyajkej okimokowitz inmaseite, ijkuakón oejkok in novio. In ichpokamej katlej yomoyektlalijkej okalakej iwan novio itech yon ilwitl kan monamiktia in novio, iwan omotzakke in puerta. ¹¹Satepan oejkokej in oksekimej makuiltin ichpokamej katlej mach okipiayaj inmaseite, otlatatalatzkej iwan okijtojkej: “¡Señor, xitechtlatlapoli!” ¹²Pero yej okinnankilij: “¡Mach namechixmati akin namejwan! ¡Xiwan!”

¹³Ijkuakón Jesús okinmilwij:

—Por yonik, namejwan xijsatokan, porke mach ankimatiј tlan tonale nion tlan ora níkuak Nej katlej onimochij nitlakatl niwitz.

Ejemplo de sekimej tekipanojkej iwan de sekin tomin

¹⁴Kan Dios tlanawatia yon ken se tlakatl katlej antes de kisas para oksé país, okinnotzke itekipanojkan iwan okinmakak itomin para ika ma tekipanokan.

¹⁵Se itekipanoj okimakak makuile mil pesos, oksé okimakak ome mil pesos, iwan oksé okimakak mil pesos. Okinmakak según tlan yejwan welinij kitekipanoltianij. Satepan yon tlakatl okiske iwan oyáj wejka. ¹⁶In tekipanoj katlej okimakakej makuile mil pesos, okichij negosio ika, iwan okitlanke ok makuile mil pesos. ¹⁷Iwan tekipanoj katlej okimakakej ome mil pesos, noijki okitlanke ok ome mil pesos. ¹⁸Pero oksé tekipanoj katlej okimakakej mil pesos, okitookak in tomin ijtk tlale para amo kipolos.

¹⁹Opanok tiempo, inteko omokuepato, iwan opéj kinchiwilia kuenta. ²⁰In tekipanoj katlej okimakakej makuile mil pesos, okimakak iteko ok makuile mil pesos, iwan okilwij: “Señor, otinechmakak makuile mil pesos, nian kajki ok makuile mil katlej oniktlanke.” ²¹Iwan iteko okilwij: “Kuale otikchij. Tej tikuale tinotekipanoj iwan de konfiansa. Iwan komo kuale otiktekipanoltij tlan tzikitzin onimitzmakak, por yonik axan nimitzialis xikita okachi miek tlamantle. Axan, xikalaki iwan nowan xipaki.” ²²In tekipanoj katlej okimakakej ome mil pesos okitemakak ikuenta ijkín: “Señor, otinechmakak ome mil pesos, nian kajki ok ome mil katlej oniktlanke.” ²³In iteko okilwij: “Kuale otikchij. Tej tikuale tinotekipanoj iwan de konfiansa. Iwan komo kuale otiktekipanoltij tlan tzikitzin onimitzmakak, por yonik axan nimitzialis xikita okachi miek tlamantle. Axan, xikalaki iwan nowan xipaki.” ²⁴Pero in tekipanoj katlej okimakakej mil pesos, okilwij in iteko: “Señor, komo nikmati nik wel chikawak titlanawatia, iwan tikmoaxkatia tlan amo otiktlanke iwan tkmopixkia tlan amo otiktookak, ²⁵onimomawtij, iwan okachi kuale oniklaatij motomin. Pero nian kajki, ajsitok nochi motomin.” ²⁶Iteko okinankilij: “Tej mach tikuale tinotekipanoj iwan titlatziwe, tla otikmatia nik oniknekia nigmokawiani tlan tiktlanini, ²⁷siera tikonkawani notomin itech banko para kitlanini ikoneyo, para nijuak niekoni, nikresibiroani notomin iwan tlan yokitlanke.” ²⁸Ikuakón iteko okinmilwij katlej ompa oyekaj: “Xikixtilikan in mil pesos, iwan xikmakakan katlej kipia majtlakte mil. ²⁹Porke akin kipia, okachi kimakaskej, iwan kipias okachi miek. Iwan akin amo kipia, kikixtiliskej asta yen tzikitzin tlan kipia. ³⁰Iwan yin tekipanoj tlatziwe, xiktlamotlakan kalan ijtk tlatleyualotl kan chokas iwan motlanteteyitzas.”

Tlaixkomakalistle para nocthin tlaltikpaktlakaj

³¹Iwan nijuak Nej katlej onimochij nitlakatl niwitz ika nomawisotlanex inwan nocthin noagelwan, ikuakón nimotlalis itech nosiya katlej kipia imawisotlanex para nitlaixkomakas (nitlatzonmanas). ³²Iwan nocthin in tlakaj de nocthin paismej moloskej noyakapan, iwan nikinseladojkixtis ken se tlajpixke kinseladojkixtia ichkamej iwan

tentzomej.³³ Nochkawan nikintlalis ik noyekma iwan tentzomej nikintlalis ik noopochma.³⁴ Ijkuakón Nej niRey nikinmilwis katlej yeskej ik noyekma: “Xiwikikan namejwan, katlej oamechtiochij noPapan. Xiwikikan iwan xikalakikan kan nitlanawatia kej niRey, kan Dios otlayektlalij para amejwan desde ikuak okichij in tlaltikpak.³⁵ Porke nikuak Nej onitiojsij, namejwan annechtlamakakej. Nikuak Nej onamikke, namejwan annechatlitijkej. Nikuak mach onikpiaya kan nimokalotis (nimotepialtis), namejwan annechkalotijkej.³⁶ Nikuak mach onikpiaya tlan nikonakis, namejwan annechmakakej notzotzol. Nikuak onimokokoj, namejwan annechtlajpalotoj. Nikuak onitzaktoka telpiloyan, namejwan annechitatoj.”³⁷ Ijkuakón katlej oyajkej kualtin tlakaj kijtoskej: “Señor, ¿keman otimitzitakej otitiojsij, iwan otimitztlamakakej? ¿O noso keman otimitzitakej otamikke, iwan otimitzatlitijkej?³⁸ ¿O noso keman otimitzitakej amo otikpiaya kan timokalotis, iwan otimitzkalotijkej, o noso amo otikpiaya tlan tikonakis, iwan otimitzmakakej motzotzol?³⁹ ¿O noso keman otimitzitakej otimokokoj, o noso otitzaktoka telpiloyan, iwan otiajkej otimitzitatoj?”⁴⁰ Nej niRey nikinnankilis: “Ipan melajka namechilwia, ke nochí tlan ankichijkej por nochtin yinmej nokniwan maski sensiyojtzitzintin, kijtosneki yen Nej nannechchiwilijkej.”

⁴¹ Ijkuakón noiiki Nej niRey nikinmilwis katlej yeskej ik noopochma: “Xitzinkisakan de Nej, namejwan mach ankuaultin. Xiwian ijlik tlitl katlej mach keman sewis katlej Dios okichij para yen diablo iwan iangelwan.⁴² Porke ikuak onitiojsij, namejwan mach annechtlamakakej. Nikuak onamikke, namejwan mach annechatlitijkej.⁴³ Nikuak amo onikpiaya kan nimokalotis, namejwan mach annechkalotijkej. Nikuak amo onikpiaya tlan nikonakis, namejwan mach annechmakakej notzotzol. Nikuak onimokokoj iwan nikuak onitzaktoka telpiloyan, namejwan mach annechitatoj.”⁴⁴ Iwan ikuakón yejwan nechilwiskej: “Señor, ¿keman otimitzitakej otitiojsij o noso otamikke, o noso amo otikpiaya kan timokalotis, o noso amo otikpiaya tlan tikonakis, o noso otimokokoj, o noso otitzaktoka telpiloyan, iwan amo otimitzpalewijkej?”⁴⁵ Ijkuakón Nej niRey nikinnankilis: “Ipan melajka namechilwia, ke nikuak namejwan mach ankinekej ankinpalewijkej nokniwan, maski sensiyojtzitzintin, kijtosneki yen Nej mach annechpalewijkej.”⁴⁶ Iwan yonmej katlej mach kualtin yaskej iktlanke (ik tlami) kan tlajyowiskej, iwan katlej yolchipawakej kalakiskej kan kipiaskej nemistle kan mach keman tlamis.

Okitemojkej kenik kimiktiskej in Jesús

(*Mr. 14:1-2; Lc. 22:1-2; Jn.11 :45-53*)

26 Níkuak in Jesús otlanke okijtoj nochí in yon tlajtole, okinmilwij imomachtijkawan:

²—Namejwan ya ankimatij, nik sa ome tonale polawi para yen ilwitl itoka pascua. Iwan Nej katlej onimochij nitlakatl nechtemaktiskej (nechtemaktiliskej) para nechmajmasoltiskej itech krus.

³Itech yonmej tonaltin in tlayekankej tiopixkej, iwan tlamachtijkej de itlanawatil in Moisés iwan tlayekankej tetajtzitzintin judiojtin, omololojkej kan patio de yen palacio kan chanti in weyi tiopixke itoka Caifás. ⁴Ompa omotlapowijkej para kitemoskej kenik kikitzkiskej in Jesús ika itlaj tlakajkayawalistle para ijkón welis kimiktiskej. ⁵Pero okijtoayaj:

—Mach tikitzkiskej itech ilwitl, para amo kualaniskej in tlakaj iwan yomoniskej.

Se siwatl okiteekilij ajwiakayotl in Jesús ipan itzontekon

(*Mr. 14:3-9; Jn.12 :1-8*)

⁶Jesús oyeka itech pueblo de Betania, ichan Simón, katlej Jesús okipajtij níkuak opalania inakayo. ⁷Ijkuakón se siwatl omíkuani inawak Jesús katlej okitkia se boteyajtzin de alabastro tentok de ajwiakayotl katlej patíoj, iwan okiteekilij in Jesús ipan itzontekon kan oewatoka itech mesa. ⁸Níkuak imomachtijkawan ijkón okitakej, okuankej iwan okijtojkej:

—¿Tlanik yin siwatl san okawiltij in ajwiakayotl? ⁹Porke welini monamakaní patíoj, iwan se kinmakani in tomin katlej pobrestin.

¹⁰Jesús okikakke, iwan okinmilwij:

—¿Tlanik anmokuejsoaj inawak yin siwatl? Porke kuale tlan okichij.

¹¹In pobrestin nochipa ankinpiaskej, pero Nej mach nochipa annechpiaskej.

¹²Yin siwatl níkuak onechteekilij ajwiakayotl itech notlalnakayo, kijtosneki okiyektlalij notlalnakayo para níkuak nimotookas. ¹³Ipan melajka namechilwia, ke ik nowian (nian nepa) ixko yin tlaltikpak kan motematiltis in tlajtole katlej temakixtia, nojki se kitemakas kuenta de tlan okichij in yin siwatl iwan ijkón se kelnamikis.

Judas okitemaktij (okitemaktilij) in Jesús

(*Mr. 14:10-11; Lc. 22:3-6*)

¹⁴Ijkuakón se imomachtijkaw itoka Judas Iscariote de yen majtlaktele iwan omen momachtijkej, oyáj omotlapowito inwan tlayekankej tiopixkej ¹⁵iwan okinmilwij:

—¿Kech annechmakaskej tla namechmaktilis in Jesús?

Toneses yejwan okilwijkej kimakaskej senpoale iwan majtlakte tomin de plata. ¹⁶Iwan desde ikuakón Judas opéj kitemoa kenik welis kinmaktilis in Jesús.

Tiotlakantlakuale de toSeñor

(*Mr. 14:12-25; Lc. 22:7-23; Jn.13 :21-30; 1Co.11 :23-26*)

¹⁷Nijuak opéj in ilwitl de pascua yakin se tonale, nijuak mokua in pan katlej mach kipia lefadura, ikuakón imomachtijkawan Jesús omikuaniijkej inawak, iwan okitlajtlanijkej:

—¿Kan tikneki ma tikyektlalitij in tiotlakantlakuale de pascua para tkmomajsewis?

¹⁸Yej okinmilwíj:

—Xiwian itech weyikan de Jerusalén, ichan se tlakatl katlej iwan yonimotlapowij iwan xikilwikan: “In Tlamachtij kijta: Yoajsiko noora, moneki mochan nikmomajsewis in tiotlakantlakuale de pascua iwan nomomachtijkawan.”

¹⁹Imomachtijkawan okichijkej ijkón ken okinnawatij in Jesús, iwan okiyektlalijkej in tiotlakantlakuale de pascua.

²⁰Nijuak olatleyuak, Jesús omotlalij itech mesa inwan majtlakte iwan omen imomachtijkawan. ²¹Iwan nijuak otlakuajtokaj, Jesús okinmilwíj:

—Ipan melajka namechilwia, nik se de amejwan nechtemaktis (nechtemaktilis).

²²Yejwan sa tekitl omoyolkokojkej, iwan opéj kitlajtlaniaj kada se de yejwan:

—Señor, ¿kox yen nej?

²³Jesús okinnankilij:

—Katlej kajakia ipan ijtk plato kan Nej noiji niakakia nopen, yen yon katlej nechtemaktis (nechtemaktilis). ²⁴Nej katlej onimochij nitlakatl nimikis ijkón ken kijta in tiotlajkuilole. Pero ipobre in tlakatl katlej nechtemaktis! Okachi kuale mach tlakatini yon tlakatl.

²⁵Ikuakón okitlajtlanij in Judas, katlej kitemaktis, iwan okilwíj:

—Tlamachtij, ¿kox yen nej?

Jesús okinankilij:

—Aján, tej meroj.

²⁶Mientras otlakuajtokaj, Jesús okitilanke in pan, iwan omotlaokamatke inawak Dios, satepan okipojpostekke in pan iwan okinmajmakak imomachtijkawan, iwan okinmilwíj:

—Xikkuakan. Yin yen notlalnakayo.

²⁷Ikuakón okitilanke in kopa, iwan omotlaokamatke inawak Dios, satepan okinpanoltilij imomachtijkawan, iwan okinmilwíj:

—Xikonikan yin kopa aminochtin. ²⁸Yin yen noeso, katlej yankuik akuerdo, katlej toyawis para ijkón miekej tlapojpolwiloskej de intlajtlakol. ²⁹Pero namechilwia, ke desde axan mach ok nikonis iayo uvas asta nekáj tonale nikuak amowan nikonis iayo uvas yankuik katlej onkaj kan noPapan tlanawatia.

Pedro okijtoj mach kixmati in Jesús

(*Mr. 14:26-31; Lc. 22:31-34; Jn.13 :36-38*)

³⁰Satepan de okitlakuikakej se tiotlakuikale, oyajkej ipan Olivostepetl.

³¹Iwan ijkuakón Jesús okinmilwij:

—Namejwan aminochtin annechkajtewaskej noselti yin yuak, porke in tiotlajkuilole kijta: “Nikmiktis in tlajpixke iwan ichkamej xixiniskej.”

³²Pero satepan de nimoyolkuis (nimoyolitis), Nej sa nitlayekanas para Galilea iwan satepan namejwan ompa annechitajsij.

³³Ijkuakón Pedro, okilwij:

—Maski nochtin ma mitzkajtewakan, nej mach nimitzkawas.

³⁴Toneses Jesús okinankilij:

—Ipan melajka nimitzilwia nik yin yuak, antes de tzajtzis in kaxtil, ijkuakón tej yotikijtoj eyi buelta nik mach tinechixmati.

³⁵Iwan Pedro okilwij:

—Maski mowan ma nechmiktikan, nej mach keman nimitzkawas.

Iwan nochtin imomachtijkawan no ijkón okijtojkej.

Jesús omotiotzajtzilij kan tlatokkuawyoj itoka Getsemaní

(*Mr. 14:32-42; Lc. 22:39-46*)

³⁶Ijkuakón Jesús okinwikak imomachtijkawan se lugar tlatokkuawyoj itoka Getsemaní, iwan okinmilwij:

—Nian ximotlalikan, mientras Nej niawi nimotiotzajtziliti ik ne.

³⁷Okiwikak in Pedro iwan omen ipilwan in Zebedeo, iwan Jesús opéj sa tekitl mosentiroa iwan opéj moyolkokoa sa tekitl. ³⁸Ijkuakón Jesús okinmilwij:

—Nikmachilia itech noanima ya niixpoliwi de neyolkokole. Nian ximokawakan xiijsatokan nowan.

³⁹Jesús oyáj ok achitzin ik tlayakapan, ompa omotlankuaketzke asta okitennamikke in tlale, iwan omotiotzajtzilij okijtoj:

—Papan, in tla welis, xinechkixtili in yin tekokojkayotl. Pero amo ma mochiwa ken Nej nikneki, sino ken tejwatzin tikmonekiltia.

⁴⁰Ijkuakón Jesús omokuepke kan oyekaj eyin imomachtijkawan, iwan okinmajsitajsik kochtokej. Iwan okilwij in Pedro:

—¿Amo ankixikojkej nion se ora anmijsatokej nowan? ⁴¹Xiijsatokan iwan ximotiotzajtzilijtokan, para amo ma amechmayawi in tlajtlakole. Namoespíritu kineki kichiwas tlan kuale, pero namotlalnakayo mach tlaxikoa.

⁴²Jesús oyáj ipan ojpatian omotiotzajtzilito, iwan omotiotzajtzilij ijkín:

—Papan, tla amo welis nimakisas de itech yin tekokojkayotl, tonses ma mochiwa kiné tlan tejwatzin tikmonekiltis.

⁴³Oksemi omokuepke kan oyekaj imomachtijkawan, iwan oksemi okinmajsitajsik kochtokej, porke inpan omopachoj in kochilstle. ⁴⁴Oksemi okinkajtej, iwan oyáj omotiotzajtzilito ya eyi buelta, iwan oksemi okijtoj tlan achtoj okijtoj. ⁴⁵Satepan oyáj kan oyekaj imomachtijkawan, iwan okinmilwij:

—Axan keman xikochikan iwan ximosewikan. Yoajsik ora, Nej katlej onimochij nitlakatl ya nechtemaktiskej (nechtemaktiliskej) inmak in tlakaj tlajtlakolejkej. ⁴⁶Ximewakan, ma tiwian. Yompa witz katlej nechtemaktis.

Jesús okikitzkijkej

(Mr. 14:43-50; Lc. 22:47-53; Jn. 18 :2-11)

⁴⁷Jesús ok otlapojojtoka nijuak oekek in Judas, katlej oyeka se de yejwan majtlakte iwan omen imomachtijkawan, okualinwikaya miekej tlakaj kiwalkuij espada iwan kiwalkuij kuawitl. Yinmej tlakaj okualintitlankej in tlayekankej tiopixkej iwan tlayekankej tetajtzitzintin judiojtin. ⁴⁸Pero in Judas antes de kinmaktilis in Jesús, achtoj okinmilwij in tlakaj kenik kinmititis. Okinmilwij:

—Katlej nej nikixpipitzos, yen yon Jesús. Xikitzikan iwan xikwikakan.

⁴⁹Satepan in Judas omijkuanij inawak Jesús iwan okijtoj:

—iNoltij Tlamachtij!

Iwan okixpipitzoj. ⁵⁰Iwan Jesús okinankilij:

—Amigo, étlan otikchiwako?

Ijkuakón omijkuanijkej okitzkijkej in Jesús, iwan okiwikakej.

⁵¹Ijkuakón se imomachtijkaw in Jesús okikixtij iespada iwan okinakastzontekke itekipanoj in weyi tiopixke. ⁵²Ijkuakón Jesús okilwij:

—Xiklaati moespada. Porke nochtin akinmej kimomagaskej ika espada, nojki mikiskej ika espada. ⁵³¿Amo tikmati tla Nej niknekini, welini niktlajtlaniliani noPapan, ma kualintitlani miles de angelestín para ma nechpalewikij iwan san niman kualintitlanini? ⁵⁴Pero tla ijkón nikchiwas, ékenik mochiwas tlan kijta tiotlajkuilole, katlej kijta nik ijkón nipanós?

⁵⁵Toneses Jesús okinmilwij in tlakaj:

—¿Annechkitzkikoj namejwan ika espada iwan ika kuawitl kej yeskia niichtekke? Nochipa onieka amowan itech in weyi tiopan onitlamachtijtoka

iwan mach keman annechkitzkijkej. ⁵⁶Pero noch iyi yin nipanoa para ma mochiwa tlan kijta in tiotlajkuilole katlej okikuilojkej in profetajtin.

Ijkuakón nochtin imomachtijkawan okikajtejkej iselti in Jesús iwan ocholojkej.

Jesús okiwikakej kan tlaixkomakaj (tlatzonmanaj)

(*Mr. 14:53-65; Lc. 22:54-55, 63-71; Jn. 18:12-14, 19-24*)

⁵⁷Katlej okitzkijkej in Jesús okiwikakej ixpan weyi tiopixke Caifás, kan oololitokaj in tlamachtijkej de itlanawatil in Moisés iwan tlayekankej tetajtzitzintin. ⁵⁸Pero in Pedro inkuitlapan oyáj de wejka asta kan patio de ichan in weyi tiopixke, ompa okalakke iwan omotlalij inwan mayoltin para kitas tlanon tlapanos.

⁵⁹In tlayekankej tiopixkej, iwan tlayekankej tetajtzitzintin, iwan nochtin de yen junta, okitemoayaj kenik kimayawiskej in Jesús ika tlajtoltatlalilistle para kimiktiskej. ⁶⁰Pero mach itlaj okajxiliayaj tlan ika kistlakawiskej, maski miejek okijtojkej tlan amo melawak. Pero satepan omoketzkej omen tlakaj teistlakawijkej katlej mach kualtin, ⁶¹iwan okijtojkej:

—Yin tlakatl okijtoj: “Nej welis nikxitinis in weyi tiopan de Dios, iwan san ika eyi tonale nikkewaltis oksemi.”

⁶²Tones in tlayekanke tiopixke omoketzke, iwan okilwij in Jesús:

—¿Amo titlanankilis? ¿Melawak tlan yejwan mitzistlakawiaj?

⁶³Pero Jesús mach otlanankilij. Ijkuakón in tlayekanke tiopixke okilwij:

—Nimitznawatia ika itoka in toTajzin Dios katlej nochipa yolitok, xitechilwi kox yen tej tiCristo, iKone in Dios.

⁶⁴Jesús okinankilij:

—Aján yen Nej, ijkón ken tej yotikijtoj. Iwan noijki namechilwia, nik namejwan annechitaskej Nej katlej onimochij nitlakatl niewatos ik iyekma in Dios katlej kipia weyi ipoder, iwan niwitz de ilwikak ijtek mixtle.

⁶⁵Ijkuakón in tlayekanke tiopixke omotlakentzayanke, iwan okijtoj:

—¡Yin tlakatl kixpanawia in Dios! ¿Tlan para moneki ok akaj ma kistlakawi de tlan yokijtoj? Namejwan ya ankikakej tlan yej inewian yokimokuitij. ⁶⁶¿Namejwan ken ankijtaj?

Iwan yejwan okijtojkej:

—¡Tlajtlakolej, moneki ma miki!

⁶⁷Ijkuakón okixchijchakej iwan okimaitenkej. Oksekimej okixtlajtlatzinijkej ⁶⁸iwan okilwijkej:

—Tej como tiCristo, itla xitlajto (xikadibinaro) akin omitzmaak!

Pedro okijtoj mach kixmati in Jesús

(*Mr. 14:66-72; Lc. 22:56-62; Jn.18 :15-18, 25-27*)

69 Pedro oewatoka kalan kan patio, iwan ijkuakón se tlapalewijkasiwatl omijkuanij inawak iwan okilwij:

—Tej noijki otinemia iwan Jesús katlej de estado de Galilea.

70 Pedro mach okimokuitij, okijtoj:

—Mach nikmati tlan tikipta.

71 Pedro yokistiaya ik puertajko, oksé siwatl okitak, iwan okinmilwij katlej ompa oyekaj:

—Yin tlakatl noijki onemia iwan Jesús de pueblo de Nazaret.

72 Pedro oksemi mach okimokuitij, iwan asta okijtoj nik in Dios tlachixtok. Okijtoj:

—Mach nikixmati in yon tlakatl.

73 Okachitzin satepan, katlej ompa oyekaj omijkuanijkej inawak in Pedro, iwan okilwijkej:

—Ya nele, tej noijki se de yejwan, porke mokaki oksé nik titlapoa.

74 Ijkuakón opéj tlawikaltia iwan asta okijtoj nik in Dios tlachixtok mach melawak. Okijtoj:

—Mach nikixmati in yon tlakatl.

Iwan san niman ijkuakón owaltzajtzik in kaxtil. **75** Ijkuakón Pedro okelnamikke tlan achtoj okilwij in Jesús: “Antes de tzajtzis in kaxtil, tej ijkuakón yotikijtoj ya eyi buelta nik mach tinechixmati.” Iwan Pedro okiske de ompa iwan ochokak sa tekitl.

Jesús okiwikakej inawak Pilato

(*Mr. 15:1; Lc. 23:1-2; Jn.18 :28-32*)

27 Níjkuak otlaneske, nochtin in tlayekankej tiopixkej inwan tlayekankej tetajtzitzintin judiojtin, omotlalijikej san se tlajtole kenamij kichiwaskej para kimiktiskej in Jesús. **2**Okiwikakej ilpitiw iwan okimaktilijkej in gobernador Poncio Pilato.

Judas omokechpiloj

3Satepan Judas, katlej okitemaktij (okitemaktilij) in Jesús, níjkuak okitak nik in Jesús yokitlajtlakoltijkej para mikis, omoyolpejpenke (omoyolkuepke) de tlan okichij, iwan oyáj okinkuepilito in senpoale iwan majtlakte tomin de plata in tlayekankej tiopixkej iwan tlayekankej tetajtzitzintin. **4**Iwan okinmilwij:

—Yonitlajtlakoj, porke oniktemaktij yon tlakatl katlej mach itlaj tlajtlakole okichij.

Pero yejwan okilwijkej:

—Tejwan mach totekiw. iOmpa tej xikita!

⁵Ijkuakón Judas okitlamotlak in tomin ijtk in weyi tiopan, okiske, iwan oyáj omokechpiloto.

⁶In tlayekankej tiopixkej okololojkej in tomin iwan okijtojkej:

—Mach welis tiktaliskej yin tomin ijtk kaja kan motlalia in ofrenda, porke ika okitlaxtlajkej imikilis se tlakatl.

⁷Iwan satepan omotlalijkej san se tlajtole para ika yon tomin kikowiliskej itlal in Xoktzinchij, para kipiaskej kan kintookaskej in tlakaj katlej mach ompa chanejkej. ⁸Por yonik yon tlale itoka asta axan, Tlale de Estle. ⁹Iwan ijkón omochij tlan okijtoj in profeta Jeremías, nijuak okijtoj: “Okitilankej (okonankej) in senpoale iwan majtlakte tomin de plata, achón tomin katlej okitemakakej in tlakaj de Israel por Yej. ¹⁰Iwan ika yon tomin okikowilijkej itlal in Xoktzinchij, ijkón ken onechnawatij in Señor.”

Pilato okitlatzintokij in Jesús

(Mr. 15:2-5; Lc. 23:3-5; Jn. 18 :33-38)

¹¹Jesús oyeka ixpan gobernador itoka Pilato, iwan yin gobernador okitlajtlanij in Jesús:

—¿Yen tej tiRey de judiojtin?

Jesús okilwij:

—Aján, ijkón ken tej yotikijtoj.

¹²Iwan maski in tlayekankej tiopixkej iwan tlayekankej tetajtzitzintin opéj kistlakawiaj, in Jesús mach itlaj okijtoj. ¹³Ijkuakón Pilato okilwij:

—¿Amo tikkaki tlan yejwan kijtaj de tej?

¹⁴Pero Jesús mach itlaj okinankilij. Iwan Pilato sa otlajtlachixke (omomajmawtij).

Jesús okitemaktijkej (okitemaktilijkej) para ma kimiktikan

(Mr. 15:6-20; Lc. 23:13-25; Jn. 18 :38-19:16)

¹⁵In gobernador okipiaya kostumbre ke itech ilwitl de pascua kikajkawas se preso, san katlij yej kitlajtlaniliskej in tlakaj. ¹⁶Ijkuakón otzaktoka telpiloyan se tlakatl katlej ik nowian (nian nepa) okitokayomatiaj itoka Barrabás. ¹⁷Iwan nijuak omololojkej miekej tlakaj, in Pilato okintlajtlanij:

—¿Katlij yej namejwan nankinekij ma nikkajkawa: yen Barrabás, o noso yen Jesús, katlej kinotzaj Cristo?

¹⁸Porke in Pilato okimomakak kuenta nik in tiopixkej omoxikoayaj, iwan por yonik okitemaktijkej (okitemaktilijkej) in Jesús.

¹⁹Mientras Pilato oewatoka ipan isiya para tlaixkomakas (tlatzonmanas), isiwa otlatitlanke ma kilwitij: “Amo ximokalaki iwan yon tlakatl

yolchipawak, porke yin yuak wel onechmajmawtij tlan onikteemikke de yej."

²⁰Pero in tlayekankej tiopixkej iwan tlayekankej tetajtzitzintin okintlatlalwijkej in tlakaj para ma kitlajtlanilikan ma kikajkawakan in Barrabás, iwan ma kimiktikan in Jesús. ²¹In gobernador oksemi okinmilwij:

—¿Katlij yej de yinmej omen ankinekij ma nikkajkawa?

Iwan yejwan okijtojkej:

—Xikkajkawa in Barrabás.

²²Pilato okintlajtlanij:

—¿Iwan tlan nikchiwas iwan Jesús, katlej kinotzaj Cristo?

Nochtin okilwijkej:

—¡Xikmajmasolti itech krus! ¡Ma miki!

²³Toneses in Pilato okinmilwij:

—Pero, ¿tlan okichij?

Pero yejwan oksemi otzajtzikej:

—¡Xikmajmasolti itech krus! ¡ma miki!

²⁴Nikuak in Pilato okitak nik mach itlaj owelia okichiwaya iwan yej okachi oyomoniaj, ikuakón otlanawatij ma kikuitij atl iwan omomajtekij inmixpan nochtin tlakaj, iwan okijtoj:

—Nej mach nikmati de imikilis in yin tlakatl. Ompa amejwan xikitakan.

²⁵Iwan nochtin in tlakaj okijtojkej:

—¡Yon xitechkawili tejwan iwan topilwan ma yelo tejwan totlajtlakol de imikilis!

²⁶Toneses in Pilato okikajkaj in Barrabás. Iwan satepan otlanawatij ma kiwitikan in Jesús, iwan okinmaktilij in tlakaj para ma kimajmasoltikan itech krus.

²⁷Satepan isoldadojwan in gobernador okiwikakej in Jesús kan palacio, iwan okiyawalojkej nochtin in soldadojtin. ²⁸Satepan okixixinijkej (okixipetzijkej), iwan okonakiltijkej se tlakemitl weyak chichiltikatlilmiktik ken katlej konakiaj in reytin. ²⁹Okichijkej se korona de witztle iwan okitlalilijkej ipan itzontekon. Okitzkiltijkej se vara itech iyekma kej tekiwaj. Iwan omotlankuaketzayaj iyakapan, okipinawiayaj okijtoayaj:

—¡Viva in Rey de judiojtin!

³⁰Iwan okichijchayaj, iwan okikixtilijkej in vara iwan ika okikuawijwitekiaj. ³¹Satepan de okipinawijkej, okikixtilijkej in tlakemitl chichiltikatlilmiktik iwan oksemi okonakiltijkej itzotzol. Satepan okiwikakej para kimajmasoltiskej itech krus.

Jesús okimajmasoltijkej itech krus

(Mr. 15:21-32; Lc. 23:26-43; Jn. 19:17-27)

³²Nikuak yoyabaj ipan ojtle, okinamikej se tlakatl de pueblo de Cirene itoka Simón. Iwan okitoktijkej ma kimamali ikrus in Jesús.

³³Nikuak oajsitoj se lugar itoka Gólgota, kijtosneki Mikkatzontekomatl, ³⁴okimakakej ma koni vino katlej okinelojkej ika se pajtle chichik. Pero nikuak okiyeko, mach okinekke okonik.

³⁵Nikuak yokimajmasoltijkej itech krus, in soldadojtin omotlaankej para kimoxejxeliliskej entre yejwan itzotzol in Jesús. Ijkón omochij tlan ya wejkawitl okijtoj in profeta: “Omotlaankej, iwan okimoxejxelilijkej notzotzol entre yejwan.” ³⁶Iwan satepan omotlalijkej para kitlatoskej (kikuidarojtoskej). ³⁷Ik ikuapak okitlalilijkej se letrero ikuilitok por tlanik okimajmasoltijkej itech krus. Kijtojtok: “Yin yen Jesús, inRey in judiojtin.”

³⁸Nojki omen ichtakej okinmajmasoltijkej itech krus san sekan iwan Jesús, se ik iyekma iwan oksé ik iopochma. ³⁹Iwan katlej ik ompa opanoayaj otlajtoayaj biero de Yej, iwan okoliniayaj intzontekon ⁴⁰okijtoayaj:

—¿Amo otikijtoaya nik welini tikxitiniani in weyi tiopan iwan san ika eyi tonale welini oksemi tikewaltiani? Ma tikitakan kiné. Xitemo de itech krus tla melawak tej titeKone de Dios.

⁴¹No ijkón okipinawiayaj in tlayekankej tiopixkej iwan tlamachtijkej de itlanawatil in Moisés, nojki in fariseos iwan tlayekankej tetajtzitzintin, okijtoayaj:

⁴²—Okinmakixtij oksekimej, pero yej inewian mach weli momakixtia. Tla melawak yen Rey de Israel, ma temo de itech krus, para tikneltokaskej nik melawak yen Cristo. ⁴³Tla okitlalij itlaneltokalis inawak Dios, tonses ma kimakixti in Dios, tla melawak kitlasojtla. Porke Yej okijtoj nik in Yej teKone de Dios.

⁴⁴In ichtakej katlej okinmajmasoltijkej itech krus iwan Jesús nojki otlajtoayaj biero de Yej.

Jesús omikke

(Mr. 15:33-41; Lc. 23:44-49; Jn. 19:28-30)

⁴⁵Ijkuakón itech nochí in tlaltikpak otlatleyuak, desde tlajko tonale asta las tres de tiotlakke. ⁴⁶Iwan itech yon ora kej las tres de tiotlakke, Jesús otzajtzik chikawak:

—Elí, Elí, ¿lama sabactani? —kijtosneki: Dios mío, Dios mío, ¿tlanik otinechkaj noselti?

⁴⁷Sekimej katlej ompa oyekaj, okikakej iwan okijtojkej:

—Yin tlakatl kinotza in profeta Elías.

48 San niman ijkuakón se de yejwan omotlaloj okikuito se esponja, iwan satepan de okisiaj ika iayo uvas xokok, okilpij itech se kuawitl iwan okiyaktiliј para ma koni. **49** Pero oksekimej okijtojkej:

—Xikkawa. Ma tikitakan kox witz kimakixtiki in Elías.

50 Jesús oksemi otzajtzik chikawak, iwan omikke. **51** Iwan san niman ijkuakón in kortina de yen weyi tiopan otlajkotzayanke, desde tlakpak asta tlakxitlan. Otlalolinke ixko yin tlaltikpak, in temej otlajtlanpankej, **52** in mikkakuyoktin otlatlapokej. Iwan miekej mikkamej omoyolkuikej katlej otlaneltokakej inawak Dios. **53** Yinmej katlej omoyolkuikej okiskej de ijlik inmikkakuyok satepan de omoyolkuik in Jesús, iwan okalakej itech weyikan de Jerusalén, katlej tlatiochiwaloj, kan miekej tlakaj okinmitakej.

54 In kapitan iwan katlej iwan oyekaj okitlatokaj in Jesús, nijuak okitakej otlalolinke iwan nochí tlan otlapanok, sa tekitl omomawtijkej iwan okijtojkej:

—Yin tlakatl melawak nik yen iKone in Dios.

55 Ompa oyekaj miekej siwamej okonitokaj de wejka, katlej ovalajkej iwan Jesús desde estado de Galilea asta Jerusalén katlej okipalewijkej.

56 Ompa oyeka in María de pueblo de Magdala, iwan María katlej inmaman in Jacobo iwan José, iwan nojki ompa oyeka inmaman katlej ipilwan in Zebedeo.

Jesús okitookakej ijlik se mikkakuyoktle

(Mr. 15:42-47; Lc. 23:50-56; Jn. 19 :38-42)

57 Nijuak ovalixtlamikke, oejkok se tlakatl de pueblo de Arimatea katlej okimopialiya, itoka José, iwan katlej nojki oyeka imomachtijkaw in Jesús. **58** Yon José oyáj okitato in Pilato iwan okitlajtlanilij itlalnakayo in Jesús. Tones in Pilato otlanawatij ma kimakakan. **59** José okitemowij itlalnakayo in Jesús de itech krus iwan okimiloj ika se sábana chipawak **60** iwan okitlalij ijlik imikkakuyok yankuik, katlej okikuyonijkej ikxitlan se tepejxitl. Okitankachojtiaj se weyi tetl tankachtik para ika okikamatzzakke, iwan satepan oyáj. **61** Ompa oyeka in María de pueblo de Magdala iwan oksé María, oewatokaj iyakapan mikkakuyoktle.

In soldadojtin katlej okitlatokaj in mikkakuyoktle

62 Owalmostlatik, satepan de yen tonale nijuak in judiojtin omotlayektlaliliayaj para mosewiskej itech weyi tonale, in tlayekankej tiopixkej iwan fariseos, oyajkej okitatoj in Pilato **63** iwan okilwijkej:

—Nian otimitzitakoj tejwatzin, porke otikelnamikej ke nekáj tekajkayaj, nijuak ok onemia, okijtoj ke satepan de mikini ipan eyi tonale moyolkuini.

64Por yonik, xitlanawati ma kitlatokan in mikkakuyoktle asta ma ajsi eyi tonale, amo san kichiwa imomachtijkawan yaskej kikixtiwej de yuak, iwan satepan kijtojtinemiskej nik omoyolkuik satepan de omikke. Porke in tlamo, okachi kinkajkayawas in tlakaj iwan amo san ken achtoj okinkajkayaj.

65Pilato okinmilwij:

—Nian katej nosoldadojwan. Xikinwikakan iwan ompa namejwan xikitakan de kuale ma tlachixtakan asta kan welij.

66Tones oyajkej iwan kuale okiyekkamatzakej in mikkakuyoktle iwan okiseyarojkej in tetl katlej ika okamatatzakej, iwan ompa okinkajtejkej in soldadojtin.

Jesús omoyolkuik

(Mr. 16:1-8; Lc. 24:1-12; Jn. 20 :1-10)

28 Níjkuak yopanok in weyi tonale, iwan yotlanestiwalaya de yen yakinika tonale de yen samana, María de pueblo de Magdala, iwan oksé María, oyajkej okitatoj in mikkakuyoktle. **2**Iwan san niman ijkuakón owatlalolinke, porke se iángel in Señor owaltemok de ilwikak iwan ovalaj kan kajki in mikkakuyoktle, okijuani in tetl katlej ika okamatatzaktoka iwan ipan omotlalij. **3**In ángel opetlania kej se tlapetlanalistle, iwan itzotzol oyeka istak kej mixtle katlej sa tekitl istak. **4**In soldadojtin níjkuak okitakej sa tekitl opapatlakakej (obibiokej) de nemajmawtile, iwan omokajkej kej mikkamej. **5**Ijkuakón in ángel okinmilwij in siwamej:

—Amo ximomawtikan. Nej nikmati nik ankitemoaj in Jesús, katlej okimajmasoltijkej itech krus. **6**Mach nian kajki, porke in Yej yomoyolkuik, ijkón ken Yej okijtoj. Xiwikikan xikitakij kan ankitlalijkej. **7**Iwan xiwian totoka iwan xikinmilwikan imomachtijkawan nik in Yej yomoyolkuik de itech imikilis. Iwan Yej tlayekanas yas para Galilea iwan namejwan ompa ankitajsiskej. Yen yin tlan omonekia namechilwiani.

8Ijkuakón in siwamej okiskej de kan mikkakuyoktle iwan oyajkej totoka ika miek nemajmawtile iwan ika miek pakilstle. Omotlalojkej okinmatiltitoj imomachtijkawan in Jesús. **9**Pero, Jesús okinnamikke ipan ojtle iwan okintlajpaloj. Tones in siwamej omikuaniijkej inawak Jesús, okimetznapalojkej iwan okiweyikixtijkej. **10**Jesús okinmilwij:

—Amo ximomawtikan. Xiwan xikinmilwitatjuk nokniwan ma wian para Galilea, iwan ompa nechitajsij.

In soldadojtin okintlaxtlawijkej para otlakajkayajkej

11Mientras in siwamej oyajkej kan oyekaj in momachtijkej, sekimej soldadojtin katlej okitlatokaj in mikkakuyoktle oyajkej itech weyikan de

Jerusalén okinmatiltitoj in tlayekankej tiopixkej nochí tlan otlapanok.
12 Yonmej tlayekankej tiopixkej oyajkej omotlapowitoj inwan tlayekankej tetajtzitzintin, iwan satepan de omotlalijkej san se tlajtole, okinmakakej miek tomin in soldadojtin, 13 iwan okinmilwijkej:

—Namejwan xikijtokan ke imomachtijkawan oyajkej de yuak okichtekitoj itlalnakayo, mientras namejwan ankochtokaj. 14 Iwan tla in gobernador kimatis ke ankochtokaj iwan kualanis, tejwan iwan timotlapowiskej para amitlaj ma amechilwi.

15 Toneses in soldadojtin okitilankej in tomin iwan okichijkej ijkón ken okinmilwijkej. Iwan asta axan ijkón kineltokaj in judiojtin.

Jesús okinnajnawatijtewak imomachtijkawan

(*Mr. 16:14-18; Lc. 24:36-49; Jn. 20:19-23*)

16 In majtlaktin iwan se momachtijkej oyajkej para Galilea, ipan se tepetl kan Jesús okinmilwíj ompa motaskej. 17 Iwan níjkuak okitakej in Jesús okiweyikixtijkej. Maski sekimej mach okineltokayaj kox yen Jesús. 18 Jesús omíjkuanij innawak iwan okinmilwíj:

—NoPapan Dios onechmakak nochí tekiwajkayotl para ma nitlanawati ompa ilwikak iwan ixko yin tlaltikpak. 19 Por yonik, xiwian iwan xikinmachtikan nochtin in tlakaj de ixko yin tlaltikpak para ma yekan nomomachtijkawan. Iwan xikinkuateekikan ika itoka noPapan, ika itoka iKone, iwan ika itoka in Espíritu Santo. 20 Iwan xikinmachtikan ma kichiwakan nochí tlan Nej yonamechnawatij. Iwan xikelnamiktokan nik in Nej amowan nietos nochí tonale, asta ikuak tlamic in tlaltikpak. Ijkón ma yeto.